

# CIMANYINU CILELÈLÀ

## CÌDÌBO BAPANGÈ KUMÒNA



...kudisangisha mu dinda emu mu Dîna dya Mukalenge Yesu, ne paanyima paa mêmè mumana kusambila bikole. Nenku mu dinda emu, neivwa mubiike kumpala kwa dîbà to. Mvwa bu mubiike pashiishe, ne ndi ngeela meeji ne bantu bônso mbamanye bwa cinyi aci ncyenzeke, mpindyewu mene.

<sup>2</sup> Ndi mwalukile kwanyi kumbelu, mu dinda adi, anyi diloolo adi, nenku mwena mutumba naanyi uvwa mwimane mu lubanza amu, yèyè ne mwanende mutekete wa bakaji. Mukajende ùtu munganga mu nzubu wa bavyèlè ku lupitaadi. Pa nanku yèyè uvwa ne—ne dikombo mu cyanza, diipacila bule *ebu*, diikàle ne—ne dîyi dikese difundapu, kakaba kampanda, ne kaacintu kampanda kàmba ne: “Kaakù Branham, mûndi ngeela meeji, kubangila pa dîbà 3.43 anyi 4.43 nanku awu, matuku 11 a ngondo wa dikumi.” Pashiishe, mu tuboko tunene menemene kwinsi aku, bambe ne: “Wèwè udi mukulumpe kupita mùdi udeyela meeji amu.” Pa nanku’s ndi ne bukenji mpindyewu bwa kushaalaku mwikishe mupicisheku ndambu mu dinda. Ncy bushuwa anyi, Mwaneetu Wright, paudi—paudi ulwa kaakù?

<sup>3</sup> Nenku’s ndi ngeela meeji ne aci cidì cimbingishaku, dîbà adi, Mwaneetu wa bakaji Kidd, mu dinda emu, bwa kwikala nciyi mujuuke mu bulaalu panuvwa balwe kwanyi nufumina ku Ohio apu. Ncy bushuwa ne ndi ndyumvwa bu ne nkaadi ne bidimu dikumi pamutu, ngeela meeji’s, nansha nanku, paanyima paa ciine aci. Kadi, anu munudi bônso bamanye ne ndi ne mwikulu mutekete wa balume kuntwaku, wa bujitu bwa bupitaku kilô isatu kakese anyi bwipacile ku yinaayi, cintu bu nanku awu, mwànà mukese mubi kwisù wa kacya ngaamonaku paanyi. Bavwa bamba ne: “Mmufwane kakwèndè mulume anu pyòpyopyò.” Pa nanku... Kadi mvwa nkeba mwa kumona kwayiye, kwayi Billy.

<sup>4</sup> Pa nanku, makeelela diloolo, pâmvwà mpweka mu cibweledi amu, paanyima paa mêmè mumane kubiikilangana ku telefone, mêmè kutwilangana ne musumbà wa balunda baa lulamatu baa ku Géorgie ne mu nyungulukilu mwamwa, nenku tuvwa bônso tusanganyiibwa kuntwaku munkaci mwa kubandila bânà bakese abu. Ne bôbò mbalenga baa dikema’s. Mpindyewu, badi bôbò anu... Mêmè mvwa misangu yônso ndyumvwa anu cintu kampanda bu ne: “Billy, udi uciina ne nkwèpi kuwalwa kubacibula, udi mumanye’s. Bôbò mbakese baa dikema.” Nenku ndi ngeela meeji ne uvwa m’Mwaneetu wa bakaji Beeler uvwa

mwambe ne... Mêmè mvwa ne ciibidilu cya kudyambidila... Yêyè uvwa ne ciibidilu cya kudyambidila pende mushindu awu, kadi, paanyima, kujandulaye ne kabavwa bacibuka anu bipeepele nanku to. Pa nanku, ndi ngeela meeji ne cidi bu cya bushuwa.

<sup>5</sup> Makeelela mu mapingaja mvwa mupeteku dyèsè dya kufika ku lumwe lwa ku mbanza ya bânà beetu baa bakaji baa mu ekeleeziya emu, kumbelu kwa mwanende wa bakaji; ne ndi ngeela meeji ne yêyè awu udi kabidi mu ekeleeziya emu, kùvwàbo balongolole didya dikese dya mundaamuunya dya mufikilu wa dilediibwa bwa Mwaneetu Neville. Wa bwalu yêyè uvwaku ne dikwabo dikunji dya ntanta dyápìciyè makeelela awu. Pa nanku tudi twambila Mwaneetu Neville ne: “Mufikilu wa dilediibwa mulenga wa menemene,” muntu ne muntu wa kutudi, bwalu yêyè mmwaneetu wa maalù mîmpè matambe. Nenku, mu bushuwa bwa bwalu, mmufume ku dipita bidimu makumi abidi ne bitaanu, kakese ndambu, pa nanku dîbà adi anu bu mêmè. Nanku twafumu ku dibipita, musangu mwibîdi. Aci’s... Mpindyewu aci’s nkwenda kushaala muntu mukulakaji’s, paukaadi upita cimanyishilu aci bwa musangu mwibîdi apu, nudi bamanye’s.

<sup>6</sup> Ndi mvuluka dinda dyàkalwà Frankie Weber mwab’ewu. Ne yêyè mwine uvwa mwena mutumba neetu wa nzubu yetu mitwangane kaaba aka; mwanende wa bakaji mmusòmbèlemu mpindyewu. Yêyè mwaneetu wa balume udi mu Floride. Nenku mêmè ne Frankie tuvwa tuya mu kalaasa pamwe. Ki Frankie kwelaye mulambu wa mufikilu wende wa dilediibwa. Kadi mêmè mvwa nyiisha kukaavwa bidimu bisatu anyi binaayi mwine musangu awu. Mêmè ngutu mufikishe Frankie kùdì Mukalenge Yesu. Ki kwelaye meeyà makumi abidi ne ataanu. Ngeela meeji ne mêmè mvwa ne bidimu makumi abidi ne bibidi. Kadi yêyè kwela meeyà makumi abidi ne ataanu. Mêmè kudyambidila ne: “Kaa, ekelekele, udi muswe kungambila ne Frankie Weber ukaadi ne bidimu makumi abidi ne bitaanu anyi? Yoyöyò! Ekelekele, ndi nciina bikole bwa cikondo cîngààpetà bidimu makumi abidi ne bitaanu.” Mpindyewu nkaadi pabwîpî ne kwela yôyi ayi yisatu, nenku, abidi adi panshi aa’s. Pa nanku kaciyena—kaciyena cinenga ntanta mule bwa kucipita to.

<sup>7</sup> Pândi ntangila mwab’ewu mmona Mwaneetu wa balume ne Mwaneetu wa bakaji Kidd mu bidimu makumi mwandamukulu ne bacikàle anu ne makanda, ntu ndyambidila ne: “Mukalenge Yesu, umfwileku luse bwa didyabakeena, ne bidimu makumi ataanu ne bibidi.” Kadi bôbò...Wèwè udi ne makumi mwandamukulu, ne Mwaneetu wa balume Kidd udi ne makumi mwandamukulu ne cimwe. Mmwômò anyi? Makumi mwandamukulu ne cimwe. Kâdi bôbò bàcidi anu mu mudimu wa bwambi. Ne ndi nnwambila ne, aci cidi citupeesha bukutu,

kí mmwômò anyi? Mmwômò cya bushuwa. Ncya bushuwa ne Mukalenge mmwímpè kutudi.

<sup>8</sup> Mpindyewu, kudi cintu anu cimwepele cîndì mêmè nciina bikole, pa kwenza disangisha kaaba aka mu dinda, ne ciine aci cidi. . . Ncibi be, cidi cyumvwika bu cintu cya bundu pa kucyamba. Kadi ndi ne balunda bààbûngì be bàdì bàlwa, bafumina kule kwa dikema, bwa—bwa kulwa mu masangisha.

Ncyèna mmona ba-Evans kaaba aka to, kadi bàdìpu mu mwaba kampana, mûndì ncinka. Kacya bôbò kabàtuku bapumbisha disangisha nansha dimwe to. Kadi nudi bamanye bûngì bwa miles yidibo bendesha mashinyi dyalumingu dyônsò bwa kulwa kuteeleja diyiisha anyi? Kilomèètà binunu bibidi. Kabatu mwa kwenzaku lwendu lwa ndola mishaadile ku makumi asambombo too ne ku makumi mwandamutekete ku lumingu to, bwa kuya mu ekeleeziya, ncyà bushuwa, cikondo cìdìbo bafika kaaba aka bwônsò bwabo, dîkù dyabo dijima, balwa mwab'ewu, bafuta.

<sup>9</sup> Mpindyewu, kakwena anu aci to, kadi ki mwaneetu wa balume mukese nyèyè ewu wa ku Alabama kwaka, ùtu wendesha mashinyi ntanta pabwìpì ne umwèumwè awu ku lumingu ne ku lumingu lwônsò. Mwaneetu. . . Kaa, ekelekele! Mwanetu “Welt”? [Mwaneetu wa balume kampana udi wamba ne: “West.”—Muf.] West. Mêmè. . . Yèyè's udi umweka anu bu nsongaalume, bwanyi mêmè. Pèndè yèyè's ukaadi—yèyè's ukaadi taatù mujima padiye apu, ne musumbà wa bàna. Kadi yèyè ùtu anu umvulwija, yèyè udi bikole ne mmwenekelu wa nsongaalume, yèyè ne mukajende. Mwaneetu wa balume West.

<sup>10</sup> Mwaneetu wa balume ne Mwaneetu wa bakaji Palmer bàdì basòmbe kaaba kàka bàba, baa ku Macon kwaka, mu Géorgie.

Ne—ne Mwaneetu wa bakaji Ungren, pa ciibidilu bàtu kaaba aka, baa ku Memphis, Tennessee. Badi kaaba aka mu dinda emu anyi? Ndi—ndi. . . Pa ciibidilu bàtupù. Mwaneetu wa bakaji Ungren ne—ne musumbà wa baa ku Memphis, mu Tennessee, kule, eyowa's, mwamwa mundekeelu menemene.

Kudi kabidi bakwabo. Ndi anu. . . Mbààbûngì be, bwa kubateela. Bamwe baa kudibo, baa mu Kentucky wa ku sud mwamwa. Bamwe, baa mu nyungulukilu wa Chicago mwamwa. Ne bamwe mbaa ku Chicago, ne baa kupita Chicago, ne mu nyungulukilu amu.

<sup>11</sup> Mu dyalumingu, mvwa muumvwe bamba ne kuvwa muntu kampana kaaba aka mufumine ku Californie kwônsò kwaka, ne ùvwa anu ne dîbà dikese dya kushaala neetu; ùvwa ujinga bwa kumonangana naanyi. Mu bushuwa bwa bwalu, mêmè mvwa kuulukuulu, paanyima paa disangisha apu. Neku muntu awu yèyè kwalukila's, nciyi mumonangane nende to.

Mukwabo yêyè uvwa mulwe ufumina ku Illinois, mu mwaba kampana. Muntu awu yêyè kaaba aka mu dinda emu, ayi yivwa m'pommes mishêmè yebe ya kacya yîntù nciyiku mwanji kudya to. Kadi yêyè uvwa muntwadile mushiki mujima wa pommes.

Ne umwe wa ku bânà beetu baa balume baa ku Géorgie kwaka, ngeela meeji ne kuvwa nkwôkò's, anyi ku mwaba kampana, uvwa mulwe ne dibuki dinene menemene dya misa ya pacanes, yiipacila bunene *ebu*, ya bizubu bipeepele. Nenu, kaa, ndi mwa kuyidya eyo!

<sup>12</sup> Bwa mpindyewu, ndi, mu bushuwa bwa bwalu, ncyêna ndya byakudya bya bûtamù matuku aa to, ncyêna mubidyè to kacya anu mààmù wàya. Ndi munkaci mwa kukeba Mukalenge bwa—bwa dimona dipyadiya. Ndi ndya anu bintu bipeepele, ne bu mùdì bîndì . . . bikese bìdiku mwa kundama; ndi mujimije bujitu bwa kilò citeema. Ciine aci cidi . . . Mpindyewu, ncyêna munkaci mwa kujila byakudya to. Ncyêna . . . to. Aci, anu bwa kwenza aci, aci kî ndipeesha Mukalenge nansha. Ikàlà muswe mwa kupeesha Mukalenge cyûdì naaci cya citambe bwîmpè aci. Kî . . .

<sup>13</sup> Byangenzekedi bwa mmone Mwaneetu Sumner ne bakwabo abu kabidi paanyima pààpa. Bàdikù bààbûngì be. Ndi . . .

Bu mùdì, mu dyalumingu dishaale, mvwa munkaci mwa kuteela bantu bàvwa—bàvwà bàsòmba ne maman, ne bikwabo. Nanku mwaneetu wa bakaji wa lulamatu lwa menemene uvwa mwab'awu. Mémè kupwa mwoyi bwa kuteela dîna dya mukaji awu. Mpindyewu, yêyepù mu dinda emu, ndi mmulomba luse. Umwe wa kudibo uvwa m'Mwaneetu wa bakaji Beeler, ne mukwabo uvwa m'Mwaneetu wa bakaji ne Mwaneetu wa balume Steffy. Ne bààbûngì be! Mémè . . .

<sup>14</sup> Nudi bammanyè bônso bìmpè menemene bwa kumanya ne ncyêna ncyenza ku bukole to, pândì mpanga kumanya dîna kampana anyi mpanga kumona muntu kampana. Mushindu mwine wùvwàbo baa lulamatu's we! Ne misangu mikwabo mémè anu musòmbè kaaba aka, ndi mwa kuteela muntu kampana udi ufuma ku dimvwila mu meeji awu. Kadi ndi . . . Bwa cyôci aci, ndi muswe kwamba kasumbu kajima, bantu bônso, nwamonu's, mbilenga bya dikema. Nenu dîbà adi, bantu bônso, baa basankisha, ne musangeelu kutudi. Nenu ncyà bushuwa ne tudì twanyisha cyôci aci.

<sup>15</sup> Nenu mpindyewu, mu dinda emu, netwikalè mwa kuteeta kulengaku cyakabidi Dìyì dya Nzambi. Mpindyewu, ndi njinga kwamba dîyì edi, bwa kwikalabi bitooke menemene, bwa ne ncitu—ncitu ndwa ku disangisha kana dyònsò anu bwa kummonabo to. Ncitu ndwaku anu bwa kwamba ne: “Ee, ndi pàmwàpa muswe bwa kulomba Mukalenge bwa—bwa kumpeesha Dìyiisha dyàfikishà anu bantu ku didyumvwa bìmpè ne kwelabo mbila” to. Tukaadi bapetepete bya nanku bûngì cyanaana, kadi, ne tudì twanyisha ciine aci. Abi bidi anu

bîmpè. Nwamonu anyi? Abi mbilenga be. Nwamonu anyi? Kadi cîndi mêmè muswe kumanya, cidi ne: “Mukalenge, Wêwè uludikeku meeji aanyi mu cintu kampanda cîikalà dikwacisha kùdì bantu, cyâtâmbâ kubateeka pabwîpî ne Nzambi, cîikalà—cîikalà—cîikalà mwa kubenzelaku cintu kampanda.” Aci, kaciyi menemene bwa kubibaka mu nyuma to, kadi kubibaka mu dimanya ne mu mibelu ya Nzambi, bwa baamona mwa kumanya mwa kwimana pàâlwa mwena lukuna.

<sup>16</sup> Mwva nyiikilangana ne mwaneetu wa bakaji kampanda udi mulwe kaaba aka bwa kutwendelaku lumingu elu, Mwaneetu wa bakaji Palmer. Ûvwa wâmba, ùswa kumanya ne mmunyi mûndiku mêmè musòmbèle mu ditunga edi. Cidi, lwâku wêwè anu muneemu, nenku, eyowa, musangu wònsò wûndi anu ndyata cibandabanda eci paanyi kumba kusaama pândi anu ne ngaabwedimu. Cidi cyôci anu citacisha mubidi anu bya menemene ebi mu cibandabanda eci. Aci tudi bamanye. Kadi Nzambi udi ne bânâ bââbûngi muneemu emu. Ne pa nanku dimwe dya ku matuku àdi panshi aa . . .

<sup>17</sup> Ndi munkaci mwa kukeba Mukalenge mpindyewu, bwa kupetaku Mukenji wa buludi menemene wa kùdì Nzambi. Nwamonu anyi? Nenku mêmè, ku dyambulwisha dya Nzambi, ndi anu ngiipacila bwa kushaala anu kacya ngaakwata too ne paalwaYe, mbwena kwamba ne too ne pangambilaYe dîyi kampanda. Bwalu ndi ndyumvwa ne bivwa bikengela bwa kwikalaku. . . Kudi cintu kampanda cidi pabwîpî ne kwenzeka mu nyungulukilu wa mwab’ewu, nenku ndi muswe kumanya ne ncinyi ciine aci. Ndi muswe kumanyina buludi kùdì Nzambi, bwa ngaamona mwa kwamba ne cidi EMU MMUDI MUKALENGE WAMBA. Nwamonu anyi? Ne pashiishe—pashiishe nudi mwa, nwênù, cisamba, dîbâ adi nenumanye ne kî—kî mmêmè to. Pa nanku, ndi muswe kuteeta bwa kucivwija nanku awu, bwa ne, anyi, kwanji kuumvwila kùdìYe dyambedi.

<sup>18</sup> Bwalu, Yêyè muteeke Mèyî Ende mu—mu muntu kampanda, ee, dîbâ adi kî mmuntu awu kabidi to; n’Yêyè. Dîbâ adi muntu awu yêyè ucyamba, mu yêyè mwine, dîbâ adi kacyakuyaku kumpala ne kukafika ku cintu nansha cimwe to. Kadi cyôci ciikàle Yêyè, Dîyî dya Mukalenge, diikàle mu muntu awu, neDipatuke, nenku dîbâ adi neciikalè—neciikalè anu cya bushuwa menemene. Aci ki mudimu wakatutumabo naawu mu Bible, lwà ku nshapita wa 20 wa Dutelonoma, ngeela meeji, mMwambe, eyowa: “Tangilaayi, muntu yêyè mwakule mu Dînâ dya Mukalenge, kadi kaciyi cyenzeka to, dîbâ adi kanuteyiku ntema nansha mikese kùdì muntu awu to.” Nwamonu anyi? “Kadi yêyè mucyâmbè ne cyôci cyenzeke, dîbâ adi mbimpè nuciteeleje,” nwamonu’s, “bwalu cidi cifumina kùdì Nzambi.”

<sup>19</sup> Mushindu awu ngùdì Nzambi ucyenza. Yêyè udi ne ndongamu Wende wa ciibidilu mwadija kaaba aka mu Bible.

Tudi bamanye mwa kubadilangana cyôci aci. Kadi kudi bintu kampanda, bidì—bidì bwa Ekeleeziya ne bwa cikondo ne bikwabo, bidiYe kayi mufunde mu Bible emu to, pa nanku Yêyè udi uteeka Dìyì Dyende dya mukana mu muntu kampanda ne ewu pende uDyakula, nwamonu's, uDyela patooke. Pa nanku, dîbà adi, mushindu wa kujingulula muntu awu ngwa kumona ne cidi cyenzeka mu mushindu udiye ucymba awu anyi. Dîbà adi, cyôci cyenzeka, pashiishe citungunuke ne kwenzeka mushindu awu, ee, dîbà adi tudi tumanya ne ncifumine kùdì Mukalenge. Dîbà adi tudi—dîbà adi tudi ne dyeyemena, dîbà adi, bwa kudilongolola ku bintu bidì bìlwa.

<sup>20</sup> Ndi muswe kubala myaba yibidi anyi yisatu mu Mifundu mu dinda emu. Ne ndi muswe kwanji kubala, dyambedi, mu Mukanda wa Ekesoode, ne ngeela meeji ndwà ku nshapita mwi4 wa—wa Ekesoode aku, kutudi tubangila.

<sup>21</sup> Nenu mpindyewu ndi mufwanyine kumanyisha panùcidi nudilongolola bwa kubala miine Mifundu eyi apu, ndi mufwanyine kumanyisha cîndì muswe kwakula neenu, cidi Mukalenge muteeke pa mwoyi wanyi bwa kwamba, mu dinda emu. Ncyêna mumanye cyenzaYe naaci to, kùdì bantu; cidi mwa kwikala ciludikila muntu umwepele kaaba aka, pàmwâpa muntu kampanda mu mwaba udibo bateeleja mikaba ya mêyi, mwaba kampanda mukwabo. Kadi ndi muswe kumanyisha, mu dinda emu. . .

<sup>22</sup> Ngeela meeji ne, mu dinda dya dyalumingu dishaale, mvwa muyiishe pa *Ntèmù Mulelèlâ*. Nenu dinda dya edi dyalumingu, bu Mukalenge mwa kwanyisha, ndi muswe kuyiisha pa *Cimanyinu Cilelèlâ Cidîbo Bapangè Kumòna*.

<sup>23</sup> Ndi. . .Mwaneetu Palmer uvwa ungambila, makeelela awu diloolo ne, mu dinda dya dyalumingu dishaale mvwa mwakule pa cyena-bwalu. . .anyi mwambe ne nêngiikalè mwa kwakula, edi dyalumingu, pa “Masangu anaayi a Ekeleeziya.” Kadi pângààbwedì makeelela diloolo awu. . .Pa ciibidilu ntu mbifunda. Cidi. . .Ncyêna mumanye ní bitu bikengela bwa wêwè kwenza nanku anyi to. Kadi mêmè ndi ne bintu byàbûngi bya dikema, bìndì nteeta kwelanganapu meeji. Pândì mpeta cintu kampanda, bikengela ncifunde pa dibeji. Nwamonu anyi? Nenu ki mêmè kuya bwa kucitangila, ne cîmvwà muswe kwamba pa cyôci aci kacivwa menemene masangu anaayi awu to. Mvwa mucyâmbè mu mushindu awu, cya bushuwa. Kadi cîmvwà muswe kwamba, civwa ne: “Mishindu yinaayi ya bukalenge bwa Ekeleeziya.” Ne bwa kwenza cyôci aci, bikengela nsangishe pamwe maalu malonda àbûngi. Nenu pàmwâpa musangu wàlondà ngûngàngatà cyôci aci. Kadi bidi bikengelaku ndambu mukwabo mukese wa dîbà mupite dîmvwà naadi adi, dîbà dya kulonga, bwa kubipeta, bwalu bidi bikukengela kwalukila cyanyima bwa kwangata matuku a ngondo, ne bikwabo.

Bwalu, nwènù bônsò, bônsò nudi nuumvwa ne bidi myaba yônsò. Mona's, tudi baswe kwikala batwishiibwe anu menemene bwa biine bintu ebi kumpala kwa twêtù kubyamba. Bidi bikengela bwa kwikalabi mu byôbì. Bwalu, tudi biimane kaaba aka, tukwata mudimu wà mutambe kutumbuka wùdi mukwaciibwe pa buloba: mwambi. Mwambi, ne ùdi mutambe kwikala mwambi wà bulelela ne mujaalame, wà ndudi, tudi ne cya kwikala mushindu awu. Tudi ne cya kukùùkila mwoyi kùdi Nzambi bwa kucyenza.

Mpindyewu, mu Mukanda wa Ekesoode, nshapita mwi4:

*Ki Mòsà kwandamuna e kwambaye ne: . . . mona, bôbò kabaakung'itabuujà to, anyi kabaakuteeleja d'iyi d'yanzi to: bwalu bôbò nebâmbè ne: MUKALENGE k' mmukumwenekele to.*

*Ki MUKALENGE kumwambilaye ne: C'idi mu cyanza cyebe aci ncinyi? Ki yêyè kwamba ne: Dikombo.*

*Ki yêyè kwamba ne: Dyèlè panshi. Ki yêyè kudiyela panshi, ne dyôdi kulwa nyoka; ki Mòsà kunyeemaye kumpala kwende.*

*Ki MUKALENGE kwambilaye Mòsà ne: Olola cyanza cyebe, ne umukwacile ku mukila. Ki yêyè kwolola cyanza cyende, ne kumukwataye, ki yêyè kwandamuka dikombo mu cyanza cyende:*

*Bwa kwitabuujabo ne MUKALENGE Nzambi wa baataatù baabo, Nzambi wa Abraham, Nzambi wa Izaka, ne Nzambi wa Yakobo, ngudi mukumwenekele.*

*Ki MUKALENGE kumwambilaye kabidi ne: Teekaaku mpindyewu cyanza cyebe mu cyâdi. Ki kuteekaye cyanza cyende mu cyâdi: kadi mmwenze anu ucyumusha, monaayi, cyanza cyende kwikalaci ne nsudi anu bu nêjè.*

*Ki yêyè kwamba ne: Teekaaku cyakabidi cyanza cyebe mu cyâdi. Ki kuteekaye cyakabidi cyanza cyende mu cyâdi; ne kucyumushaye mu cyâdi, nenku, monaayi, cikaavwa cyandamuke cyakabidi bu m'wà mubidi wende mukwabo awu.*

*Nenku nebyenzeke ne, bôbò kabayi bakwitabuuje wêwè, anyi kabayi bateeleje ku d'iyi d'ya cimanyinu cya kumpala to, nebiitabuuje d'iyi d'ya cimanyinu cya ndekeelu.*

Nudi numona bimanyinu bibidi abi, ne . . . cimanyinu cyônsò civwa ne d'iyi. Ngänji mbalululebi mvensa wa 8:

*Nenku nebyenzeke ne, bôbò kabayi bakwitabuuje wêwè, anyi kabayi bateeleje ku d'iyi d'ya cimanyinu*

*cya kumpala to, nebiitabuuje dîyî dya cimanyinu cya ndekeelu.*

*Nenku nebyenzeke ne, bôbò kabayi biitabuuje kabidi bimanyinu bibidi ebi, anyi kabayi bateeleje dîyî dyebe to, newangate mâyî a mu musulu, ne neûàmwangè pa...buloba bûme: ne mâyî audi wangata mu musulu awu neandamuke mashi pa buloba bûme.*

- <sup>24</sup> Nenku mpindyewu mu Yone Munsantu, nshapita 1 ku mvensa mwi6, tudi tubala mvensa eyi, anyi mvensa ewu. Yone Munsantu, nshapita 1 ku mvensa mwi6. Ne...

*Kuvwa muntu mutuma kùdì Nzambi, dînà dyende uwuwa Yone.*

*...muntu mutuma kùdì Nzambi, dînà dyende uwuwa Yone.*

- <sup>25</sup> Ne mu Yehezekele 24.24, ndi njinga kwelamu Mufundu ewu, nguswikakaja kuumukila ku Dipungila Dikulukulu, ne baprofeta, ne Dipungila Dipyadipya; bwa nwamona mwa kuumvwa ne nkuumukila kuntwadijilu too ne kundekeelu, mu Ekesoode, ntwadijilu too ne kundekeelu.

*Nenku Yehezekele udi cimanyinu kunudi. Nenwënzè bilondeshile byônsò bidiye yêyè mwenze abi; nenku paalwa cyôci eci, nenumanye ne mêmè ndi Mukalenge NZAMBI.*

Mpindyewu twinyikaayaaku mitu yetu bwa katanci kakese cyanaana patùdì tuseemena ne kaneemu kônsò kudiYe mpindyewu mu mushindu wa disambila apa.

- <sup>26</sup> Taatù, Nzambi, tudi tulwa mu Dînà dya Nzambi wa Abraham, Izaka, ne wa Yakobo: Yesu Kilisto, mwakane awu. Tudi tulwa, bamanye ne Yêyè neâtûmvwilè, bwalu katwena tulwa bu muntu kampanda udi mubwele anu mu citanda cyanaana nansha, kadi tudi tulwa ne bukitu bwônsò ku diitabuuja, biikàle twitabuuja ne citùYe mulaye aci, Yêyè neàcyënzè. Pa nanku tudi tulomba, leelu ewu, Mukalenge, bwa Wêwè kwangataku muntu ne muntu wa kutudi udi kaaba aka awu, kuumukila anu ku cyambilu too ne mundekeelu mwa citanda, mu myaba yônsò, ne ukangule mwoyi ne mwoyi wônsò ne utengule luumvu lwetu, bwa Dîyî dya Nzambi udi ne mwoyi dipatukile mu Dyulu, mu dinda emu, ne dipongolokele mu myoyi yetu, bwa twamona mwa kwitabuuja, patudi tuteeleja Dîyî dya Mukalenge ne mudibo batubadiledi mu maci etu mu dinda emu amu. Nenku tudi tuKwela twasakidila bwa Dîyî Dyebe. Dîyî Dyebe didi Bulelela.

- <sup>27</sup> Nenku mpindyewu, patudi tumona mêmà mabi enda aseemena apa, ciji cikole cyônsò cya Nzambi cikaadi cidyüngwîjile mu mau. Ne mpa dîbà kana dyônsò pàdi cintu kampanda cifwanyine kwenzekela ditunga didi diKulekele



edi, ne pàdi mwa kulwa dikubakuba dinene dìdì difwanyine kuumusha ditunga dyònsò nkòong pa karta kaa buloba, ne mikànù yenda yidilonda, ya ditunga dìdì kadiyi dineemeka Nzambi diikàle dizuka bwa kwenza nanku. Ne bu mutùdì bamanye ne, pamutu paa kuseemena pabwìpì ne Nzambi, mbimweneke bu ne bòbò badi benda baya kule menemene. Bu mùdìbì ne Mukanda wa Bwakabuulwibwa ne yònsò ya mu Mifundu ayi mmyambe ciprofeta bwa dituku edi, dìbà adi enzaku bwa twangate didimwija adi, Mukalenge, bwa katwikadi beena lulèngù ne biikàle tubùnga tulu to, bu mutùdì mwa kwamba. Swaku bwa tujuuke kuulu ne tudinyukulule.

<sup>28</sup> Swaku bwa twikaleku ne dyumvwa, leelu ewu, mu mushindu wutudi katuyiku banji kwikala naadi kwònsò eku to. Swaku bwa myoyi yetu yitambe kulakuka kapyà, paanyima paa dituku edi, bwa kwamonaku mwa kwikala kapyà kateemesha mu misuuka yetu kiikalà mwa kutangalaka mu ditunga dijima edi, Mukalenge, ne bujaadiki bùdì ne mwoyi myaba yònsò yitudi tusanganyiibwa ayi.

<sup>29</sup> Beneshaku babeedi ne beena ntatu, aba bàdì mu lukengelu, ne bàdì munkaci mwetu ne bàdì kabayi munkaci mwetu, cisamba Cyebe, myaba yònsò.

<sup>30</sup> Beneshaku Dìyi Dyebe, Mukalenge. Jidilaku musadidi Webe, ne basadidi Beebe bàdì munkaci mwa kuteeleja, bwa ne, bònsò pamwe, twamonaku mwa kufikishiibwa ku dimanya dya ditambe kwikala pabwìpì menemene dya dimweneka Dyende, kutamba bya kacya kwònsò eku mu nsòmbelu wetu. Ncyèna ndombela anu bàdì apa aba nkaayaabo to, kadi aba bààtèèlejà mukaba wa mèyi pa buloba bujima abu, bwa baamona mwa kubwejiibwa mu Ekeleeziya wa Nzambi udi ne mwoyi. Bwalu tudi tufika ku dyumvwa ne kudi njila anu umwepele bwa twètù kulwa cidimba cya Ekeleeziya ewu, aci cidì nku dilediibwa dya Nyuma, dìbà adi tudi babatijiibwe ku Nyuma umwe mu Mubidi umwe. Ndi ndomba, Nzambi, ndombela yònsò wa kudibo pa buloba bujima, bwa Wèwè udipetele Wèwè mwine butumbi. Nenku swaku bwa tulongolole misuuka yetu mu mushindu wa ne, ku lubila lumwepele pa buloba bujima, twamonaku mwa kwela lubila lukole ne: “Nansha nanku, lwàku, Mukalenge Yesu.” Tudi tulomba nunku mu Dìnà dya Yesu Kilisto. Amen.

<sup>31</sup> *Cimanyinu Cilelèlà Cìdìbo Bapangè Kumòna.* Bantu mbakebekebe bimanyinu, kubangila anu ku Pàlò too ne leelu ewu.

Ne Yesu mmutwàmbile bwa—bwa cikondo cìvwàku mwa kwikala bakebi baa bimanyinu, ne mwambe ne: “Lukongo lwa beena lwonji, lwa beena masandi nelukeke bimanyinu. Kadi, nansha nanku, nebapete cimanyinu.” Nenku bivwa bikengela bwa lukongo alu kupetalu cimanyinu cya dibiika dya ku lufu; lwólò luvwa mwa kwikala lukongo lwa butekete, lwa beena

Iwonji, ne beena masandi lùvwà ne cya kupeeshiibwa cimanyinu cya dibiika dya ku lufu.

<sup>32</sup> Kadi pàdì Mufundu wùdì wùsanganyiibwà kumpala kwetu ewu, mu Yehezekele nshapita wa 24 ku mvensa wa 24, muprofeta ewu wakavwijiibwa cimanyinu. Nenku ki cyôci cimanyinu aci cîndì njinga kwakulapu.

<sup>33</sup> Muntu ewu wakavwijiibwa cimanyinu bwa Izaleela. Ne mu myaba yônsò mu Mifundu, Nzambi ùtu mukwate mudimu ne baprofeta Bende bu bimanyinu. Kadi bôbò bàtu anu misangu yônsò bapanga kubimona. Kacya kabàtukù bamweka bu bàdì bumvwa cimanyinu aci to. Bàtu misangu yônsò anu bakebangana ne cimanyinu cya disaluka.

Nansha Bafaalesa baa mu matuku a Yesu abu, baakamba ne: “Utuleeje cimanyinu cya ku Dyulu.”

<sup>34</sup> Kadi Yesu wakabaleeja ne nebapete cimanyinu. “Nwênù’s nukaaadi bamane kupeta cimanyinu.” Yèyè ne: “Nudi mwa kujingulula maulu. Nudi mwa kutangila cimanyinu aci. Nwamba ne: ‘Kuulu kwôkò kukunze, kubwite, maalaba kuulu nekwikale kubwite bikole.’”

<sup>35</sup> Bu ne bavwaku batangile cimanyinu kampanda, nunku mbaMutangile, ne bamanye ne Yèyè uvwa cimanyinu cya Nzambi kudibo; bwalu biprofeta byabo bivwà biMutàngila Yèyè bivwa munkaci mwa kuula kumpala kwabo bôbò badimwene. Kadi bôbò bavwa anu batungunuke ne kukeba cimanyinu.

<sup>36</sup> Mushindu mwine wùdibi bikemesha mùdì bantu mwa kwenza cyôci aci, biikàle bakeba cimanyinu pàdì cimanyinu ciikàle naabo mene, munkaci mwabo mene. Mpindyewu, Izaleela uvwa mubwele mu ngiikadilu ewu.

<sup>37</sup> Ne misangu mikwabo dikengesha ditù dikèngelà bwa ciine cimanyinu aci kupicilamu’s ndya dikemesha; dikengesha divwà Yesu mupicilemu adi, bwa kujaadika cimanyinu cya Nzambi aci, cya ne Yèyè ki uvwa Maasiya awu.

<sup>38</sup> Tudi tusangana kaaba aka, muprofeta wa citende ewu dîna dyende Yehezekele mwikàle mutungunuke anu ne kwikala cimanyinu, dîbà dyônsò. Mushindu mwine wakadikengeshaye yèyè mwine’s we! Mu mwaba kampanda emu tudi tusangana mwaba wakalaalaye kabavu luseke lwa dyabakaji munda mwa matuku nkama yisatu ne makumi citeema. Nzambi kumwambila bwa kwangataye nkunde ne ndambu wa musabu, abisambakaje, àbîpikè abibobeshe, ne abiteeke panshi ku luseke lwende aku. Kadi aye kalàala pa dilata dya dimpanù, ne kulaalapu kabavu ku luseke lwa dyabakaji, nkaayaaku; kayi ukudimuka to, munda mwa matuku nkama yisatu ne makumi citeema. Elaayibi peenu meeji ku bwalu abu. Ne pathiishe kwamba ne: “Kudimuka ku luseke lwa dyabalume ne ulaadileku cyakabidi munda mwa matuku makumi anaayi.”

39 Kadi kwambaYe apa ne: “Udi umona cinyi, Yehezekele,” ne, “bwalu wêwè udi mwambule bubu bwa cisamba, dituku dyônsò Mêmè nêmbalè cidimu cijima bwabo bôbò.” Bu mùvwàbi, ne, dituku dyônsò divwàye ùlààla kaaba aku, divwa dyumvwija cidimu cijima civwabo mwa kwikala mu bupika, ne civwà mibi yabo ayi ne cya kuvulukiibwa kùdì Nzambi, ne Nzambi kayi mwa kuteeleja kabidi masambila abo to.

40 Kadi dikengsha dyàkakèngelàbi bwa muntu awu kupicilaye, aci ncifwanyine kwikala ne mushinga bwa cinyi? Bâàbûngì bakaadi badikonkekonke ne, mbwa cinyi cintu bu nanku ncifwanyine kwikala ne mushinga bwa muntu kucyenzaye. Mbwalu bantu kî mbaswe kubala Dîyì, ne kî mbaswe kusambila to. Pa nanku, Nzambi mmudishikamine, ne Yêyè udi utuma baprofeta Bende bwa kwikalabo cimanyinu. Bantu kî mbaswe kubala to. Kabeena bacyuka bwa kubala to. Ne bôbò kî mbaswe kusambila to, bwalu mbatambe kwikala . . . badi ne bikwabo bintu bya dyenza. Kabeena mwa kwangataku dîbà bwa kusambila to. Ne Bible udi ubasuuya. Kêna ne bwenzeji bukumbane to bwa matuku a bwena leelu aa, anyi matuku kaayi ônsò.

41 Nudi bamanye’s, ngeela meeji ne Pôlò ngwákamba ne: “Nudi mikanda mifundilangana ya Nzambi, yidîbo babala kùdì bantu bônsò.” Nzambi ùtu ukwata mudimu ne bantu bu bimanyinu, bwa kuleeja bimanyinu Byende. Ne misangu yàbûngì ciine cimanyinu aci, ne dîbà dyônsò, misangu pamwe ne yônsò, pa kuumusha anu bwa bantu basungula, cimanyinu aci badi bapanga kucimona ne bacisendeka, bacyelulwila, baciimansha pambelu.

42 Ne bangàciibwe, nansha mene mu Dipungila Dikulukulu, mu matuku a baprofeta, bavwa babangata bu bantu baa byeledi bya meeji bipampalamuke. Bavwa beela meeji ne baprofeta abu bavwa banyunguluke mitu, ne bavwa ne cintu kampanda cipampalamuke mu mitu yabo amu. Nenku bavwa babamona bafumina mu cipeela ne—ne benza bimanyinu, ne pashiishe baalukila cyakabidi mu cipeela. Nenku bavwa mwa kubeelulwila, mbwalu kabavwa bamanye Mifundu to.

43 Yesu wakambila Bafaalesa, musangu kampanda, pa bìdì bitàngilà dibiiika dya ku lufu. Bôbò kwamba ne: “Tuvwaku ne . . . Mikenji yidi yamba ne muntu yêyè mufwe ne mushiye mukaji kayi—kayi mumulelele bânà to, bidi bikengela bwa mwanaabo wa balume angate mukaji awu amulelele bânà, mufwe awu.” Ki bôbò ne: “Tuvwaku ne muntu uvwa ne bânà baabo baa balume mwandamutekete. Ki wa kumpala kuselaye mukaji, kadi kufwaye, kayi mushiye dimiinu to. Ki pashiishe mwanaabo wa balume kwangataye mukaji awu, ne pashiishe kufwaye; anu nanku too ne ku wa mwandamutekete. Ki ndekeelu wa byônsò mukaji awu kufwaye.” Bôbò ne: “Mpindyewu, ku dibiiika dya ku

lufu,” bôbò ne, “mpindyewu, mukaji awu neikalè wa nganyi, ku bôbò mwandamutekete abu?”

<sup>44</sup> Kaa, ndi munangepu Dìyì adi’s we! Yesu kwambaYe ne: “Nwènù misangu yenu yònsò nutu anu nutupakana, kanuyi bamanye nî m’Mifundu nî mbukole bwa Nzambi.” Kaa, mushindu mwine uvwaYe mufwanyine kuteemesha cyôci aci leelu ewu bu ne Yèyè uvwa mwimane kaaba aka’s we! “Nwènù misangu yenu yònsò nutu anu nutupakana, kanuyi bamanye nî m’Mifundu nî mbukole bwa Nzambi.” Bukole bwa Nzambi bùtu buswikakaja ku Mifundu. “Nudi nutupakana bikole be.”

Pashiishe kutungunukaYe ne kwamba ne: “Ku dibiika dya ku lufu, kabeena basela anyi baseleshiibwa nansha, kadi badi mùdì Banjelo.” Nanku, Yèyè kaakamba ne nebiikalè Banjelo to, kadi nebiikalè mùdì Banjelo, tujilu twa mubidi wa balume ne bakaji netwikalè tuumushiibwe kudibo. Kabeena basela anyi baselesha nansha.

<sup>45</sup> Tudi ne mwoyi mu dituku dya nsòmbelu wa...anyi mu matuku a cifwaka a bukalenge bwa cifwaka. Kadi kùlwalwà dituku diikalàku Bukalenge bülwalwà bùdì kabuyi bufwa, ne mu bwôbù Bukalenge bùdì kabuyi bufwa abu mmwikalà bapikula mwa kusòmbela. Aba bàdì bapikudiibwe abu, ne bàdì... Mwoyi ùdì wumuka mu ewu mubidi awu, bwa kwalukilawu kùdì Nzambi wàkawùfla, newalukile cyakabidi kuumukila ku Muci wa Mwoyi, dîngà dituku, bwa kukookesha kashidi.

<sup>46</sup> Mushindu mwine wùdì nsongaalume wa citende ewu, muprofeta wa citende ewu, mudifile ne mufile mwoyi wende wònsò bwa kwikalaye cimanyinu kùdì cisamba cyende, bwa dinyooka divwabo bôbò ne cya kupeta adi, bwalu bavwa citudi twètù bafwanyine kubiikila ne “kabayi bacyuka myanda.” Kabavwa baswe kwikala ne cya dyenza ne Nzambi to. Kabavwa biitabuuja biine baprofeta abu to, kadi bavwa anu babeelulwila. Nenku, kadi, pa kuumusha aci, nansha muvwabo kabayi baswe kuciitabuuja amu, Nzambi wakenza ne biikale naaci, nansha bishi.

<sup>47</sup> Izabela kavwa muswe kwitaba ne Aakaba uvwa mpaasata wende to, kadi’s ncivwaye. Nzambi wakenza ne yèyè apete cimanyinu, nansha bishi.

Ki mùdì kabidi ditunga edi leelu ewu. Nzambi mwakane ne wa meeji matooke awu, ku Dìyì Dyende, kî mmufwanyineku kulekela kantu nansha kamwe, katudi tumona pabwîpî ne kwenzeka aka, kayiku ne cimanyinu mu mwaba kampanda to. Yèyè ùtu anu naaci misangu yònsò. Mpindyewu, bidi bikengela bwa twètù kucikeba. Nenku mèmè ndi mutwishiibwe ne bantu bàdì ne dyumvwa dîmpè dya Mifundu mbamanye mwa kukeba.

<sup>48</sup> Noa uvwa cimanyinu mu dituku dyende, kùdì bantu, bwa cilumbulwidi civwà cyenda cilwa aci. Noa mu dituku dyende

wakangaciibwa bu mukoleshi wa maalu. Yèyè uvwa muprofeta. Wakangaciibwa bu muntu uvwa kayi ne ngeelelu wa meeji mwîmpè to. Kadi muntu awu wakatuuta anu kutuuta ne nsandu, ku cidimu ne ku cidimu, wîbaka bwâtù, pàvwàku kakuyi nansha mâyi pa buloba to pa kuumusha àvwà mu mishimi awu. Nenku yèyè kudyanjila kwamba cintu kampanda cya cicimbè, bwa meeji a musunya. Wàkamba ne: “Nekulwe mâyi afumina muulu mu dyulu.”

<sup>49</sup> Kakuyi mpatà to, bààbûngì bavwa bafwanyine kumwambila ne: “Ndeejebi tûng kwine kùdìwu.” Maalu a mamanya avwa mwa kwamba ne: “Mèmè’s ndi mwa kukujaadikila ne kakwena mâyi nansha makese muulu mwamwa.”

Kadi, nansha nanku, pîikalàbi ne Nzambi ngwàkamwambila ne ôwò neafumine mu maulu, Nzambi neenzè bwa Dîyi Dyende dyùlè.

<sup>50</sup> Ne pàvwàku kakuyi anu kwanji kwikala mâyi amweka, pàvwàku kacya kakuyi kwanji kwikala divuba nansha dimwe mu maulu, dimata dya mvula nansha dimwe kadiyiku dyanji kumata apu, kacya, kakuyiku cintu pààci ne mmvula to, nansha nanku, dîbà dyònsò adi, Noa yèyè uvwa anu ulongololangana ne bwâtù bwa mvula. Civwa ncileeji civwà ne mwoyi cya ne muprofeta ewu uvwa mwitabuuje civwaye wamba aci, bwalu ùvwa munkaci mwa kudilongololaku.

<sup>51</sup> Nenku muntu kana yònsò udi bulelela witabuujja cidiye wamba, neadilongolole ku bwalu abu.

<sup>52</sup> Swayi ngiimaneku kaaba aka mene, bwa katanci kakese cyanaana. “Mu dituku dya Noa,” bu mwàkambà Yesu, “ki mwikalabi kabidi ku dilwa dya Mwànà wa muntu.” Pîikalà ekeleeziya, leelu ewu, yitabuujja cidiyi yamba, s’mmifwanyine kuteeka cidiyi yamba aci mu cyenzedi.

<sup>53</sup> Mmunyi mutùdì bafwanyine kwikala twibakangana ne tutanku twa bitanda, ne mìliyô ya ndola myela mu bitanda, ne malongolodi manene matangalajangana eku ne eku ne bikwabo bya mushindu awu, kadi tuyiisha ne Kilisto ulwalwa dîbà kana dyònsò? Mmunyi mutùdì bafwanyine kutungunuka, tutangila masangisha etu tuàmòna atapuluka ashiyangana ne bukole bwa Nzambi ne abwela mu maalu a pa buloba, ne tuàbweja mu ekeleeziya ne tubivwija cimuku, ne twètù peetu twanyisha ciine aci? Anu bwa dimanyika, ne bwa mmwenenu ya dimanyika ne tuntu twa cyena mangumba tùdì tûtàpululanganà etu, biikàle tuteeta bwa kupita bulongolodi butudi naabu mutumba ku bûngì bwa bantu, mmunyi mutùdì bafwanyineku kuteeka mu cyenzedi bitùdì tuyiisha? Ne baa pa buloba paabo bamone ciine aci’s. S’mbamanye cyôci aci. Pa nanku, ntendeleelu ukaadi mulwe menemene anu cintu cya diya kashaala wa mu mulongo kampanda, anyi kwikala wa mu kasumbu kaa cintu kampanda. Ntendeleelu’s. . .

54 Lupandu lwa Kilisto kî nkasumbu kampanda to. Kî ndiya kashaala wa mu cintu kampanda to. Ndilabula didi ne mwoyi.

55 Mpindyewu, Noa uvwa uleeja civwaye wamba aci. Yêyè wakamba ne: “Nekulwe mvula wa cilumbulwidi pa lukongo lubi elu. Ne Nzambi neamulokeshe mvula, wufumina mu maulu, ne Yêyè neatukije buloba bujima mu mâyi.” Ne yêyè kavwa wenza anu aci cyanaana to, kadi uvwa wenza njila wa dipandukila ne ubiikila bantu bwa kulwaku. Kadi bôbô kabaakaswa kumuteeleja to.

56 Kadi, Noa, yêyè bu muprofeta, uvwa cimanyinu kûdi lukongo alu, cimanyinu cyakambabo mambavi, muntu wâkeelelabò meeji ne mmupâle; mwikâle ulongolola cintu kampanda, pâvwàku—pâvwàku kakuyiku cileeji nansha cimwe mwaba kampanda to, anyi cya ne cikaavwaku kacya, bwa ne kuvwaku kufwanyine kwikala dikwacisha dyaci nansha dimwe.

Kadi’s ki mushindu ngwôwù awu wùdibi bimweka ne ki mùdi bantu beela meeji leelu ewu. Badi mwa kwela meeji ku cisokomenu cya ku bombe. Cisokomenu cya ku bombe neciikalè ne dikwacisha kaayi kûdi pâdîbi ne kakwakushaala nansha mucu ne dyânyî anyi lubwebwe kampanda pa buloba?

57 Twêtù’s mbàdî ne cisokomenu cya ku bombe, mwena Kilisto’s ngudi naaci. Anu mûmvwà mwambe, kukaadi ndambu wa maadyalumingu, anyi mûmvwà ngeela meeji pâmvwà ngenda nya mu njila ne: “Kî ncisokomenu cya ku bombe to. Ncisokomenu cya bwina bwa diponamu, mutûdi tuponaMu, beele katungu, ne mwoyi wetu wônso, ne musuuka wetu wônso, ne meeji etu ônsò, tubwela mu Kilisto, bwâtù bwa dikubiibwa bwa Nzambi.”

58 Kadi, Noa, munyunguluke mutu, mùvwàbo bamwangata mu dituku adi, ku dikutakana dya diyiisha, ne dya dyanza dya cimanyinu kumpala kwa bantu, mwikâle ubapeesha didimwija, wâkapiisha baa pa buloba. “Wâkapiisha baa pa buloba, ku diibaka dya bwâtù,” pâvwàku kakuyi mâyi nansha makese bwa bwôbù kulelemapu to. “Wâkapiisha baa pa buloba,” mùdi Bible mwambe, Ebelu, nshapita wa 11. “Wâkapiisha baa pa buloba ne kusungila baa mu nzubu wende sungansunga, pa kulongolola,” ne kwikala cimanyinu bwa Nzambi, cya cilumbulwidi cya dituku adi civwà cilwa. Cintu kaayi cya butumbi’s’we!

59 Pââkapitâ bidimu, kwakalwa cimanyinu cikwabo. Civwa m’Môsà, muprofeta. Civwa ncimanyinu cya Nzambi kûdi Izaleela. Bavwa mu bupika kukaavwa bidimu nkama yinaayi. Ki Nzambi kubalongo lwela Ye cimanyinu, pabwîpi menemene ne disungidiibwa. Ne yêyè uvwa cimanyinu cya disungidiibwa kûdi Izaleela, ne cimanyinu cya cilumbulwidi kûdi Ejipitu.

60 Noa uvwa cimanyinu cya disungidiibwa kûdi cisamba cyende, ne cimanyinu cya cilumbulwidi kûdi baa pa buloba

bàvwà bajimine, mwena bupidya. Mâyì miine àkapacishà baa pa buloba mweyelu ne kushipa baa pa buloba mu màyi awu ngàakadi cyamu cya mudimu cya disungila naaci Noa. Cintu cimwepele civwàku mwa kumusungila civwa ncilumbulwidi aci.

Cintu cimwepele cyàsungilà Ekeleeziya leelu ncilumbulwidi, Nzambi uteeka cilumbulwidi cilembeleja.

Kadi Noa wakayiisha cintu anu cimwecimwe aci. Wàkalwa cimanyinu.

<sup>61</sup> Nenku mpindyewu Izaleela, paanyima paa bidimu nkama yinaayi, baakabanga kwela mbila bwa disungidiibwa. Kadi Nzambi kacya kàtukù uDibuulula ne uDileeja pàdi bantu Bende kabayi banji kwikala badilongolole bwa kwakidila cidiYe uleeja aci nansha.

<sup>62</sup> Mpindyewu, kaa, bìdì bifwanyine kwambiiibwa mwab'awu mene's! Byôbi ne. . . Mushindu mwine wùkaadi Nzambi mushiye ditunga edi butaka's we. Bôbò's mbamanye cìdì cìmpè. Bibejibeji mbicimanyishe, mu nyungulukilu ne mu nyungulukilu ne mu nyungulukilu yònsò. Bimanyinu bya Dilwa Dyende mbimweneshiibwe. Kadi bôbò mbatungunuke anu benda baya byenze bu ne mbacilengulule. Kabeenaku ne kabingila nansha kamwe to. Tukaadi ku ndekeelu.

<sup>63</sup> Nzambi ùtu utuma baprofeta Bende anu pàdi cisamba cikeba muprofeta. Nzambi ùtu utuma cimanyinu Cyende pàdi bantu badilongolole bwa cimanyinu kampanda. Kadi, cintu cìdìku ncyà ne, ku mpuukapuuka menemene nkùtù bantu. . . Bàtu bakafika mu mushindu wa ne badi bajinga disaluka, anyi baswe cintu kampanda cya ne: “Utuleeje cimanyinu cya ku Dyulu.” Kadi pàdi Nzambi utuma cimanyinu, dîbà adi kabayi baswe bwa kucimona to. “Pa nanku ncisokoka ku mèsù kwa beena meeji ne batalame, bwa kucibuulwilabo bânà bàdì baswe kuyiila.” Bôbò badi bapanga kucimona, cimanyinu ciine.

<sup>64</sup> Mushindu mwine wùvwàbi bikengela bwa Izaleela kwikalaye mumanye, pààkalediibwà mwânà uvwa mwakanyine awu, paakabandulukabo e kumwenabo ku—ku cikondo cya bidimu civwabo ne mwoyi aci ne: “Cisamba cyebe neciikalè cyenyi munda mwa bidimu nkama yinaayi, mu ditunga dyenyi, kadi pashiishe Mêmè nêmbàpàtùlè.” S'бивва bikengela kwikalabo bamanye ne dîbà dikaavwa pabwîpi, piine paakamonabo mwine mwânà uvwa mwakanyine awu ulediibwa apu. Ciine aci, nansha tatwëndè ne mamwëndè mene, Amram ne Yokebeda abu, kabaakakwacika bwôwà bwa mikenji ya mfumu to, kadi bôbò baakamuteeka buludi mu musulu mùvwà ngandu yisanganyiibwa amu; nansha umwe wa ku yôyi kaakapeta mushindu wa kumusuma mênù to. Baakamona ne kuvwa cimanyinu kampanda, kadi baakacilengulula. Kabavwa badilongolole bwa cyôci aci to.

Nzambi kumubweja buludi ne kumuteeka mu nzubu wa bukalenge wa Pâlò, ne kwenzaYe bwa Pâlò amukoleshe ne amupeeshe dilonga dyônsò dya tulaasa divwaye mwa kupeta adi, bwa kuleeja (Nzambi's) mwenzenzaYe maalu, kadi kuyaYe nende too ne mundekeelu mwa cipeela, kumufikisha ku dipwa byônsò abi mwoyi.

<sup>65</sup> Pâlò uvwa munkaci mwa kumulongesha piine apu. Nzambi pende munkaci mwa kumulongesha. Pâlò wakangata bidimu makumi anaayi bwa kumulongesha, pashiishe Nzambi kwangataYe bidimu makumi anaayi bwa kumulongesha, bwa kumufikisha ku dipwa byônsò abi mwoyi. Dilongesha dya muntu; ne dilongesha dya Nzambi.

Pâlò uvwa munkaci mwa kulongesha mwanende wa balume bwa kwikalaye mulombodi, cyenda-ne-mikanda wa mfumu, bwa kwikalaye mulwanganyi wa mvita, mutuucyanganyi, bwa kwikalaye mukwabo Pâlò uvwa ulwa uvwa mwa kulamina Ejipitu mu bipidi byende bya bitumbuke, upwekesha matunga makwabo ônsò ne uâfikisha ku difuta citadi kùdì Pâlò. Kadi Nzambi kuyaYe nende mundekeelu mwa cipeela, kuumumushaYe byônsò abi mu yèyè. Ki kumuleejaYe, munda mwa cipòòlù cya tusunsa tutaanu, ku cipuka cidì cilàkukà kapyà ne, Yèyè uvwa Nzambi udi ne mwoyi. Ne kuumushaYe bwòwà bwônsò bùvwà munda mwende abu; kumufikishaYe ku diikala mudilongolole. Yèyè uvwa cimanyinu's.

<sup>66</sup> Nzambi ùtu muswe bwa cisamba Cyende cisambile. Nenku pàkaavwà Izaleela bujitu bumutonde, mu mushindu wa ne, kabacivwa kabidi mwa kutamba kuya kule to, cikondo cyabo cimane kukumbana, ne majitu abo maye kule kutamba ne pàvwàbò bôbò beelela meeji, dîbà adi kubangabo kusambila. Ne pààkabangà bantu kusambila, dîbà adi Nzambi kubangaYe kuteeleja. Civwa ncikondo cya Dîyì dya Nzambi kuulaDì.

<sup>67</sup> Nenku ewu, pààkamònà Amram ne Yokebeda ne dikaavwa dîbà bwa Dîyì kuulaDì, kuditwabo mu disambila, kùdì Nzambi. Ne bitu pa ciibidilu ne aba bàdì bàsambilà ng'aba bàdì ne bujitu abu, ewu udi upeta cintu kampanda. Ng'aba bàdì bàsambilà, bàdì balongolola kùdì Nzambi bwa kwenzabo nanku.

<sup>68</sup> Tuvwa tuyiikilangana mu dinda emu ku meesa a didiila cyakudya cya dinda patuvwa tulwijakaja bwa kujikija mampà makàlanga ne bikwabo, bwa kuya mu ekeleeziya. Kuvwa cintu kampanda cyambiibwe bwa muntu kampanda uvwa, kule ne muneemu emu, uvwa mwalukile ku dinwa dya mfwanka paanyima pa yèyè mumane kwikala mwondopiibwe kansere. Mémè kwamba ne: "Bya luse be."

<sup>69</sup> Ki pashiishe muntu kampanda kwakulaye ne dîyì dikole e kwambaye ne: "Aci's ncintu cya cibyâcibyalè cidì cikèngelâ kwepuka, cidiku, kunwa kwa mfwanka."



70 Mêmè kwamba ne: “Ndi mumanye nanku. Bwalu, n’démon.” Kadi mêmè kwamba ne: “Cidi—cidi n’démon.” Ki mêmè kwamba ne: “Kadi kwêna mwa kuciimanyikaku to pàdi bukole bwa Nzambi kabuyi pambidi peebe.”

Ndi mumanyeku bwa bantu babidi kuntwadijilu kwa mwoyi wanyi, bônso babidi bavwa baswe kwikala balume baa Nzambi.

Umwe wa kudibo, ndi mwenze anu mmufikisha kùdi Kilisto, kubangaye kukwacisha mucu wa mfwanka. Ûvwa unwa mabuki ataanu anyi asambombo ku dituku, musòmbè anu naka mwikàle anu wakwacisha mucu e kukwacisha mukwabo, dituku dijima. Kadi kuteetaye bwa kukwacisha mucu mukwabo wa mfwanka, kadi Cintu kampanda kaciyiku mwa kumulekela uwukwacisha to. Kuyaye ku dicyuwa, kayi mumanye ne Mifundu yidi yipiisha bintu abi to, kadi kukangulaye dicyuwa adi ne kufunyikaye dibuki adi mu dicyuwa amu. Aci cyumba cimana bwalu abu.

71 Piine apu, muntu mukwabo uvwa muswe kulwa mwena Kilisto, kadi kuteetaye ne mwende mwònsò. Kwelaye mbila kùdi Mukalenge. Kucilekelaye, munda mwa mbingu yibidi anyi yisatu. Kadi mmwenze anu walukila mu yêyè anyi, mu ngiikadilu awu, kujimijaye lungenyi. Kadi kwalukilaye mu yêyè, ne kudisanganaye ùkaadi mu bulà bwa kumfundu kwa nzubu, munkaci mwa kutuuta bintu pa kalatalata, mujimije lungenyi. Kubwelaye mu nzubu lubilu, lukasalukasa, ne kutwaye byanza pa mici yende ya mfwanka ayi, e kupwitaye dibuki dijima kumana kumpala kwa kupatukaye mu nzubu amu diloolo adi, anu umusha ewu mucu ku mishiku wasa mukwabo. Nwamonu anyi?

72 Umwe uvwa mubiikidiibwe. “Muntu nansha umwe kèna mwa kulwa kùNdi pàdi Taatù Wanyi kayi mumukoke dyambedi to, ne bônso bàdi Taatù muMpeeshe nebalwe kùNdi.” Didimwija divwa dyumvwija cinyi? Divwa Mwoyi, kùdi umwe. Yêyè wakaWumona. Kwêna mwa kuCimonaku pàdi Nzambi kayi mukubuulwileCi to. “Ncisokoka ku mèsù, a beena meeji ne batalame, kadi cibulwila bânà bàdi baswe kuyiila.” Ncya bushuwa.

73 Amram ne Yokebeda baakamanya ne dîbà dyakakumbana. Dîbà dikaavwa pabwîpî.

74 Nenku ndi muswe kwamba bwalu ebu pâncidi ngaakulapu apa. “Kî ng’ewu udi muswe, anyi ewu udi unyeema to; Nzambi ngudi uleeja luse.” Ncya bushuwa. N’Nzambi.

75 Pa nanku, leelu ewu...Kaa, eci cîpwekèku too ne mu ndondo! Byòbi ne, leelu ewu, Nzambi mmukubiikile, ne wêwè kutapuluka ne maalu a pa buloba, ne bukole bwa Nzambi bwa butumbi bukujidile ku biine bintu abi, s’bivwa bikengela wêwè kwikala muntu mutambe kwikala wa disanka udikù pa buloba’s. Kuvwa miliyò yîvwà mifwanyine kucyenza bu

yôyi ne mushindu, kadi kabeena mwa kucyenza to. Kwikala naaci kî mbwabo bôbò to. Dituku ndyôdi edi didi Ekeleeziya ubiikidiibwa bwa kupatuka, utapuludiibwa. Mbishiilangane, ne mùvwàbi pa ciibidilu. Eyowa.

<sup>76</sup> Bantu pààkabangàbo kusambila, Izaleela pààkabangàye kusambila bwa muprofeta, Nzambi uvwa ne muprofeta awu. Nzambi uvwa ne muprofeta awu, kwônsò aku, bwalu Nzambi ùtu misangu yônsò anu ubadyanjidila. Yèyè ukaavwa ne muntu awu mumana kulongolola, kadi Yèyè uvwa mwindile bwa bantu kuditwabo mu disambila, bwa bantu kucijingabo.

<sup>77</sup> Mushindu mwine wûndi mufwanyine kwamba mùdi aci ciikàle ne ngiikadilu ya leelu ewu's we! Cidi citùkèngelà leelu ewu kî mmwenji wa matabuluja to, kî mmuntu mukwabo kampanda wa kutuma ku bulongolodi kampanda bwa bunene, udi ufikisha bisumbu byônsò ku didilongolola kaaba kamwe to. Cidi citùkèngelà leelu ewu mmuprofeta mutuma kùdi Nzambi, mwikàle ne Mukenji wikalà mwa kupiisha baa pa buloba. Nzambi udi mwa kwikala ne muntu awu, bu bantu biikàle anu badilongolole bwa cyôci aci. Nwênù's nudi bamanye cîndi ngamba aci. Yèyè, pàmwàpa, ukaadi nende mwaba kampanda pa buloba, kadi bidi bikengela bwa bantu bàcijingè. Yèyè Nzambi kàtu anu uminyishangana bintu ku bukole. Bikengela nwênù nùcijingè. "Baa disanka ng'aba bàdi ne nzala ne nyoota ya bwakane, bwalu nebuujiibwe." Ncya bushuwa.

<sup>78</sup> Paanyima paa Mòsà mumane kujinguludiibwa . . . Paanyima paa bantu's we, eyowa, bamane kumanya ne bivwa bibakengela mulombodi, baakabanga kusambila. Baakabanga kusambila bwa Nzambi kubatuminaYe mulombodi, anyi muntu kampanda bwa kubapatulaye. Ki kubatuminaYe muntu, muprofeta. Ki civwà cimanyinu Cyende ncyôci aci. Mpindyewu, bu ne mwine muntu ewu kavwa muprofeta to, bu ne yèyè wakajuuka, kwamba ne: "Mèmè's ndi kampanda wa meeji a mapitepite wa mu busalaayi," Izaleela's uvwa ne bukenji bwa kubenga kwitabuuja muntu awu. Bwalu, Nzambi, mu cikondo cyônsò, kabiyi bìpangilakù to, ùtu ùtùma muprofeta. Anji nteelelaayiku musangu umwepele mu Bible wùkaadiku aci cyenzeke. Citu misangu yônsò anu muprofeta utuYe utuma ne EMU MMUDI MUKALENGE WAMBA.

<sup>79</sup> Nansha Davidi, yèyè mwine, uvwa wa meeji a mapitepite wa mu busalaayi ukààvwakù Izaleela mupete awu, kadi, nansha nanku, Davidi's uvwa muprofeta. Cya bushuwa, ki civwaye. Yèyè uvwa muprofeta, Davidi awu.

<sup>80</sup> Yèyè uvwa mwindile bwa bantu kupetabo dijinga munda mwa myoyi yabo dya kuteelejabo muprofeta uvwaYe ne cya kutuma awu.

Mu bushuwa bwa bwalu, kuvwa musùmbà wa bàvwà bamba ne bavwa naadi, kadi kabayi naadi to. Byakajaadikiibwa

pashiishe ne kabavwa babinge to. Bavwa anu balunduke cyanaana mu disaluka. Ne Bible mmwambe ne: “Musumbà wa bantu basambakane wakaya naabo.” Cyàkenzàci ncinganyi? Cyakatwala ndululu mu cipeela amu. Ne musangu wònsò, cidikà cidi cyenjiibwa. Kaa, ndi njinga ne ngikalapù mwa kwenza ne eci cipwekeku, bimpè. Musangu wònsò ùdì anu Nzambi utuma cintu kampanda, kudi ditentula kampanda dya cyòcì aci, dya cimpicimpi, dya mu musunya, diya pamwe naaci. Musangu wònsò, misangu yònsò cintu kampanda, bwa kudingidija bu bàdì baciitabuuja; aci citu cipeta mwaba pamwe ne bantu anu bilenga ebi.

Kadi muprofeta mushuwashuwale wa Nzambi yêyè ùtu ushaala ne EMU MMUDI MUKALENGE WAMBA. Yêyè kaakutentemukaku kushiya Mufundu awu to pìikalàye mutuma kùdì Nzambi.

<sup>81</sup> Mòsà wakashaala menemene anu pa Mufundu. Nzambi wakamba ne: “Mémè nêmbàpàtùlè.” KwambilaYe Mòsà ne: “Ndi mukutume wêwè bwa kwenza mudimu awu.” Ki Mòsà kupetaye dilabula kampanda. Yêyè uvwa mutuutakeene ne Nzambi. Ùvwa ne Dìyì dya Mukalenge.

<sup>82</sup> Kabingila kàdì Nzambi utumina baprofeta mbwalu badi ne Dìyì dya Mukalenge. Dìyì dya Mukalenge ditu dilwa kùdì baprofeta. Nenku yêyè kayi ne Dìyì dya Mukalenge to, dîbà adi kî mmutuprofeta nansha.

<sup>83</sup> Kudi matentula a mu musunya bùngì cyanaana àdì àteetà kwamba ne bôbò mbaprofeta, munda mwa bikondo byònsò, kadi bàtu misangu yònsò anu baseesuka ku Dìyì dya Mukalenge. Kadi muprofeta mulelela yêyè ùtu ushaala menemene anu pa Dìyì. Mpindyewu, kanùpu mwoyi dîyì dyamba adi to. Muprofeta mulelela ùtu ushaala ne EMU MMUDI MUKALENGE WAMBA.

<sup>84</sup> Yesu mmutudimwije bwa cìvwà mwa kwenzeka mu matuku a ndekeelu. Kadi mu—musadidi mulelela yêyè, muprofeta mulelela, kacya kàtukù upangila mwa kushaala ne EMU MMUDI MUKALENGE WAMBA to.

<sup>85</sup> Mòsà wakashaala ne Mukalenge. Yêyè uvwa cimanyinu. Ùvwa cimanyinu kùdì Izaleela cya ne dituku dyabo dya disungidiibwa dikaavwa pabwîpì, ne yêyè uvwa cimanyinu kùdì Ejipitu, cya ne dituku dya ndekeelu wabo dikaavwa pabwîpì. Bwalu, bôbò baakafwa mu mâyi mu Mbû Mukunze amu, pashiishe, cilwilu cijima cya Pâlò aci. Bakaavwa ku ndekeelu wa bukole bwabo bwa busalaayi, ne muprofeta kampanda mwikàle cimanyinu cya ndekeelu wa ditunga.

<sup>86</sup> Anji elaayi meeji ku bwalu abu, mushindu mwine wùdì Nzambi munene awu, ne mu bupwekele bwine mùdìYe ukwacila mudimu amu. Cya bushuwa, pìikalà bàdì kabayi balonge tulaasa mwa kucyumvwa, bàdì balonge tulaasa's bivwa bikengela

kucyumvabo. Amen. Piikalà bapika mu biina bya bitoci bya mu Ejipitu abi bafwanyine kuumvwa ne yèyè awu uvwa mmuprofeta wa kùdi Nzambi, ne dîbà dikaavwa pabwîpi, kadi ambaayaaku tûng mùvwàbi kabiyi bikengela bwa baa mu nzubu wa bukalenge wa Pâlò kucimanyabo. Kadi biine baa mushindu awu abu ki bàdi kabayi bacimanya to. Baa mushindu awu's ki bàtù bacipangila, misangu yònsò. Pàdi cyôci aci . . .

<sup>87</sup> Mòsà uvwa wimana, utangidila pa madidiishi awu, utangila bânà baa Izaleela abu munkaci mwa kupicila mwaba awu. Bwa Izaleela . . . Bwa Pâlò, bavwa mbapika ne mbwa. Bwa Mòsà yèyè, bavwa mbasungula baa Nzambi. Bible mmwambe, ne: “Mòsà wakasungula,” wàkenza disungula dyende yèyè mwine, “bwa kukenga bwa bundu bwa Kilisto, ububala bu mabanji manene kutamba bisankasanka bya mpekaatu, bwalu wàkapeta difutu bu matapishi.” Mòsà uvwa mumanye ne bôbò abu kabavwa basopi baa bitoci to; bavwa ncisamba ciikàle ne mulayi.

<sup>88</sup> Yèyè mwine, ùvwa mumanye ne ùvwa nganyi. Kavwa mwa kubambila to. Bivwa bikengela bwa kudijingulwilabo cyôci aci, bôbò nkaayaabo. Yèyè uvwa mumanye, yèyè mwine, civwà mudimu wende, civwà—civwà—cikèngelà kwenza. Ùvwa mumanye ne Nzambi uvwa mumujuule yèyè bwa kiipacila aku, kadi kavwa mwa kubambila to. Bu muvwabo mpofo ku cyôci aci, yèyè kaakadisokololaku yèyè mwine patooke to, too ne paakafikabo ku dicijingulula. Dîbà adi, baakamona cimanyinu aci, ne baakacimanya.

<sup>89</sup> Yèyè wakamba ne: “Némpeeshè Izaleela cimanyinu. Angata dikombo edi; ùdyândàmùnè dilwe nyoka. Bôbò kabayi baswe kuteeleja aci to, dîbà adi uteeke cyanza cyebe mu cyàdi, uciapatule, ùdyôndòpè wèwè mwine nsudi ayi, dîbà adi nebàcītàbùùjè. Ne pashiishe, bôbò kabayi baswe kuciteeleja to, wangate màyi a mu musulu wa Nil mwamwa, ùàmwangè panshi pa buloba bûme, ne màyi ónsò awu neandamuke mashi.” Aci civwa ncimanyinu bwa ditunga. Cisamba cyôci necicitàbùùjè. Dîbà adi, bàdi badilongolole bwa kucyakidila nebàcītàbùùjè paamonabo cimanyinu cya Nzambi cikwata mudimu, kadi bidi bikengela bwa ditunga dyôdi dipete cintu kampanda cya cishiilangane. Pa nanku, Yèyè wakadipeesha dyònsò dijima cimanyinu.

<sup>90</sup> Nzambi wakakwata mudimu ne muntu kampanda, muntu mudipwekeshe, muprofeta, bwa kwikalaye cimanyinu cya ndekeelu wa ngiikadilu wa ditunga awu kuntwaku. Nzambi, tûtùminèku mukwabo's. Tùjuudilèku mukwabo. Bu bantu baa Nzambi mwa kuditwaku mu disambila bwa cya nanku awu, Yèyè's mmufwanyine kumujuula. Cidi ne, bidi bikengela bwa bantu bàpetè bujitu abu. Bidi bikengela bwa bàtabulukè. Bidi bikengela bwa bàfikè ku dimanya. Bidi bikengela bwa bamanye

ne mmu dituku kaayi mutùdì ne mwoyi emu, ne mmalu kaayi àdì matunyungulukile, kumpala mene kwa bôbô kutabuluka.

Nwènù nudi batungunuke ne kwikala ne nsòmbelu anu unuwva nende misangu yònsò awu. “Bikengela ngiibake nzubu mupyamupya cidimu eci. Bikengela mpete kashinyi kalenga katambe kaa ba-Jones. Bikengela ngènzè *cikampanda*.” Kaa, didifila dinene nunku ku byòbì *ebi!* Paudi ufika ku dyumvwa, nansha byòbì ne. . . Abi bidi anu bimpè. Kadi udi ne cya kufika ku dyumvwa, wêwè mwanetu, ne bintu byònsò ebi nebibutuke.

Yesu mmwambe ne: “Kanuciinyi ewu udi mwa kushipa mubidi,” bombe bwa mushinda bwa Russie. Kanuciinyi ewu udi mufwanyine kushipa mubidi ewu kuwushiya lupwishi lwa volcan, mu tusunsa tukese awu to, “kadi nuciine Ewu udi mwa kuvwija mubidi mu mushindu awu kadi kukùpa musuuka mu inferno.” Ki bwalu mbwòbù abu.

<sup>91</sup> Pàmvwà nyiikilangana ne ngangabuka kampanda, mu lupitaadi pàvwà mààmù usanganyiibwamu apu, yêyè uvwa ulonda mùdì maalu a mamanya miikàle akemsha, bwa dyenzela dya mudimu pa bitupa bishiileshilangane bya mubidi, ne dyelamu dya manga, ne kumona ne mbwa cinyi àvwà mafwanyine kushipa kishi kampanda, ne kusungila mutoloku wa mwoyi. Mémè kwamba ne: “Abi mbilenga bya dikema. Abi’s bidi anu bimpè be.” Mémè kumuteeleja katanci. Kadi mémè kwamba ne: “Ngangabuka, abi mbimpè. Ndi ngaanyisha aci. Abi mbilenga bya dikema. Ndi—ndi cya bushuwa ne kusakidila kùdì Nzambi bwa cyòcì aci. Kadi, tangila, nudi nupicishila matuku enu ónsò a mwoyi ku diteeta bwa kupeta cintu kampanda pa bufuki kampanda. Kadi mbwa cinyi kanuyiku mwa kwelangana meeji pa Mwine wàkabùfùka awu, Mwine wàkabwènga awu, Mwine udi Mubwibaki awu? Nzambi’s ngudi Mubwibaki.”

Ambaayaaku tũng mwabenga Mufuki kwikala munene kutamba bufuki budiYe mwenze! Tudi tutamba kusuminyina pa bufuki mushindu awu bwa cinyi, patudi katuyiku twela meeji ku Mufuki Wàkenza maulu ne buloba, ne kwenza mubidi ne mwoyi? Yêyè’s udi mwa kuwubutula díbà kana dyònsò didiYe mwa kujinga, bwalu mBwende Yêyè.

<sup>92</sup> Eci cidi cilwa cintu cilenga cya dikema, bwa kwenzela mudimu pa mubidi wa muntu. Tudi twanyisha cyòcì aci. Badi mwa kutentemuna dîsù, kudyumusha pa muntu kudyela mukwabo; kwangata tujilu tukese menemene atu, ne kujoomona dîsù dya muntu mu cimpòkòmpòkò cyàdì ne kudyela mu cimpòkòmpòkò cya mukwabo muntu, ne muntu awu upeta mwa kumwenena ku dîsù adi. Aci’s ncintu cilenga cya dikema.

<sup>93</sup> Pa ciibidilu bivwa ne, maamù, pavwaye ne cya kulela mwànà, ne—ne pàvwàbi ne kakuvwa mushindu wa mwànà kulediibwaye to, maamù awu uvwa—uvwa mwenjiibwa nunku, pàvwàbi ne kakuvwa mushindu wa mwànà awu kulediibwaye to:

maamù ne mwânà, bônso babidi, bavwa bafwa. Aci civwa cya bushuwa. Kadi bikaadi mpuukapuuka menemene bwa nwèù kucyumvwaku, byakashiilangana, pàmwâpa kabiciyiku nanshà to. Kadi leelu ewu badi mwa kwangata maamù awu paanyima paa mumane kwikala mu ngiikadilu wa kulela mwânà, ne byòbì ne. . . pàcìdì anu maamù pamwe ne bikondo bya kulelaye mwânà apu, yêyè. . . badi mwa kuya ne maamù awu mu cibambalu kampanda ne kumutwa ndambu wa manga a dibenga kusaamisha, kadi kusabula mwânà awu, kwenzeja dilela dyetu dya pa ciibidilu edi, kupatula mwânà awu. Tudi twanyisha aci.

<sup>94</sup> Ngambilaayiku ndongolwelu umwepele. Paudi ujìka cijìkù mu mwaba kampanda, mu ndongolwelu wa milonda ya mâyi mu cimenga, tangila umone cidì cyènzekà, ku cijìkù cya cinene aci. S'udi uwutaayisha's.

Kadi, pààbì, tudi mwa kukosa mukolo, kukosa diboko, kadi, ku cishima cya Nzambi, Yèyè neacinguluje mashi awu ùàyiishila njila kampanda mukwabo, mu katanci kaa kasunsukila kaa kasunsa, ne ùàpicishila njila kampanda mukwabo. Nudi nusungila mwoyi wa muntu awu. Udiku mwa kwenza ciine aci nganyi? Nungambilaayi.

<sup>95</sup> Ukose mulonda munene, ukose njila munene apa mwaba kampanda mu mâyi, padiwu apwidijiibwa lwà ku cijìkù aku apu. Neènzè cinyi? Uciteetebi musangu umwe kadi ujandule cidì cyènzekà. Kakwena mukwabo njila wa kucingulukilawu to. Cidi ne cya kutaayika kadi kwalukila ku cijìkù.

Bu Nzambi kayi mwenze njila wa mashi aa kucingulukilawu wòwò miine to, dyakamwe, dyalukila anu dimwepele dya ku mwoyi peebe umba ufwa. Musangu wònsò wùdì anu mukwacike ku munu awu, civwa ndufu, dyakamwe. Musangu wònsò wùdì anu muditape mwaba kampanda awu, civwa cikangule njila ku mujilu munene anyi cintu kampanda, cifwanyine kwikala lufu, dyakamwe. Udikosa munu, udi mufwanyine kufwa. Kwajiki. Ncifwanyine kwalukila ne kubwayikila cyakabidi mu mwoyi webe amu. Ncifwanyine kukushebeya. Kadi Nzambi. . .

<sup>96</sup> Mpindyewu, tudi twela meeji ne mbilenga bya dikema. Tudi twela meeji ne mbilenga bya dikema. Nenku tudi twanyisha mushindu wùdì maalù a mamanya menze awu, badi mwa kuswikakaja mijilu minene ayi ne kupangisha mashi bwa kuzololokelamu. Biine byònsò abi's mbilenga. Kadi Nganyi Yèyè Utu mwibake ciine aci awu? Nwamonu anyi? Tudi tutangila pa bufuki bwònsò kadi tupwa mwoyi Mufuki wabu. Nwamonu anyi? Tudi tutangila bintu bya mubidi, kadi tupwa mwoyi cintu cyònsò—cya nyuma. Ki citudi twètù twenza's.

<sup>97</sup> Mpindyewu, bapofeta baa Nzambi, bôbò badi. . . badi ne Dìyi Dyende. Ki bwa cinyi bantu badi babitabuuja.

Ki bwa cinyi Nzambi wakambila Mòsà, Yèyè mmwambe mu Genese mwamwa, byàbùngi, mu Ekesoode, ku ntwadijilu too ne ku ndekeelu ne: “Kwòkò kulwe muntu munkaci mwenu, udi wa nyuma, anyi, muprofeta . . .” “Mpindyewu netumanye bintu ebi munyi?” Yèyè kwamba ne: “Padiye wamba cintu kampanda ne cyòci cyenzeka, wamba cintu kampanda cikwabo, cyenzeka, dîbà adi nùcîtàbùùjaayi.” Nwamonu anyi? Aci ncimanyinu kampanda.

<sup>98</sup> Pa nanku Yèyè udi ufila Dîyì Dyende, kî nkùdì balombodi nansha, kî nkùdì bamfumu baa cimbambila nansha, kadi nkùdì baprofeta. Khrushchev kî ncimanyinu kùdì baa pa buloba nansha. To, mukalenge. Hitler kavwa cimanyinu kùdì baa pa buloba nansha. Kadi mu mwaba kampanda, kaaba kampanda, Nzambi udi ne muprofeta mudipwekeshe mwindile diine dîbà adi. Yèyè ki cimanyinu aci. Yèyè ki cimanyinu cyàpiishà baa pa buloba ne kusungila Ekeleeziya. Muprofeta!

<sup>99</sup> Eliya uvwa cimanyinu mu dituku dyende, muprofeta Eliya. Kùdì . . .

Yèyè uvwa mupro-. . .yèyè uvwa cimanyinu cya Dîyì dya Nzambi, cilumbulwidi kùdì Ejipitu ne disungidiibwa kùdì Izaleela, pìikalàbi ne bòbò bavwa baswe kumwitabuujà.

<sup>100</sup> Dituku dibi dya Eliya adi, Izaleela mujima paakeelaye Nzambi nyima, baakaalukila mu mpekaatu. Baakapwa mwoyi dîyì dituma. Baakapwa mwoyi mwakabalombola Nzambi bwa kubapatula, ne Yehowah munene wákakàngula Mbû Mukunze awu, ne kubapatula mu Ejipitu, ne muprofeta munene bu Mòsà awu munkaci mwabo. Bakaavwa bacipwe mwoyi.

Twètù tutu tucipwa mwoyi. Nwènù ba-Méthodistes nudi nupwa John Wesley mwoyi. Nwènù ba-Luthériens nudi nupwa Martin Luther mwoyi. Nwènù ba-Bptistes nudi nupwa John Smith mwoyi. Bààbùngi baa kutudi badi bapwa Charles Finney mwoyi, mutambe bunene wa ku bònsò abu.

<sup>101</sup> Mbambe ne makumi citeema ne mwandamutekete pa lukama a bàvwà Finney mukudimwishe mucima baakashaala bananukile. Makumi mwandamutekete ne bataanu pa lukama baa Moody baakatwa cìmpìngà mu cidimu cimwe. Ne baa Wesley, kasumbu kaa beena cijila aku, baakaya benda batwa cìmpìngà ku musangu ne ku musangu. Kadi Finney yèyè wakapeta makumi citeema ne mwandamutekete pa lukama. Kaamuntu kàà katupa, kàà kanyìkanyì, kanyaanunukangane kònsò, kaa mutu dîbàla aku kàvwà kàpàtuka kàbànda mu cyambilu ne kàtàngila bateeleji abu, mushindu *ewu*, ne bantu bamba kuuminyina, bwalu yèyè wakashaala mu bisuku dîngà dituku too ne pàvwà Nyuma Mwîmpè mumupye. Mmwakenzeeye. Yèyè uvwa cimanyinu, kukaadi bidimu bitwe ku nkama yibidi, cya ndekeelu wa ditabuluja dinene divwà Wesley ne bakwabo abu benze adi, ne cilumbulwidi cìvwà cilwa aci.

<sup>102</sup> Yèyè, uvwa cimanyinu kùdì lukongo lubi alu. Ne mushindu mwine ùvwa Eliya mwa kwimana mwaba awu, ne bukitsu ne disù dyumisha, nkaayende, muntu nansha umwe kayi nende to, kadi yèyè uvwa cimanyinu cya Nzambi.

Bakwabo baa ku balombodi baa ntendeleelu, bakaavwa bônso balonde Aakaba mu njila wa cyena-leelu awu. Bakaavwa bashaale baa cyena-leelu mu lukongo alu. Kadi mushindu mwine wùvwà mukulumpe Aakaba, anyi, mukulumpe Aakaba, ne mabanji ende manene ônsò akaavwaye mudikungwijile awu, ne ciine aci kubwejaci ekeleeziya mujima mu cyena Katoli-... , anyi, kî mmu cyena Katolike to, kadi mu cintu anu bu cyôci cimwecimwe aci: mu dikuukwila dya mpingu. Cikaavwa cikabafikishe mu mwaba wa bashààle batwa eku batwa eku. Bamwe bakaavwa mwa kukuukwila mushindu *ewu*, anu budiikadidi menemene ne: “Nudi mwa kwenza cyônsò cinudi baswe kwenza aci.” Kadi ki kubwelabo mu ngiikadilu wa mushindu awu’s.

<sup>103</sup> Kadi mushindu mwine wàkiimanà Eliya mwaba awu’s, ne bukitsu, mwikàle ne EMU MMUDI MUKALENGE WAMBA. Éyì Nzambi wa yààyà, tùpèèshèku bantu baa nanku’s. Yèyè kavwa ne bwôwà bwa kwambila Izabela bwa ngiikadilu wende awu to. Kavwaku yèyè ne bwôwà bwa Aakaba to. Kaakaciinaku ne nkwepi kwikalaye mutupakane to. Yèyè wakiimana ne bukitsu, ne wakaya tamakatamaka too ne kùdì Aakaba ne wakamba ne: “Nansha mene lumuma kalwakumataku to anu mèmè mulubiikile.” Amen.

<sup>104</sup> Yèyè uvwa cinyi? Cimanyinu kùdì lukongo lubi alu. Izaleela wakacimona anyi? To. Bôbò baakamuseka, baakamwelulwila.

Yèyè wakadyanjila kwamba ne nekwikalè mushipu, ne nekwikalè—nekwikalè lutatu, nzala, ciyoole cya nzala. Nenku yèyè wakamba ciprofeta ne bukitsu bwônso, mwimane paa nkaayende, mwikàle ne EMU MMUDI MUKALENGE WAMBA. Yèyè kwamba ne: “Mukalenge, baashebeyi beena lulamatu bábàjikiji bônso. Bábàshebeyi bônso bábàjikiji. Mèmè ki umwepele udi mushaale, udi mwimane ne Dìyì Dyebe.” Lutatu luvwa pa cinyi? Dìyì dya Nzambi. Eliya uvwa muswe kushaala ne Dìyì. Yèyè guvwa muprofeta mulelela.

<sup>105</sup> Baprofeta bakwabo bavwa bambe ne: “Kaa, ee, kabyena byenza dishiilangana dyàbùngì to. Yehowah kèna ubitanga to, nudi bamanye’s.”

Yehowah’s udi ubitanga. Bidi bikengela ciikalè Dìyì Dyende. Ki Eliya kwimanaye ne bukitsu bwônso pa Dìyì adi, mwikàle ne EMU MMUDI MUKALENGE WAMBA. Nzambi kumulaswila kaamunsokontu kakese, dîngà dituku. KwambaYe ne: “Ndi naabo binunu mwandamutekete, Eliya, baudi wèwè mwikàle ntemu wabo, kaaba aka. Kabeena ne dikima dikumbane bwa kupatuka bwa kucyamba to. Mbasokomene mu bisuku. Kadi,



nansha nanku, munda mwa myoyi yabo, bôbò abu mbasadidi Baanyi padibo apu. Kî mbatwile ba-Baala cinù to. Badi baciina bwa kumanyika. Kadi, Ndi nkupeesha wêwè cimanyinu, ne wêwè udi cimanyinu. Imana kwaka, mwikàle mwimane pa Dîyì Dyanyi. Mémè nênkucyùkè. Ubapeeshe cimanyinu.” Aleluuyah!

Nzambi, tûtùmìnèku cintu kampanda cya nanku awu, muntu wíkala cimanyinu cya Dîyì dya Nzambi. Ne mulayi wònsò ukaadiku Nzambi mulaye newutwibwe nyama ku mikolo mu muntu awu, bwalu yêyè udi cimanyinu, cimanyinu cìdìbo bapwe mwoyi.

<sup>106</sup> Kaa, bôbò bavwa badyambidila ne, bwalu Aakaba uvwa mfumu munene ne matunga ônsò amuciina, aci civwaku cikumbane. Kadi Eliya’s nguvwa cimanyinu cya Dîyì. Ki muprofeta mulelela nyêyè awu, cimanyinu cya Dîyì. Nenku pavwaye cimanyinu cya Dîyì apu, bôbò kabavwa bamwitabuuja to. Kavwa ne dikwacisha nansha dikese kùdìbo to.

<sup>107</sup> Yêyè uvwa cimanyinu kùdì mukaji mukamba awu, pàvwà Nzambi mumutume paakuumukaye ku Mukuna wa Kaamèlè apu, paakuumukaye ku...ku kasulu kaa Keelità apu. KumutumaYe kwôkò aku, paanyima paa yêyè mumane kudiishibwa kùdì bikololo, ne kasulu kamane kuuma. Kuyaye too ne kwa mukaji mukamba ewu. Mwaba kaayi wa muyiishi kuyaye’s we! Kadi wàkayakù bwalu Nzambi ngwàkamwambila bwa kukùyayè.

Kadi Yêyè wàkayakù, kwamba ne: “Ndi mumutumine dîyì bwa kukudiishaye.”

<sup>108</sup> Bivwa bikengela bwa mukaji awu kwikalaye cimanyinu’s. Bivwa bikengela bwa Eliya kwikalaye cimanyinu. Dîbà adi, pàvwà mukaji awu kuntwaku apu, ùvwa ne bukula búngì bukumbane anu bwa kwenzaye kàtò kamwe, bwa yêyè ne mwanende wa balume kudyabo. Kàsù kakumbane bwa...Ne maanyi búngì bukumbane mu kàsù, bwa kwenza ndambu wa mafuta, a disopa naawu. Yêyè ne: “Ndi mupatuke mwab’ewu mbwà kwangula tukunyi tubidi.”

<sup>109</sup> Mu dinda dya dikwàcisha bwôwà, dya luuya lukole, lwa lufyondola mbwa makoba adi, dyàkapàtukà kwaka muntu mukulakaji ne mmwenekelu wa kwìsù kutoloke myòsà, mvya mimupwekele paanyima, ne mutu dibàla ùbàlakana, mweyemene ku ciibi cya lupangu, wamba ne: “Ntwàdìlèku ndambu mukese wa mâyì a kunwa,” kwambaye kabidi ne, “pa kuumusha aci, untwadileku cipese cya cyakudya mu cyanza cyebe amu, kàtò.”

<sup>110</sup> Mukaji awu kwambaye ne: “Ncyêna ne bukula búngì bukumbane to. Ndi mupatuke mwab’ewu mpindyewu, mbwà kwangula tukunyi tubidi, bwa kwenza kàtò kakese kamwe bwa mwanaanyi wa balume. Ndi ne tukula anu búngì bukumbane

bwa kukènta kamwepele bwende yêyè ne mêmè. Netwikalè mwa kukàdya kadi tufwe.”

<sup>111</sup> Yêyè kwamba ne: “Kuciinyi nansha, bwalu, EMU MMUDI MUKALENGE WAMBA.” Muntu udi utukengela’s ki yêyè awu. Kabivwa bya ne: “Mpindyewu, cìdi *mwa* kwenzeka’s, mwaneetu wa bakaji. *Ncifwanyine* kwenzeka. Ncyêna mumanye” to. To, to. Eliya uvwa mutwishiiabwe. “EMU MMUDI MUKALENGE WAMBA. Cipanza aci kacyakushaala munda mutupu, anyi kàsù aku kakaakushaala munda mutupu to, too ne ku dituku dyatuma Nzambi mvula pa buloba.” Amen. S’ki bwalu abu’s. Aci’s civwa ne cya kwikala cimanyinu cikumbane bwa mukaji awu.

<sup>112</sup> Mukaji awu udi cimfwanyi cya ekeleeziya leelu ewu. Paanyima paa Eliya mumane kushaala nende ndambu wa cikondo. . . Yêyè uvwa ne mwânà wa balume mutekete. Mwânà awu kusaamaye. Disaamà dyende dyakakola mu mushindu wa ne kakwakashaala kabidi mweyelu munda mwende to. Kufwaye. Dìbà adi mukaji awu wakenza cinyi? Ekeleeziya’s ukaadi mumonemone bimanyinu abi. Kadi, cidi ne, pàdi anu kaadikenga kakese kaa cìmpicìmpi kadikuma anyi, lukasa ndwende kubangaye kudyula ekeleeziya bwa bwalu abu. Yêyè wakaswa bwa kudyula Eliya. Wàkamba ne: “Wêwè mulume wa Nzambi, mpindyewu udi mulwe mwab’ewu bwa kumvulwija mpekaatu yanyi ne kwangata mwoyi wa mwanaanyi.”

<sup>113</sup> Eliya kwangataye mwânà awu, kubàndayè mu nzubu wa kuulu muvwaye ulaala kuulu aku, kumulaadikaye pa bulaalu bwende yêyè, kudyadijaye pambidi pende, kwambaye ne: “Mukalenge Nzambi!” Aleluuyah! “Alujaku musuuka wa mwânà wa balume ewu.” Ki mwânà awu kubiikaye.

<sup>114</sup> Kwalukilaye nende panshi. Mukaji awu kutangilaye mwânà, ne pashiishe kumutangilaye yêyè, dìbà adi kumanyaye ne cintu kampana civwa cyenzeke mwab’awu. Kwambaye ne: “Ku eci ngaamanyi ne Dìyì dya Nzambi didi mukana mwebe.” Amen. Yêyè uvwa cimanyinu kùdi mukaji mukamba awu. Mmwenze anu umona bukole bwa Nzambi, Yêyè udi uvwija ne mwoyi anyi udi mwa kushipa awu, ujuula mwanende mufwe umwaluja ku mwoyi, kwambaye ne: “Ku eci ngaamanyi ne wêwè udi mulume wa Nzambi.” Yêyè wakacimanya.

Matunga leelu mmafwanyine kuciseka, anu mwakenzabo musangu awu. Kì mbafwanyine kuciitabuuja to. Kadi mukaji awu wakamanya bishiilangane. Civwa ncimanyinu dìbà adi, bu mùvwà muprofeta awu cimanyinu, bwa kujuula mwanende wa balume mufwe awu ne kumwaluja ku mwoyi. Baprofeta abu bàtu misangu yònsò anu bimanyinu bya Nzambi.

<sup>115</sup> Eliya paakalombaye diteetangana dya makanda musangu awu, wàkamba ne: “Pìikalàbi ne Nzambi udi Nzambi, mukwacilaayi Yêyè mudimu. Pìikalàbi ne Baala nanzambi, mukwacilaayi mudimu.”

Aci kî ncfwanyineku kwikala dituku dilenga bwa Eliya leelu ewu anyi? Piikalàbi ne cidiidi nnzambi, cikwacilaayi mudimu's. Citudi bapete mu cidiidi ncinyi? Citùdi benze ncinyi? Katwena ne citùdi bapete nansha cimwe to anu mushiki wa dinyanguka. Katwena ne citudi bapete nansha cimwe to.

Kadi tukaadi bajimije mulunda yònsò, pabwìpì ne yònsò utùvwà nende, mu matunga ònsò. Tangilaayi, lumingu lwàshàadi elu, tudi bajimije matunga makwabo abidi anyi asatu maye ku communisme. Tudi tufucisha bantu bitadi ne tupeta mfranga yabo, kadi tuyituma kwòkò aku bwa kudiisha biine bantu bàdi bàkùdimukilà ku communisme abu pàdìbo anu bashindama bilenga. S'ndubombo's. S'ncya bushuwa.

<sup>116</sup> Tutu twamba mutùdi beena Kilisto. Twikalaayi mùdi beena Kilisto, pa nanku, kabiyi ku dibadiisha dya bintu bya mushindu awu to. Aci cidi ne mushinga mukese be wùdi—wùdi. . . Muntu wetu wa ciibidilu wa mwoyi mwìmpè ewu's udi mwa kwenza cyòci aci. Aci's nntendeleelu. Aci kî ndupandu nansha.

Bantu bààbùngì menemene bàtu babwejakaja ntendeleelu ne lupandu. Ntendeleelu nkudiisha kwa bakaji bakamba ne bapele, ne bikwabo. Aci nntendeleelu. Kadi lupandu n'Dilediibwa dipyadiya, kwikala mulediibwe cyakabidi. Mbishiilangane. Ntendeleelu, ci-Muzulumanyi's nntendeleelu. Kudi ntendeleelu yàbùngì.

<sup>117</sup> Mpindyewu, kuulu kwa Mukuna wa Kaamèèlè kwaka, dituku adi paakalombaye diteetangana dya makanda, ne paakabiikilaye Aakaba ne binunu bya baakwidi bàvwà baa ku ntempelu wa mangumba abo abu, yèyè wakababiikila bwa kubàndabò kuulu kwa Mukuna wa Kaamèèlè, kwambaye ne: "Bàndaayi kuneeku. Lwàyi nutwilangane naanyi kuneeku. Mèmè nèncimunè musùmbà mujima." Cyakenzaye ncinyi? Yèyè uvwa ne EMU MMUDI MUKALENGE WAMBA. Kavwa ne bwòwà nansha. Wàkamba ne: "Lambulaayi cimpanga cya ngombe. Nusoke ba-Baala. Nzambi udi wandamwina ku kapyia awu ìkalè Nzambi."

<sup>118</sup> Pa nanku, dituku dijima adi, too ne. . . kuumukila anu ku dinda too ne paanyima paa dībà dya didya dya mundaamuunya, kutupikabo pa cyoshelu apu. Kuditapabo mputa ne mafuma. Kwelabo mbila ya mikole. Kwelabò mikunda. Eliya uvwa utwa kumpala utwa paanyima, kwambaye ne: "Elaayi mikunda mikole ndambu. Pàmwàpa nì mmuye ku lwendu lwa dikaloba mishipa, anyi cintu kampanda. Mmupatuke mukatungunuke ne bya dyenza, anyi cintu kampanda."

Bwalu, yèyè uvwa ne EMU MMUDI MUKALENGE WAMBA. Úvwà mutwishiibwe. Úvwà ne Dìyì dya Nzambi.

Mwaneetu wa balume, mwaneetu wa bakaji, ncinyi cikwabo cidi muntu ukengela citambe mulayi wa Nzambi? Nzambi's

ngudi mwambe ne Yêyè neàcyènzè. S'ng'Abraham. Wàkabala Nzambi ne uvwa ne bukole bwa kukumbaja cyakambaYe. Yêyè uvwa mumanye ne Nzambi uvwa mwa kucyenza, bwalu Nzambi ngwàkamba nanku.

<sup>119</sup> Pa nanku yêyè—pa nanku yêyè kubabiikila bwa kubàndabò kuulu kwa mukuna aku. Ki pashiishe bôbò kuditubula mibidi ne mafuma, ne kwelabo mikunda ne mbila mikole dituku dijima, too ne pa dîbà dya mulambu wa diloolo. Pashiishe, tangilaayi numone mwàkacyènzà Eliya. Cintu cya kumpala cyakenzaye civwa nkubunguluja mabwe dikumi ne abidi ne kuàtwangaja pamwe.

Nzambi kàtu mutapuluke to. Mangumba ngàdì atapulula maekeleeziya, kadi kî Nzambi to.

Umwe mwambe ne: “Udi mwena Kilisto anyi?”

<sup>120</sup> “Ndi Baptiste.” Pa nanku aci kî ncitambe cya mwambe ne wêwè udi ngulube to.

<sup>121</sup> Wàmba ne: “Ndi—ndi Méthodiste.” Ee, aci's cidi anu mùdì kwikala ngulube's, cyakabidi, bwa Nzambi.

<sup>122</sup> Ngamba ne: “Udi mwena Kilisto anyi?” Bwa kwikala mwena Kilisto, udi ne cya kwikala mufwanangane ne Kilisto, Bunzambi bwele ntenta munda mwebe, ne Nyuma Mwîmpè, wa bwena wàkapòna mu Dituku dya Mpenta awu. Kacyi disaluka kampanda to, kadi ndi muswe kwamba Mpenta wa cya bushuwa. Nwamonu anyi? Cya bushuwa.

<sup>123</sup> “Ndi mwena Mpenta. Ndi Unitaire. Ndi—ndi mwena busatu. Ndi . . .” Kaa, ekelekele! Aci's cidi anu mùdì kwamba ne udi cintu cikwabo kampanda. Kacyena ne cidici cyamba to bwa Nzambi. Aci cidi citapululangana.

<sup>124</sup> Aci ki cyàkenzekà kuntu kwaka munkaci mwa balombodi baa ntendelelu abu. Kadi Eliya wakabunguluja mabwe ônsò dikumi ne abidi awu ne kuàtwàngaja pamwe, bwa kuleeja ne Nzambi udi Nzambi umwepele kumutu kwabo bônsò, muàbùngùlùje ne muàtwàngaje ônsò pamwe.

<sup>125</sup> Pa nanku, paakamanaye kuàkùngwija ônsò kaaba kamwe mushindu awu, wàkashipa cimpanga cya ngombe e kuciteeka pamutu paa cyoshelu, pa nkunyi apu. Kwambaye ne: “Mpindyewu, bwa kwikala batwishiiibwe ne kakwena bya difwikakaja bwa kushimakajangana mu cyôci eci abi, ndaayi nukansunyine bipanza bya mâyi dikumi ne bibidi.” Ki yêyè kubolessa cya bushuwa nkunyi ayi ne mâyi bolabola. Kaa, Aleluuyah! Yêyè uvwa muswe kuleeja ne Nzambi uvwa Nzambi. Bwalu, bwa cinyi? Yêyè uvwa ne EMU MMUDI MUKALENGE WAMBA. Yêyè uvwa muprofeta. Úvwa ne Dîyì dya Nzambi.

<sup>126</sup> Ki mwakenzabo—mwakenzabo kabidi dituku adi, piikalàbo bamba ne nebakwipate mu ekeleeziya, nebènzè *cikampanda*, *cikansanga*, wêwè mubatijiiibwe mu Dînà dya Yesu, ne bintu

byònsò bishiileshiilangane ebi bya mushindu awu: macimbu. Cidi EMU MMUDI MUKALENGE WAMBA.

127 Muntu wa musangeelu, diloolo dikwabo, kuyiikilanganaye naanyi, kulwaye kungeela maboko kunshingu, ne kwambaye ne: “Mwaneetu Branham,” yêyè ne, “ndi muswe kukulombaku cintu kampanda.” Yêyè ne: “Bu wêwè mwa kudyaku cibanga ndambu, pa cintu cyûdi wamba eci.”

Mêmè kwamba ne: “Cinyi nanku?”

Yêyè ne: “Byònsò bya dibatiiza ebi’s.” Yêyè ne: “Ekeleeziya ya mu Chicago ne yònsò ya mu nyungulukilu ayi mmikujingè yamba kufwa, kadi badi baciina ne nkwèpi kuwalwa kuteela cyôci aci.”

128 Mêmè ne: “Bushuwa, nêncitèlèlè. Cya bushuwa, nêncitèlèlè.”

Yêyè ne: “Ee, aci ki cintu cimwepele’s cìdìbo bakubengela.”

129 Mêmè ne: “Dìbà adi kî mmêmè udibo babenga to. Kî mmêmè Uvwa muCyâmbè to. Nzambi’s ngudi muCyâmbè. Ndi ngeela yònsò wa kùdìbo kadyombo bwa alwe kunjaadikila mùdìCi cya mashimi.” Nwamonu anyi?

130 Yêyè ne: “Ee, udi umona’s, s’bivwa bikengela bwa wêwè—wêwè kwitabaku bwa kwenza bwobumwe.”

S’ncyôci cintu cimwecimwe aci cìwàbo baswe bwa yêyè kwenza. Amen. Nzambi kàtu udyà cibanga to. To, mukalenge. Yêyè kàtu udyà cibanga to.

Yêyè kwamba—yêyè kwamba ne: “Mpindyewu, Mwaneetu Branham, ndi muswe nkukonkeku cintu kampanda. Mwanjelo wa Mukalenge ewu uvwaku. . .” Yêyè ne: “Twètù bònsò tudi twitabuuja Mwanjelo wa Mukalenge. Mwanjelo wa Mukalenge ngudi mukwambile Cyôci eci anyi?”

131 Mêmè ne: “Cìdì Mwanjelo wa Mukalenge mufwanyine kwamba nansha ciikàlè cinganyi. Cyôci aci, Mwanjelo wa Mukalenge, Yêyè neâmbè *Cyôci aci*. Kadi bu Yêyè mwambe cintu kampanda cya cibengangane, Yêyè kavwa Mwanjelo wa Mukalenge to.” Mêmè ne: “Nansha ciikàlâ Mwanjelo, anyi cintu kampanda cikwabo cyambe, Pòlò mmwambe ne: ‘Nansha Mwanjelo wa mu Dyulu munuyiishe evanjeeliyo mukwabo nansha wa bishi, ediibwe mulawu.’”

132 Banjelo ne bantu bònsò, cintu kampanda cya musunya cyûle tente ne maditambishi, cyâmba bwa Banjelo. Joseph Smith, Brigham Young, ne tusumbusumbu twònsò tushiileshiilangane atu, twa ba-Adventistes ne bikwabo byònsò atu, badi bamona bintu bya mishindu yònsò bya nanku awu, kadi bidi misangu yònsò anu bibengangane ne Dîyi.

133 Kadi, Nzambi ùtu utwa Dîyi Dyende nyama ku mikolo. N’Dîyi Dyende. Mêmè kwamba ne: “N’Dîyi dya Mukalenge. Bushuwa. Cyònsò cînkaadiku mêmè ewu mumanye cìtu cindongesha kudiYe. Kacya mêmè nçitukù muye ku seminere

anyi ku cilongelu kampanda to. Cidi cifumina kudiYe.” Kadi mèmè kwamba ne: “Nansha ciikàlè cibengangane... Bu ne civwa cibengangana ne Aci, ncivwa mwa kuMwitabuujuaku to. Bwalu, n’Dìyì dya Nzambi, ki dìdì kumpala. Bikwabo byònsò bìikalè mashimi.” Dìyì dya Nzambi, shaalaayi naaDi.

<sup>134</sup> Pa nanku, Eliya, paakajikijaye, wàkabolesha ne mâyì mici yònsò ayi bolabola myaba yònsò, ne bipanza dikumi ne bibidi bya mâyì. Kuàpòngolwelayè pamutu pònsò apu. Kupatukaye mwab’awu, mutuuje ne mwende mwònsò. Bwa cinyi? Nzambi kàtu mwa kushima nansha. Nzambi ngwàkamwambila. Kwambaye ne: “Mukalenge Nzambi wa Abraham, wa Izaka ne wa Izaleela, bimanyiibwe leelu ewu ne Wèwè ki Nzambi, ne mèmè ndi musadidi Webe. Ne mèmè ndi mwenze cyòci eci ku dìyì Dyebe dituma, bwalu cidi EMU MMUDI MUKALENGE WAMBA. Ndi mwenze cyòci eci bwalu Wèwè ngudi mungambile bwa kucyenza, bwalu mbilondeshile Dìyì Dyebe. Bimanyiibwe mpindyewu ne Wèwè ki Nzambi.”

Ki Kapyà kaa Mukalenge kumataku, kwoshaku mulambu ne kuwulungujaku, mici mibolesha bolabola ne mâyì ayi, kuumishaku too ne mbwebwe, ne bikwabo byònsò, ne kuumushaku byònsò. Dìbà adi Izaleela kwelaye lubila, binunu mwandamutekete abi ne: “Nzambi ìkalè Nzambi.”

<sup>135</sup> Eliya, mushindu mwine ùdibi bilenga bwa kumona kaamubidi kakese aku, kakulakaji kamweka kateketangane, kaa kanyaanunukangane kònsò keele minyengu, ne kaadikombo aku mu cyanza, kàsù kakese kaa maanyi kalembeleja ku dyàpà, kapese kaa ciseba cya mukooko kadijìngila mu cifuka. Mona’s, s’mbafwanyine kumwela mu buloko leelu ewu bu yèyè mwa kwendela mu mùsèsù; kadi badi balekela bakaji bavwala tuputulu; kadi ncyà bushuwa ne bôbò kabavwaku bafwanyine kwenza aci to, nwamonu’s, mushindu awu, bapatuka. Pa nanku, dìbà adi, kadi ki bôbò bàlwalwà aba. Ki bôbò bàdì benda bapweka aba, bapicila kwaka naka, bakosolola kakuna, bashindameene pa dikombo edi.

<sup>136</sup> Mpindyewu, Mukuna wa Kaamèlèlè kî nkaaba kakese—kakese kaa munda mutupu kasanganyiibwa munkaci mwa cipeela to. Mmukuna munene. Mmuye, cyenze bu ditumba mushindu ewu, mubànde too ne ku lusongo, ne wùmweneka mupatuke too ne kumutu kwa mbû. Ki Eliya ne Gehazi kubàndabò lubilu too ne kuulu kwònsò aku, ku lusongo. Nenku Eliya kudyupwilaye mpala mutwe panshi mwaba awu, ne kubangaye kudidila Nzambi, mwele nyima ku Wesete, lwà kùdì dìbà aku. Bidimu bisatu ne ngondo yisambombo, nansha lumuma kalwakamataku to. Kwambilaye Gehazi ne: “Ndabi ukatangile tũng ní wamònakù cintu kampanda, divuba kuulu kwa mbû aku.”

Mwimanyine pa mukuna awu, mutangile lwà *kwaka*, kwambaye ne: “Ncyèna mmona cintu to.”

137 Kushaalaye anu mwab’awu. “Nzambi, piikalàbi ne bantu aba baanyingaladi, piikalàbi ne cisamba eci cyàlùkidi Kùdi, piikalàbi ne bādìlongòlòlù bwa kulekelabo lukutukutu lwònsò elu ne kwalukila ku Dìyi Dyebe, dībà adi Wèwè’s udi Nzambi, bwa kwandamuna ku Dìyi Dyebe.”

138 Lekelaayi ngāmbè cintu cimwecimwe aci leelu ewu. Angataayi mangumba aa ne nùàcìbùlùlè, nupwe mwoyi tuntu twa cyena mangumba tùdi tutapululangana etu, nenku bantu bàalukilè ku Dìyi dya Nzambi, ku njila udi usongangana. Mèmè nènñujaadikilè ne kudi Nzambi ucidi wandamuna ku Kapya.

139 Bantu bàsokè Nzambi. Biikalè . . . ? . . . babiikidishé muntu. Bantu balombeshe muprofeta. Nzambi neamwele mu cyalu. Ndi ngeela matunga kadyombo bwa kwenza cyòci aci. Ponaayi batwe mpala panshi nusoke Nzambi, bwa kutumaYe musungidi, kadi nutangile bwa kumona cidì cyènzekà. Anji cyènzàayi musangu umwe cyanaana, Nzambi neandamune. Nzambi ùtu misangu yònsò anu wandamuna.

140 Kuponaye panshi ne kwambaye ne: “Nzambi, cyenzekeku leelu ewu. Bantu aba musangu kampana bavwa babengangane Neebe. Bantu aba mbaabuluke mu mangumba a mishindu yònsò kuntu kwaka. Kadi, leelu ewu, Wèwè waDijaadiki. Wèwè udi Nzambi. Ne cisamba nyewu cyāmbì ne: ‘Imansha ba-Baala.’ Ne mèmè nyewu ngaashebeyi baakwidi binunu abu. Bakaadi buumushiiwe mu njila mpindyewu, Mukalenge. Bipumbishi byònsò byamanyi kuya, tuumikàlù twa tukese tukese tùvwà tùtùtāpūlulà atu.”

Méthodiste mmujinge bwa kulwa kukuukwila ne Baptiste; Baptiste mmujinge bwa kulwa ne beena Mpenta; baa balelela abu kuntu kwaka, binunu mwandamutekete baa lulamatu abu. Kadi kabayi mwa kucyenzaku to. Bòbò badidinge bacyènzè, bòbò’s bābīpācì mu ekeleeziya yabo ayi. Bamwe baa kùdìbo kabeena bacyuka ciine aci to. Badi balwa, nansha bishi. Neya bushuwa.

141 Kadi bònsò bàkosè bipumbishi abi bwa bādìsangè, bāmbè ne: “Netupwe mwoyi twitabaayi yònsò eyi ne tuteshismu, ne byònsò bitùdi tubalamu abi. Twalukilaayi ku Dìyi dya Mukalenge.” Nutangilaayi numone cyènzekà dībà adi. Nzambi neabajudile muprofeta, ncyā bushuwa ne Yèyè neabajudileye, wíkala mwa kubatwadilaCi buludi, bòbò badìlongolole bwa kuCyakidila. Dyambedi, bikengela bānjì kusambila. Nzambi Yèyè mmwindile.

142 Kabyenaku bikemesha bwa ne Nzambi mmuswe bwa bantu biikalèmu ne cya dyenza anyi? Pààkatāngilā Yesu dinowa, Wākamba ne: “Dinowa ndibobe. Beena mudimu mbakese.

Lombaayi Mukalenge wa dinowa,” ùwwa n’Yèyè. “Nundombe Mèmè, bwa Ntume beena mudimu mu dinowa Dyanyi.” Ncitupa kampanda cìdì cìkèngelà bwa nwènù kwenza. Nzambi mmwindile bwa Ekeleeziya Wende aMusoke. Yèyè ukaadi mucyènzènze misangu yònsò. Nzambi mmwindile leelu ewu bwa cisamba cìbiikidishè musadidi Wende bwa abwele mu mudimu. Kadi musadidi kèna mwa kubwela mu mudimu pàdì cisamba kaciyi cisambila to.

<sup>143</sup> Izaleela kavwaku mwa kubwela mu mudimu kuntu kwaka, ne bimanyinu ne maalu a kukema, pavwabo kabayi bapone batwe mpala yabo panshi ne basambile bwa musungidi kampanda to. Nzambi uvwa ne musungidi Wende. Nzambi uvwa ne muprofeta kampanda mulembeleja mu cipeela mwamwa, mumulaminemu munda mwa bidimu makumi anaayi, mwindile bwa bôbò kudyakaja, bwa kusambilabo. Kadi paakadyakajabo ne kubangabo kusambila, dîbà adi Nzambi kutumaYe musungidi awu.

Nzambi neñzè cintu cimwecimwe aci leelu ewu, bu bantu anu mwa kudisanga, kuditwa mu disambila. Eyo.

<sup>144</sup> Yèyè uvwa cimanyinu kùdì baprofeta baa mafi abu ne kùdì Aakaba, cya ne yèyè uvwa musadidi wa Nzambi. Yèyè uvwa muprofeta wa Nzambi. Pashiishe, yèyè uvwa kabidi cimanyinu kùdì Izaleela, mu mushindu wa ne yèyè uvwa mwa kukanga mauu anyi kukangula mauu, pavwaye muswe kwenza nanku. Ncya bushuwa ne ki civwaye.

Ngambilaayiku umwepele udi mwa kukanga mauu tũng, ndeejaayibi umwepele udi mwa kukangula mauu, pa kuumusha Nzambi. Nenu Dìyì dya Nzambi awu, anyi, Dìyì dya Nzambi didi kùdì baprofeta.

<sup>145</sup> Miikà, cimanyinu kùdì Yehoshafata. Miikà uvwa cimanyinu kùdì Yehoshafata, cya ne Nzambi ùtu ulama muprofeta mulelela mwikàlekù anu dîbà dyònsò.

<sup>146</sup> Mpindyewu monaayaaku. Yèyè uvwa ne baprofeta nkama yinaayi, Aakaba awu, nenu kubiikidishaye baprofeta nkama yinaayi abu. Nenu bònsò ne dîyì dimwe kumwambilabo. Kadi nansha nanku, munda mwa mwoyi wa Yehoshafata, muntu wa Nzambi awu amu, yèyè wakamanya ne kuvwa cintu kampanda cipampalamuke. Yèyè wakamanya ne kuvwa cintu kampanda cipampalamuke. Kwambaye ne: “Kwènàku ne mukwabo anyi?”

<sup>147</sup> “Paanyima paa nkama yinaayi yìdì miimane pààpa yàya anyi?” Yèyè ne: “Bònsò aba’s mbaprofeta, baprofeta baa Yehowah.” Ki ba—ba-Méthodistes mbôbò abu, ba-Baptistes, ba-Presbytériens, ba-Unitaires, kaa, ekelekele, ekelekele, ba-Trinitaires, ne mishindu mishiileshiilangane yònsò. “Tudi naabo bònsò kaaba aka, ne bònsò ne dîyì dimwe badi bamba ne edi ki ditunga ditambe bunene didiku. Katwena ne citudi mwa



kuciina to.” Byenze mùdì mwânà mukese wa balume kampanda wenda wela mònzù mu nkita, nudi bamanye’s, pende ne bwòwà’s. Kanutacishiku meeji bwa aci to.

Yèyè ne: “Kadi kwênàku ne mukwabo anyi?”

Yèyè ne: “Kaa, eyowa’s, kudi mukwabo mwab’ewu, kadi,” yèyè ne, “ntu mumukine.” Nwamonu anyi? Yèyè ne: “Ùdi yèyè misangu yònsò anu wakula bibi bwa ditunga edi. Ùdi yèyè misangu yònsò anu wamba ne cintu cibi necìtwènzèkèlè.”

<sup>148</sup> Yehoshafata kwambaye ne: “Ndi muswe—ndi muswe kumuteelejaku.” Kaa, eyowa’s!

Yèyè uvwa cinyi? Cimanyinu. Nansha malongolodi anyi mangumba miikàlekù bùngì kaayi, Nzambi ùcidi anu ne muprofeta udi ushaala ne Dìyì.

<sup>149</sup> Yehoshafata uvwa mumanye ne Aakaba uvwa wa kabutu, bwalu muprofeta mulelela awu, Eliya, ukaavwaku cimanyinu kùdì matunga awu, mwambe ne: “Mbwa neyilake mashi ebe, bwa kulwa kaaba aka.” Ncya bushuwa. Ùvwa mumanye ne Izabela ne yèyè bavwa ne cilumbu cyenda cibavwila. Ùvwa mumanye nanku. Nwamonu anyi?

<sup>150</sup> Nenku Miikà, Miikà kwambaye... Bòbò—bòbò kulwa kudiye e kwambabo ne: “Mpindyewu, nènkwambilè ne, wèwè muswe kubwela mu nsangilu ulwàlwa awu, nènkwambilè cya wèwè kwenza. Itaba wèwè anu ne bayiishi bònsò aba badi mu bulelela. Wamonu anyi? Ùmwambilè ne: “Nda kùyaaya.” Ki yèyè kwamba ne: “Itaba wèwè anu cyanaana.” Yèyè ne: “Mèmè nènkwambilè citwènzà. Netwènzè. . . Netwènzè ne wèwè ubwele mu bulongolodi bwetu, bu wèwè anu mwa kwenza nanku, wamonu’s, bu wèwè anu mwa kudya cibanga pa tuntu tukese etu tùdi wamba. Wèwè udi uleeja anu cyanaana, uya, witabangana naabo ku mèyì, uya naabo mumwe.” Huh-huh! Nudiku bafwanyine kudifwanyikijila muprofeta mulelela wa Nzambi usesuka ku Dìyì dya Nzambi anyi? Nudiku bafwanyine kudifwanyikijila aci anyi?

“Ee,” mwàkambà bakwacikwetu abu, “kadi, tudi bamone cikeena-kumona,” baprofeta nkama yinaayi aba. “Twètù tudi bamanye. Tudi baprofeta. Tudi bamanye, bwalu tudi baprofeta.”

<sup>151</sup> Miikà kwambaye ne: “Ncyèna ngeela mpatà ne kanwena bamone cikeena-kumona to. Ncyèna ncyela mpatà nansha mikese to, cinudi bamone aci, cikeena-kumona kampanda, kadi kaciyena cipetangana ne Dìyì adi to.” Amen. Yèyè ne: “Ndi paanyi mumone cikeena-kumona.” Amen. Kaa, luse we! Yèyè uvwa cimanyinu. Yèyè uvwa cimanyinu. Kwambaye ne: “Ndi mumone cikeena-kumona, ne ndi mumone Izalela, mwenze bu mikooko, mitangalake pa kakuna, kaiyi ne mulami to.”

Ki mutangidi munene ewu, mwepiskopo, kuyaye tamakatamaka kadi kumubangulaye dipi ku mishiku.

Kwambaye ne: “Nyuma wa Nzambi mmuyiile kwèpì padiYe mupatuke munda mwanyi?”

152 Yèyè ne: “Neumone pawikalà mu buloko. Neumone.”

Yèyè, Aakaba kwambaye ne: “Elaayi mulumyana awu mu buloko. Numudiishaayi dyâmpà dya kanyinganyinga edi, ne numupeeshaayi mâyi a kanyinganyinga, bwa kunwaye.” Yèyè ne: “Pângààpinganà mu ditalala,” mwakambaye, “dìbà adi mèmè ki watangila bwalu bwende.”

153 Mukulumpe Miikà mwimane mwab’awu ne EMU MMUDI MUKALENGE WAMBA. Kwambaye ne: “Bwa wèwè anu mupingane, apu kaayi Nzambi kî mmwakulangane naanyi to.” Hum! Ki cyôcì aci’s. Yèyè uvwa cinyi? Yèyè uvwa cimanyinu, cya ne baprofeta baa Yehowah, baprofeta baa Nzambi, bàtu bashaala ne Dìyì dya Nzambi.

154 Nwènù ne muprofeta wa wàmba ne bikengela nubatiijibwe mu myânzù ya “Taatu, Mwânà, Nyuma Mwimpè,” awu mmuprofeta wa mashimi. Nwènù nwamba ne nudi ne muprofeta munkaci mwenu, wa wàmba ne: “Kudi Nzambi yisatu,” awu mmuprofeta wa mashimi. Kakwenaku Mufundu nansha umwe bwa nansha cimwe cya ku byôbì abi to. Ncya bushuwa. Kadi muprofeta mulelela wa Nzambi neashaale ne Dìyì adi. Kadi cikeena-kumona cyende cyôcì cibengangana ne Dìyì adi, yèyè kî mmuprofeta mulelela wa kùdì Nzambi to.

155 Mwaba nansha umwe, mu Bible, kacya kakùtukù muntu nansha umwe mubatiijibwe mu mwânzù wa “Taatu, Mwânà, Nyuma Mwimpè” to.

156 Tangilaayi Pòlò, mu buloko mwamwa, keena Yuda kakese, kaa dyùlù dikonyangale aku, kaa mutu dibalà, mulaale muntwamu, mupicishile bidimu makumi abidi, mu buloko bwa beena Loomo amu. Yèyè ngwâkafùnda mikanda eyi. Mpindyewu, nudi nwela meeji kaayi bwa civwà bayiishi bakaji beele meeji bwa Pòlò, paakambaye ne: “Bakaji abu bapuwe mu maakeleeziya. Ncyèna mbaanyishila bwa kwakulabo” apu? Mèmè’s ndi ndicinkila ne bavwa bafwanyine kwikala bamwenze cyesu.

Nudi nwelaku peenu meeji bishi bwa cyakeelabo meeji kùdì beepiskopo abu, beepiskopo abu, paakambaye bintu bishiileshiiilangane byônsò ebi ne: “Kâtushàayi cintakanyi *eci* apa, ne *eci* apa, byônsò *ebi*, *cyacya*,” pàvwà Pòlò ubambila apu? “Mulumyana mwine ewu nganyi pende’s, twamb’eku twamb’eku, mulumyana udi mulaale mu buloko mwamwa ewu?” Kadi yèyè’s uvwa mutuutakeene ne Yesu. Yèyè uvwa mumanye civwaye wamba aci.

Lenku mu musùmbà wumwewumwe awu, paanyima paa lufu lwa Pòlò, ndekeelu wa byônsò kwenzabo, mu musùmbà wa beepiskopo ne bantu baa milongo mitumbuke awu, ku

Cisangilu cya Nicée, nenku cyôci aci kwenzaci ekeleeziya wa Katolike, baseesuka ku Diyî dya Nzambi. Ki kwàkabwelelâ cintu cyenu cya “Taatu, Mwânâ, Nyuma Mwîmpè” aci aku. Mêmè ndi ngeela nî nganyi nî nganyi yônsò kadyombo, mwaba kana yônsò, ditunga kana dyônsò, bwa kujaadika ne neya mafi.

<sup>157</sup> EMU MMUDI MUKALENGE WAMBA. Dibatiiza dya benza ne mwânzû wa “Taatu, Mwânâ, Nyuma Mwîmpè” ndya mafi. EMU MMUDI MUKALENGE WAMBA. Mêmè ndi ntumina yônsò wa kunudi dîyi, nweni bàdi apa aba anyi bàdi bateeleja mukaba wa mêyi, bàtù kabayi babatijiibwe mu Dîna dya “Yesu Kilisto,” babatijiibwe cyakabidi mu Dîna dya Yesu Kilisto.

<sup>158</sup> Pòlò, mu Byenzedi, 5.9, anyi, 19.5, wàkamba ne: “Nukaadi bapete Nyuma Mwîmpè kacya nwítabuujâ anyi?”

Kwambabo ne: “Katùtu bamanye ne kùtukù Nyuma Mwîmpè kampanda to.”

Yèyè ne: “Kadi nku cinyi kunwakabatijiibwa?”

<sup>159</sup> Bòbò ne: “Twètù twàkabàtijiibwa,” kadi kaciyi mu dibatiiza dya beena Kilisto to.

“Taatu, Mwânâ, ne Nyuma Mwîmpè” kî ndibatiiza dya beena Kilisto to. Kacya mwena Kilisto nansha umwe kàtukù mubatijiibwe mushindu awu to, mu Bible anyi munda mwa nkama ya bidimu paanyima paa Bible. Ntwitabaayi wa cyena Katolike, kadi kî n’Dilongesha dya beena Kilisto to. Ndeeyaayi mu Bible. Cidi—cidi ndiibila. Nngenzelu wa mudimu wa badémóns.

Ncyèna ne meeji a kwamba ne bantu bàdi babatijiibwe nanku awu badi mushindu awu to. Nzambi udi ne bantu bààbúngi muntwamu lelu wa Ndaaya ewu bàdi kabayi bamanye cidi cimpè to.

<sup>160</sup> Kadi dîbâ dyamanyi kulwa, bikengela twalukile ku Diyî patwikalâ baswe bwa Nzambi akwate mudimu mu dituku edi mwakakwataYe musangu awu.

<sup>161</sup> Ngâkambila mààmù mundedi pavwaye ùpunga ne lufu, kumpala kwa kufwaye. Mêmè kwamba ne: “Mààmù, pângàakalwâ mwena Kilisto, mêmè bu mwânâ wa balume, ngâkabanga kwenda kukeba ne ngâkajandula. Mwua mumanye ne kùvwakù Nzambi kampanda, kuumukila ku bikeena-kumona byûdi mumanye abi, ne bintu bitù byenzekenzeke mu nsòmbelu wanyi mujima abi.” Mêmè ne: “Pashiishe mêmè kusangana ekeleeziya wa Katolike wamba ne: ‘Twètù ki ekeleeziya awu. Cidi Bible wamba kacyna ne cidici cishintulula to. Tudi twitabuujâ Aci ne cidi anu cimpè, kadi, twètù ki ekeleeziya awu. Citùdi twètù twamba aci, s’ki cidi Nzambi uswika mu Dyulu.’ Ne pa nanku, dîbâ adi, badi bacyenza mushindu *kampanda*. Aci’s mmubidi umwepele. Ba-Luthériens mbambe ne: ‘Mbapiile. Twètù tudi tucitabuujâ mushindu *kansanga*.’ Ba-Baptistes

badi bamba ne: ‘Bònsò abu mbapiile. Twètù tudi tuciitabuuja mushindu *kankenga*.’ Kadi kudi nkama ya yòyi mibidi ayi.”

Mona’s, mmunyi mùdiku mufwanyine kupeta diitabuuja? Nganyi wa kudibo aku udi mubinge? Kudi Cintu cimwepele cilelela. Ncivwa muCimanye mwine musangu awu to.

<sup>162</sup> Mémè kwamba ne: “Mààmù, mémè kupingana ku Bible ne kusangana mushindu wùvwà bapostolo baa kumpala abu, mushindu wa ekeleeziya uvwabò bòbò nende, mushindu wakalongeshabo, ne bintu byakenzabo. Mémè ndi mucyènzè anu menemene mushindu wàkacyènzàbo bòbò awu, mushindu wùdì Bible mwambe awu, nenku mémè kupeta bipeta bimwebimwe abi.” Amen. Nwamfwilaayiku luse bwa cyakwidi eci, kadi—kadi nkàsù mpatudi tuyimwena mu milabi. Aci ncilelela. Mémè kupeta bipeta bimwebimwe byakapetabo bòbò abi. Eyowa.

<sup>163</sup> Pa nanku, kwèna mwa kuteeka dyeyemena mu cintu kampanda cidi ne mishindu nkama citeema mishiilangane, ya diya mushindu *kampanda* ne mu mushindu *kansanga* nansha.

Pashiishe mémè kujandula, mu Bible amu, Yesu mwambe, Yèyè mwine ne: “Muntu yèyè mudidinge muumushe Dìyi dimwepele, anyi muDishintulule, mu Mukanda ewu; nî nganyi nî nganyi wadidinga kusakidilaKu kantu kampanda, anyi kuumushilaKu kantu kampanda; cintu cimwecimwe aci necyumushiibwe, ku cyende citupa cya ku Mukanda wa Mwoyi.” Bileejibwe ne ùvwa ne dìnà dyende mwômò amu’s, eyo, kadi nedyumushiibwe. Kaa!

<sup>164</sup> Bidi bikengela bwa twètù kwalukila ku Dìyi edi. “Maulu ne buloba nebijimine, kadi Dìyi Dyanyi kadyadyakupangilaku to.” Eyowa’s, mukalenge. “Dìyi dya muntu yònsò diikalè mashimi. Dyanyi Mémè diikalè dilelela,” mwàkambà Yesu. Tushaalaayi ne Dìyi. Eyowa. Kaa, ekelekele! Eyowa’s.

<sup>165</sup> Yehoshafata mmumanye ne Nzambi ùtu ulama muprofeta wa cya bushuwa, mulelela udi ushààla ne Dìyi Dyende ne kayi muswe kudya naaDi cibanga awu to. To, mukalenge.

<sup>166</sup> Yèyè wakashaala anu naaDi. Nkama yinaayi babengangana nende, kabidi, biikàle ne biprofeta byabo. Kadi cyende yèyè civwa Dìyi dya Nzambi, ciikàle ne cimanyinu cimwecimwe aci ne bikwabo.

Nenku leelu ewu, ndi ngamba ne, cidi citùkèngelà leelu ewu mmuntu kampanda, muprofeta, wa ujuuka munkaci mwetu, washààla ne Dìyi dya Nzambi kayi ucyuka cidi nî nganyi nî nganyi mukwabo wamba to, anyi cidi dingumba dyambe.

<sup>167</sup> Miikà kavwaku ne dimwela dya mu diboko nansha dimwe to. Mòsà kavwaku ne dimwela dya mu diboko nansha dimwe to. Noa kavwaku ne dimwela dya mu diboko nansha dimwe to. Muntu nansha umwe wa kudibo, nansha umwe, kèna ne dimwela dya mu diboko to. Cyònsò ncibengangane naabo. Kadi bòbò bàtu

bimanyinu mu matuku mabi kumpala kwa Nzambi kutumaYe cilumbulwidi. Ne Nzambi ùtu ushaala mukwate ku Dìyi Dyende ne ùtu muswe bwa cisamba Cyende cishaale cilamate ku Dìyi Dyende. Mukalenge atumbe.

Mpindyewu, twenda tupweka batangile ku dijikija, anu mu tusunsa tukese mpindyewu. Mpindyewu teejejaayi ne ntema.

168 “Kuvwa muntu mutuma kùdì Nzambi dìnà dyende Yone,” muprofeta-cimanyinu. Kumpala mene kwa Yesu kulwaYe pa buloba, bwa kuditeejaYe, Yèyè wakatuma muprofeta kumpala Kwende. NcyakenzaYe anyi? Wàkatùma muprofeta, Eliya wa Dipungila Dikulukulu awu, wàkambiibwa mu ciprofeta ne ùvwa ne cya kulwa mu bukole bwa Eliya wa Dipungila Dikulukulu awu. Bivwa bikengela ìkalè muprofeta-cimanyinu cya ne Yesu uvwa ulwa, cya ne kuvwa ne cya kulwa Maasiya.

169 Nenu Yone wakapatuka mu cipeela, yèyè uvwa cimanyinu cya ne Maasiya uvwa mu njila. Pààkamwènèkà Yone, s’bivwa bikengela bwa Izaleela kwikalaye mumanye, ku baprofeta baabo.

Mwaba awu’s ki wùtù bantu bacipangila. Kabatu biitabuuja baprofeta baabo to. Kabatu biitabuuja to. “Katwena twitabuuja ne cyàkambà Peetelo aci civwa cilelela to, mu dituku dya Mpenta adi.” Kabeena biitabuuja ne ncilelela to. Kabeena biitabuuja cyàkambà Pòlò to, cintu cimwecimwe cyàkambà Peetelo aci. Wàkamba ne: “Mwanjelo wa mu Dyulu yèyè uyiisha dìyi dikwabo nansha dya bishi, ediibwe mulawu.” Kabeena biitabuuja aci to. Nwamonu anyi? Kabeena baciitabuuja to.

Nenu bôbò kabavwa biitabuuja baprofeta baabo to. Bu bôbò nansha bamanye, nunku mbamanye ne Yeshaayi wakamba ne: “Nekwikalè dìyi dya kampanda udi wela lubila mu cipeela, dyàlongololà njila kumpala kwa Mukalenge.” S’bivwa bikengela bwa kwikalabo bacimanye. Yèyè’s uvwa muprofeta, mfumu wa baprofeta. Yèyè wakabambila, kadi kabaakaciitabuuja to. To, to. Wàkamba ne: “Kùlwalwa Maasiya.”

170 Muntu ewu uvwa muntu mutuma kùdì Nzambi. Kaa, bânà beetu! Kavwa ne bamulondi to. Nzambi wakamupa bamulondi, kasumbu kakese kaa mikooko, anu mwakapeeshaYe Eliya amu. Nzambi wakamupeesha bende bamulondi. Kaakabapetela ku bulongolodi kampanda bwa cidiidi to. Yèyè wakayiisha Dìyi, kushaaleyè pa Dìyi dya Nzambi, ki Nzambi kumupeeshaYe kasumbu kakese kaa mikooko. Eliya wakashaala pa Dìyi dya Nzambi. Nzambi wakamupeesha kasumbu kakese kaa mikooko.

171 Muntu ewu kavwa ne dimwela dya mu diboko to. Kavwa ne bamulondi to, kayiku ne dimwela dya mu diboko to, kayi wa mu dingumba nansha dimwe to, kayi ulombangana cintu nansha cimwe ne kayi uciina cintu nansha cimwe to. Awu uvwa n’Yone. Bwa cinyi? Yèyè uvwa muntu mutuma kùdì Nzambi. Ki bwa cinyi

yêyè wakiimana. Yêyè uvwa Eliya uvwa mwimane kaaba aku, bwa kujaadikila bantu ne Maasiya uvwa ulwa. Yêyè kwamba ne: “Mêmè ndi dîyì dya ewu udi wela lubila mu cipeela, bu mwàmbambàbo kùdì muprofeta Yeshaayi. Dilongololaayi bwa kutuutakeena ne Mukalenge.”

<sup>172</sup> Bafaalesa ne Basadoka abu bavwa biimane mwaba awu bakokangana bwa nkooci yabo ne bikwabo. Anu dîbà mene divwabo bakokangana ne badilakanangana bwa ciine aci adi, munkaci mwabo mene amu, ki Maasiya kulwa tamakamaka.

<sup>173</sup> Yone kwambaye ne: “Monaayi, ki Yêyè awu.” Aleluuyah! Mutangilaayi. Yêyè ngwâkaMuleeja ku bantu. “Ki Yêyè awu. M’Mwimane anu munkaci mwenu mpindyewu mene.”

Lwà pa diine dîbà adi, maulu e kukungulawu. Yesu kubwelaYe mu mâyi. Ki Yone kufilaye bujaadiki, umona Nyuma wa Nzambi, mufwanangane ne nyuunyi wa nkuci, upweka. Dîyì dyèla lubila lukole ne: “Ewu m’Mwan’Aanyi munanga Mwena munda mùNdì musankile bwa kusòmbela.” Kaa, ekelekele, ekelekele!

<sup>174</sup> Yone kwambaye ne: “Mpindyewu mêmè ndi ne cya kupweka. Yêyè neabande.” Kaa, muprofeta kaayipu’s we, cimanyinu kùdì Izaleela! Eyowa’s, mukalenge.

<sup>175</sup> Yêyè uvwa muntu mutuma kùdì Nzambi, nansha mùvwàbi ne tatwëndè uvwa mwakwidi amu. Kaa, eyowa’s. Tatwëndè, Zakaayi, ùvwa mwakwidi. Kadi nukaavwaku bamone anyi? Nzambi kavwaku mufwanyine kulekela muprofeta awu bwa kubwelakananganaye ne malongolodi abo awu to. Tatwëndè uvwa mufwanyine kwikala muye nende mu cilongelu cya teoloji, ku dingumba dinene *Kampanda*, mumuvwiye muyiishi wa kapelu, nudi bamanye’s, ne mumulongeshishe ne mundekeelu, ne mumupeeshe bintu byònsò bìvwà kabiyi bikengela kwikalaye mupete tò. Kadi Nzambi kavwaku mufwanyine kulekela bwa musuuka wende kwenzejiibwawu mu mushindu mubi to. Nudi nuumvwa anyi? Kavwa mufwanyine kulekela muntu awu ubwelakanangana ne malongolodi to. Kavwa wa ku nansha bumwe bwa kudiwu to, kasumbusumbu nansha kamwe, Mufaalesa, Musadoka, anyi mwena Helooda to, anyi nî ncinyi cyònsò cìvwàci cìfwanyine kwikala aci. Nzambi kavwaku mufwanyine kucyanyisha to.

<sup>176</sup> Yêyè wakapeta dileidiibwa dya pabwadi. Ùvwa mwànà wa pabwende. Ùvwa muprofeta. Tatwëndè uvwa mwakwidi, kadi Yêyè kavwaku mufwanyine kumulekela ukabwelakanangana ne ntendeleelu yabo yònsò ya lubombo, ya Cifaalesa ne bikwabo abi to. CyakenzaYe ncinyi? Wàkaya nende mu cipeela ne kumulongeshila mu cipeela amu.

<sup>177</sup> Dilongesha kaayipu’s we! Amen. Wàkamulongeshila ku dilabula. Ki mushindu mutambe bwimpè ngwòwò awu,

wa dimanya Nzambi. Paakapatukaye, yêyè uvwa mumanye anu menemene civwà mudimu mumutuma naawu. Nzambi wakashindika mudimu mumutuma naawu awu.

Wàkawùshindikila penyi? Pa musulu. Mpindyewu, nwènu mwa kuvudija ibidi ku ibidi's. Nwamonu anyi? Pa musulu!

Kwambaye ne: “Mèmè ndi dîyi dya ewu udi wela lubila mu cipeela ne: ‘Longololaayi njila wa Mukalenge, lulamijaayi kajila Kende.’”

<sup>178</sup> Yone, muntu mutuma kùdi Nzambi. Nzambi kavwaku mufwanyine kumulekela wenzejiibwa mu mushindu mubi ku cyôci aci to. Yêyè wakamulongeshila mu cipeela, kùdi Nzambi. Yêyè kaakamulongeshila mu bilongelu byabo abi to, kabiyi mu teoloji wabo awu to. Bu Yêyè mwenze nanku, nunku yêyè mmupàya patapata ne bintakanyi bya bwena binudi nupatuka naabi mu bilongelu bya leelu ewu ebi, bilongelu bya mishindu yônso. Kabiyi anu bya ba-Presbytériens, bya ba-Baptistes ne ba-Méthodistes nkaayaabo to, kadi bilongelu bya beena Mpenta, biikàle anu bibi, cyônso cya ku bilongelu bya teoloji abi, cidi cibapatula muntwamu. Kaa!

<sup>179</sup> Dilwa dyende, mwàkambà Nyuma, wa Yeshaayi. Dilwa dyende, dilwa dya Yone, divwa didyànjila kwamba mu Mifundu. Yeshaayi 40.3 mmwambe ne: “Nëntumè musanjeela Wanyi kumpala Kwanyi, bwa kulongololaye njila,” anyi, awu uvwa m'Maalaki 3. Mwambe ne. . . Maalaki 3 mmwambe ne Yêyè uvwa utuma musanjeela Wende kumpala Kwende. Muprofeta, muprofeta wa ndekeelu awu, ngwàkaakula bwende yêyè. Cintu cya ndekeelu cyàkaakulà bwende yêyè. Vulukaayi ne, Mukanda wa ndekeelu wa Dipungila Dikulukulu mmwambe ne Eliya uvwa ne cya kulwa kùdi bânà baa Izaleela kumpala kwa dileeja dya Maasiya.

<sup>180</sup> Nudiku anyi? Mukanda wa ndekeelu mu Bible, Bwakabuulwibwa, wudi wutuleeja ne nekwikalè dyalukila dyende mu dituku dya ndekeelu, kùdi ekeleeziya wa baa Bisamba bya bende, cimanyinu kampanda. Mushindu mwine wùdibo bàcipangila's! Mbambe mu ciprofeta ne yêyè neapingane cyakabidi, kumpala menemene kwa Dilwa dinene ne diibîdi dya Mukalenge. Mu Maal- . . . Mu Maalaki nshapita mwi4, ne mu Bwakabuulwibwa kabidi, nshapita mwi3, udi utwambila ne yêyè neikalè mwab'ewu mu matuku a ndekeelu. Yêyè umwèumwè awu, wíkala mwa kwimana pankaci bwa cisamba awu, mwikàle ne kasumbu kakese kaa mikooko kàmupèèsha Nzambi aku, nealwe ku matuku a ndekeelu. Ki mùdi Nzambi mwambe. Yêyè neikalè cimanyinu kùdi ditunga dya baa Bisamba bya bende edi, cya ne cikondo cyàdi kacicyenaku kabidi to.

<sup>181</sup> Nenku, nwavulukaayi ne, padiye ne nyêyè awu wámwèneki mu cyalu, cikondo cikaadi pabwipi. Tusambilaayi bwa Nzambi amutume. Cikondo cikaadi pabwipi.

182 Mudimu wende wa bwambi mmwenze anu ujika, ki Maasiya kuDileejaYe. Pàdi anu munene wâlwa mu matuku a ndekeelu ewu, ùjikija mudimu wende wa bwambi, Maasiya neaDileeje. Ki mwikalâbi nanku. Cikondo cikaadi pabwîpî, pa nanku mbîmpè tusambilaayi. Mbîmpè nubangaayi kusambila.

183 Cimanyinu cyende cifila kùdi Nzambi bwa cikondo eci aci necijaadike cidiye. Bantu bônso nebacimanye. Nzambi neacishindike. Nealeeje bimanyinu ne maalu a kukema mùtùbi kacya kabiyiku byanji kwenjiibwa pa buloba to, ku cyôci. Cîndi muswe kwamba kî ndidikùpa, dizakalala, ne dyakula dya mu myakulu to. Neatwibwe nyama ku mikolo ne Dîyi dya Nzambi, anu mùvwâ muntu ewu amu. Bwa cinyi? Bikaavwa bizama kwamba mu ciprofeta ne yêyè nealwe, mu Maalaki 4 ne mu Bwakabuulwibwa 3, pa nanku yêyè nealwe. Kakwena cintu nansha cimwe cyàmukàndà to; yêyè ulwalwa. Amen. Yêyè neikalè mwab'ewu. Amen. Bantu bätwe mpala yabo panshi leelu ewu bätwadijè kwela mbila kùdi Nzambi, kadi bàmone cidi cyènzekà. Nenumumone udileeja mu bukole. Eyowa's, mukalenge.

184 Bilondeshile Mifundu, Mukenji wende wa cimanyinu newikalè “dikudimuna.” Ncinyi cìikalà cyende...Twètù netumanye ne yêyè udi cinyi? Mmunyi mutwamanya ne ki wa cya bushuwa awu?

185 Nudi bamanye's, Izaleela wakakonka cyôci aci musangu kampana, mu Dutelonoma amu, nshapita wa 20...mvensa wa 20, ngeela meeji ne mwômò amu. Kwambaye ne: “Mmunyi mutwamanya ne yêyè ewu ngwa cya bushuwa awu?”

Tudi tumanya munyi? Nzambi ngudi utwambila ne netumumanye. Cyènzàye ncinyi? “Neakudimune myoyi ya bânà bwa kuyaaluja ku Mukenji wa ku cibangidilu wa mpenta ku ntwadijilu.” Kaa, ekelekele!

186 Cimanyinu cidìbo bapange kumona, cimanyinu cya bushuwa, kadi bapanga kucimona. Ki mùtùbo benza misangu yônso.

187 Dyalukila ku Ekeleeziya mulelela, Mukenji mulelela! Yêyè neashaale nkaayende ubengangana ne mangumba, ne bukitu kayi bwôwâ, mwikàle ne EMU MMUDI MUKALENG WAMBA. Yêyè kaakudyaku cibanga kumpala kwa dingumba nansha dimwe to. Kaakwikala ne cya dyenza nansha ne dimwepele dya kudiwu to; kayi udyanganaku mukana pa cintu nansha cimwe to. Yêyè neaye buludi anu pa Dîyi, EMU MMUDI MUKALENG WAMBA. Nzambi ngwashindika mudimu wende wa bwambi ku bimanyinu ne maalu a kukema, dibuulula dinene dya Dîyi, ne udipatlwila bantu. Dituku kaayi dikaadi pabwîpî's we! Bu...Neimane mwâkiimanà Peetelo ne Yone, paanyima, mu Dituku dya Mpenta.



Paanyima paa Mpenta, pakaavwabo bamane kuujibwa tente ne Nyuma Mwimpè apu, babatiijibwe mwaba awu, bôbò kwimana mu bulà bwa Tubàdì twa beena Yuda atu. Baakiimana mwaba awu ne bukutu bwônsò buvwabo paabo mwa kwimana naabu abu. Dìbà adi, paakambabo ne: “Tudi tunukandika bwa kanulongeshanganyiku kabidi mu Dìnà dya Yesu to.”

<sup>188</sup> Kwambaye ne: “Mbikumbane bwa tunuteeleje nwênù, anyi Nzambi? Kosaayi nwênù biine bwalu abu munkaci mwenu.” Binyonga, kabayi balonge tulaasa to. Amen. Bavwa baprofeta. Bavwa baprofeta beela maanyi kùdi Nzambi. Bavwa bimanyinu bya Nyuma Mwimpè. Bavwa baprofeta. Bavwa bamanye.

<sup>189</sup> Bavwa anu bu Yone menemene. Bavwa ku Mpenta kwaka ne bavwa bapete cintu kampanda.

Kabavwa bu bààbúngì baa ku bayiishi beetu leelu ewu aba to, baditù baa mènà aba, baditambisha bwa bulongolodi bunene butùdì naabu, búngì butùdì naawu mu tusumbu twetu. “Twètù’s tudi tusanganyibwa bu bulongolodi bunene. Tutu twenza mudimu munene wa bumpandanjila.” Kaa, luse we! “Kaa, twètù’s mbàdì ne misumbà ya bantu minene kutamba bakwabo baa kùdìbo abu.” Ncinyi ciine aci? S’nkokelu wa bwena cidiidì. Ndi muswe bwa nuteeleje ne ntema, bwa tusunsa tubidi, tusatu tùdì tùlondà etu. Nkokelu wa bwena cidiidì.

<sup>190</sup> Ncya bushuwa ne ngãmbì cintu kampanda, kwênjì tusunsa ndambu, s’nudi bamanye cindì ngamba aci. Cimanyinu kampanda cidìbo bambe mu ciprofeta. Ngăcilekèdì, ngănùlekèèdìci, bu ne mbwenu peenu bujitu. Nwamonu anyi? Ee, kì ng’anu nwênù bàdì apa aba to, kadi aba bààtèelejà abu. Cikaadi mbwenu peenu bujitu. Nwenzè naaci mwônsò munwamona amu. Sambilaayi, kadi numone mùdì Nzambi umata mu cyalu. Tangilaayi numone mudiYe uuja Diyì Dyende. Yèyè mmwindile.

<sup>191</sup> Pàdiku maabômbè a mushinda, ki bantu bwôwà kubakwatabu aku; ne beena ku Pentagone, mbapange ne cya dyenza’s; ne bimanyinu bya kabiyi byumvwika mu maulu, bya tuumàlòngò tùdì túbùuka muulu, ne byônsò bidì Nzambi mudyanjile kwamba abi: Dìbà dyăkànyì bwa Eliya awu, (ùdi mu mwaba kampanda), ajuuke mu cyalu.

<sup>192</sup> Bantu, kasumbu kakese kaa mikooko aku, bàshààdìlè bakese bààmupèèshà Nzambi abu, bàshààdìlè bakese abu bàdìtwe mu disoka dya Nzambi, kadi nutangile numone cidì cyènzekà. S’nekwikalè diteetangana dya makanda dya ditunga dijima. Nekwikalè bukole bùdìbo kabayiku banji kumona kacya kwônsò eku to. Lutatu mu bwalu abu ludi ndwa ne, cikondo aci, dîbà nedîikalè dikaadi dimane kupita bwabo bôbò dîbà adi. Biibi nebîikalè bimana kukanga. Pa nanku, vulukaayi ne, tudi ku cikondo cya nshiikidilu. Sambilaayi.

193 Tangilaayi leelu ewu citùdi twètù tubiikila ne mbambi aci. Citùdi naaci ncinyi? Mpindyewu, bwa kujikija, ndi muswe kwamba nunku. Citùdi ne ncinyi? Katwena ne kantu nansha kamwe to. Bamwe ba ku balombodi beetu baa batambe bunene, batangadiki beetu baa batambe bunene; umwe wa ku batangadiki beetu baa batambe bunene mmwambe ne: “Bu mêmè mwa kupetaku dikumi pa lukama dya bândi mêmè mukudimwishe mucima abu bashaalaku kacya baakwata, mu cidimu cimwe, s’ngèngikalèku ne kusakidila kwàbúngì be.” Pàdìbi ne, katuyi tuya nansha kule kupita pàvwà Finney apu to, yêyè uvwa naabo makumi citeema ne mwandamutekete pa lukama.

Pòlo yêyè uvwa naabo lukama kusakidilaku nkama, nkama kusakidilaku nkama. Umwepele nguvwa musungidiibwe, nenku, yêyè uvwa muujiibwe bya menemene, mwaneetu, mu mushindu wa ne wàkaya kambila muntu mukwabo; awu kwambilaye muntu mukwabo; ne awu kwambilaye muntu mukwabo; kuya kafikabi too ne mu mìliyô. Bwa cinyi? Bavwa ne cintu kampanda. Bavwa pa Dìyì.

194 Leelu ewu, tudi twètù twela meeji anu ku misùmbà minene ya bantu. Ncinyi ciine aci? S’mbulongolodi bwa cidiidi’s. Twètù bafike, mutangadiki munene kampanda yêyè mufike mu cimenga, cidi cidiyànjlà kulwa ncinyi? Musùmbà wa bantu. Bu ba-Méthodistes bônso, ba-Baptistes, ba-Presbytériens, bôbò babakuleku anu ndambu mukese wa ciine aci, bôbò, ne: “Aba badi mwa kuyiisha anu *cikampanda*, ne yêyè kèna mwa kuyiisha *cikansanga*, ne kèna mwa kuyiisha *cikankenga* to, kadi ùdi mwa kuyiisha *cikansanga*,” cinùdi naaci ncinyi?

195 Nenku badi bàbànda kuntwaku, bakaji. Ndi ngaakula bwa beena Mpenta. Bakaji badi babwelamu, baya too ne ku cyoshelu, batungunuka ne misengeleelu.

196 Mêmè ntu misangu yônso anu mbengangana ne dibiikila dya ku cyoshelu. Mbipiciibwe ne mucyâmbè’s. Ncitu mbiitabuujaku to. Kakwenaku cintu bu nanku mu Bible to. Muntu nansha yêyè nganyi udi mwa kulwa munyi pìikalà Nzambi kayi mumubiikile? Kwèna mwa kumusaka ku luseke nansha. Kabyena bikengela bwa wèwè kubiikila nî ncinyi nî ncinyi to. Nzambi ngudi mumubiikile. Dibiikilangana dya ku cyoshelu mmwenenu wa ba-Méthodistes. Ncya bushuwa. Dibiikilangana dya ku cyoshelu, badi babapya, bamba ne: “John, udi mumanye’s, mamwèbè’s mmufwe kukaadi ntanta mule.”

197 “Éyì-éyì-éyì, eyowa’s, mwaneetu wa balume, éyì-éyì!” Aci kî ndikudimuna cya mucima nansha.

198 Mwab’ewu, kwâpici ndambu wa maloolo, tuvwa ne dileeja kampanda dya patooke mu Louisville, dya mukaji kampanda uvwabo balwe nende mu musheete wa bafwe, bawuteeke pa cibumba kampanda cya mu cilaminyi cya bingoma cya

basalaayi. “Nkama ya bantu,” mwakambabo, “kuyabo lubilu ku cyoshelu.” Evanjeeliyo kî ncifwebe bwa kukwacishangana naaci bwôwà to. Kî ndyumvwilangana dya luse to. Ndikudimuna dya mucima difumina ku ditwishiibwa.

<sup>199</sup> Tangilaayi masangisha aa, batangadiki banene aba, ne nansha mene mu mudimu wanyi wa bwambi mupwekele ewu, kacyna cinguumusha mêmè to. Misangu mikwabo, ntu bu ne ndi ndyumvwa bundu, pântù mpatuka apu. Ncya bushuwa. Cidi cikéngelà bwa twètù kwenza ncinyi? Kwimana ne kwenza mabiikila a ku cyoshelu biikàle tubatwishisha. Bânà bakese baa bakaji bàbànda kuntwaku, ne bônso benda bacyankunyangana ne bàzòkà, bamba ne: “Wamonu anyi? Wamonu anyi? Mêmè ndi nya’s. Uh-huh.” Bakaji aba bàlwakù, ne nsuki mibebula ne kwîsù kulaaba bilaabu, beena Mpenta, ne babwela, bapatuka, bamba mùdìbo baakule mu myakulu. Kadi kacya kabayiku balekela nsuki yabo yileepa to, kadi batungunuke anu ne kwenza cintu cimwecimwe civwabo benza aci. Peenu kungambila ne aci ndikudimuna dya mucima anyi? Adi’s ndiseka dya Nzambi. Bible mmwambe ne: “Bidi mpekaatu ne bundu pàdìbo bakosa nsuki yabo.” Mmunyi mùdì mukaji udi ne nsuki mibebula mwa kupiisha mukaji udi ne bilaabu kwîsù? S’mbipiciibwe ne baciteeleje’s. Dîbà dîlwalwa, dîikalà cisuuyi mwa kuteekiibwa ku muji kwa mucu. Ne mucu wônso wùdì kawuyi wukwama mamuma mîmpè awu newupudiibwe.

<sup>200</sup> Mbwalu kaayi abu? S’bivwa bibi, s’mbwa bayiishi, beetu baa cyena-leelu, bayiishi bàà ku dînà kaaba aka aba, musumbà munene ne bantu baa madyambi, malongolodi kî mmamanye bya Nzambi kutamba mùdì Hottentot mumanye mwanu wa beena Ejipitu wa mafuku cinunu ne bumwe to, pàkaadîbi bilwa. Badi baya kuntwaku. . .

<sup>201</sup> Anji ambaayi tũng bu bantu abu ku Mpenta baye kuntwaku bambe ne: “Mpindyewu, Yesu mmututumine diyi ne bivwa bikengela bwa twètù kubànda mwab’ewu kushaalapu too ne patudi tupeta bukole bwa ku Dyulu. Mpindyewu, bânà beetu, s’nyewu tukaadi benze mwab’ewu matuku citeema, atukaadi benze. Tùcitàbäyi’s, ku diitabuujä. Mpindyewu, tudi ne Nyuma Mwîmpè. Tupatukaayaaku, bwalu tukaadi bamane kufika mwab’ewu. Twâmanyi kwenza civwà Yesu mutwâmbile bwa kwenza”? Nunku kî nkwenzekeku dilabula nansha dikese to.

<sup>202</sup> Lekelaayi nnwâmbilèku cintu kampanda. Ndi mumanye ne eci cidi pa mukaba wa mÿyi, kadi ncyeci cilwe, nansha bishi. Teelejaayi. Ndi muswe kunwambila cintu kampanda. S’bidi byenza bundu. Bantu bateeta bwa. . . Kacyapu mêmè ncitukù ngiitabuujä ne Nyuma Mwîmpè “ndinyukushangana” to. Kacya ncitukù mêmè ngiitabuujä ne Nyuma Mwîmpè “ncileeji cya dyakula dya mu myakulu, didila dya mwadi, anyi dyela dya mbila” to. Abi mmasaluka a divwayila dya mubidi. Ndi

ngiitabuujane ne Nyuma Mwîmpè udi mwa kwenza byôbi abi. Kadi Nyuma Mwîmpè m'Bunzambi bwele ntenta munda mwebe. Ndi ngiitabuujane ne musumbà munene wa bantu bàtù bàlàka mukana bamba mùdibo ne Nyuma Mwîmpè abu, kabatu bamanye kantu nansha kamwe pa bìdì bìMutàngilà to. Wèwè udi utwilangana ne Nzambi.

<sup>203</sup> Mùdìbi ne, Dituku dya Mpenta, baakamba . . . Mpindyewu, bu mùdì ba-Baptistes leelu ewu, ba-Presbytériens ne ba-Méthodistes, nkonka ne: “Nudi nwitabuujane ne nudi bapete . . .?”

<sup>204</sup> “Kaa, eyowa’s, twètù tudi tuMwitaba, ku diitabuujane.” Ku diitabuujane, nansha kakese. Awu kí n’Yèyè to.

<sup>205</sup> Aci ndivwayila dya mubidi, wèwè munange kumona dibwela dya dîbà, wimana ne ubandila mùdì dîbà dipweka, kadi ukutula mwadi, ne binsonji bipweka, aci kí n’Nzambi to, aci ndisaluka, difùmina ku cintu kampanda cidì munda mwebe amu. Wèwè umvwa bamba bwa muntu kampanda udi usaama, anyi bwa muntu kampanda udi upunga ne lufu, wèwè ubanga kwela mbila udila mwadi. Aci kí n’Nzambi to. Aci ndisaluka dya buntu. Mmunyi mùdì Nzambi . . .

<sup>206</sup> Mémè nkaadiku mumone bantu mu dinaya dya ndundu, bapeta ne disanka dyàbûngì mu mushindu wa bafwanyine kuzakeeja mishiku, ne bikwabo byònsò. Kungambidiku abi to.

Tudi ne dijingane dya kupeta ditabuluja, lupandu. Kadi beena Mpenta badi balwa mwab’awu, basalula bantu, babambila ne: “Padibo baakula mu myakulu, baapeci Nyuma Mwîmpè.” Kadi bamwe baa kudibo biikàle ne nsòmbelu wa mishindu yònsò, paanyima paa ciine aci.

Teeleja, wèwè mwaneetu. Dituku dya Mpenta, kabivwa nanku nansha. Bòbò kabaakeeyemenaku dyakula kampanda dya mu myakulu anyi ní neinyi cyònsò to. Pàcìvwàbo mwab’awu apu, biimanyine kaaba kamwe, biikàle ne dîyi dimwe, Nzambi wakapweka, anu bya cya bushuwa ebi, munkaci mwabo. Bòbò kumona, pa mutu wa yònsò wa kùdìbo, ndimi ya Kapyà, bu mushindu ewu, milembelele kuulu lwà pa mitu yabo. Nzambi uvwa mwab’awu. Kacivwa ne: “Cìtábáyi ku diitabuujane, anyi ku disaluka kampanda” to. Baakuujiibwa tente ne Nyuma Mwîmpè, ne pashiishe baakapatuka ne baakabanga kwakula mu myakulu. Kadi, dyambedi, baakanji kutuutakeena ne Nzambi.

Ki lutatu lùdiku leelu ewu ndwòlò alu. Bantu basaluka balwa bambulukile kuulu, ne disaluka, kadi kaciyi Nyuma Mwîmpè to. Nyuma Mwîmpè m'Bunzambi bwele ntenta munda mwebe. Méyi ebe wèwè m'Méyi Ende Yèyè. Nya' nnnwambila, cidì citùkèngelà leelu ewu, ndibiikila.

<sup>207</sup> Bantu babwela, bakaji baa mushindu awu, babwela, baakula mu myakulu, baalukila pambelu. Kadi wèwè muye mu mààbò kùdìbo ne ekeleeziya yabo amu . . .

208 Mvw'a kujingaku bwa Billy wikala musòmbè kaaba aka. Ndi mufume ku dipeta mukanda mumfundila ufumina kuntu kwaka mwaba kampanda, dituku adi, mùvwà mukaji mukwabo wamba ne: "Mémè ndi wa mu bulongolodi kampanda, bunene. . ." bùdì butambe bunene bwa beena Mpenta, bulongolodi bunene bwa ba-Trinitaires. Bambemu ne: "Beetu bakaji bònsò, Mwaneetu Branham, bònsò bàtu bakosa nsuki yabo. Mémè mvwaku ne nsuki mifiike mile." Yèyè ne: "Mvwa misangu yònsò muyinange, bwalu mvwa mwitabuje ne yivwa ya kùdì Mukalenge." Yèyè ne: "Kacya ncivwaku mémè ndaaba bilaabu to. Wetu ekeleeziya ùtu ulongesha ne abi mbya cyena-kale." Yèyè ne: "Bàtu bangambila, pàmvwà ne nsuki yanyi mivunga myenze dibulu, paanyima apa, bamba ne: 'Wàmanya, udi ne ndundu wa mashinyi mupatuke mupuuya paanyima apu,' ne byònsò mushindu awu. Bamba ne: 'Wèwè's udi mwambule ndundu wa mashinyi mupatuke mupuuya—mupatuke mupuuya paanyima paa mutu webe awu apu.'" Ki kwambaye ne: "Ndekeelu wa byònsò, bayaanyi kwambaye ne: 'Bwa cinyi kuyiku ukosa nsuki yebe ayi bwa kwikala mùdì bakwabo bònsò abu?'"

Mpindyewu ndi ne mukanda wa dimwandamuna naawu.

Ûvwa wamba ne: "Ki mùdici anyi? Mvwa muteleeje wùmwe wa ku mikaba yebe ya mèyì ne, dibatiiza dya bwena Kilisto didi mu Dîna dya Yesu Kilisto." Mpindyewu, s'nudi bamanye cìikalaye mwa kupeta. Kì mmwòmò anyi? Yèyè ne: "Ngambilaanyàku, Mwaneetu Branham. Ndi ne nyoota. Ndi muswe kumanya cìndì mwenze aci."

209 Nèmmwambilè ne: "Bundu bwikalè kùdì bayeebe udi mutwe cìmpingà awu. Ne cisumbu cìdì kaciyi cineemeka Nzambi cyùdì ukuukwila naaci aci, patuka munkaci mwabo." Cya bushuwa. Nzambi kèna mwa kushintuluka to. Pàdì Nzambi wamba cintu kampanda, ncìdìYe muswe kwamba. Nansha bayiishi baa batwe cìmpingà búngì kaayi baswe kudya cibanga, bwa kupetabo bulongolodi bunene anyi cisumbu kampanda. Batùdì naabo dijinga mbayiishi baa lupandu. Balume bàdì biimana ne balekela bakaji baabo benza mushindu awu abu, ndi ne dyeyemena dikese mu dilabula dyebe dya kwikala mwena Kilisto. Cya bushuwa. Nyingalala, bwa cyanaana ufwàfwa! Ekelekele, Nzambi wanyi!

210 Babwela mushindu awu, bakashaala beena ekeleeziya ayi, ekeleeziya ya Mpenta, bapatukamu cibi kabayiku bashintuluka to nansha kakese; bàshààla cintu anu cimwecimwe aci, kabayiku mwa kutentemuka nansha katupa kakese. Kaa, luse we! Ncinyi ciine aci? Ba-Izabela baa cyena-leelu. Kùtu mukaji anu umwepele mu Bible ukààdikù mudilaabe bilaabu kwisù, ne Nzambi kumudiishaYe kùdì mbwa. Ba-Izabela baa cyena-leelu biikàle bakoka ba-Aakaba baabo babapye mu nshingu wa muteelu, kalumelume kònsò kaa cilùmaacikàjì kààlekèlè

mukajaaku wenza nanku awu aku, ùvwàla tuputulu ne bikwabo, kadi kupatuka apa mu mùsèsèsù muvwale tulàmbà tumwonye ndendende yêyè mushaale bu saucisse mulamika dikoba mushindu awu. Nenku baya. . . Ncyêna ngamba nanku bwa kuneka to. Ewu kî mmwaba wa kwenzela mineku to. Eci n’Dìyì dya Nzambi. Ndilelela. Cya bushuwa. Wènda ùpweka ne mùsèsèsù, ne nkanzu mumwonye ndendende, pambidi apu, mu mushindu wa kàciyi mwa kwenda to. Dîbà adi, muntu mulume kampanda wamba dìyì pa bwalu bwende, kadi wèwè kuswa bwa kumulwisha mvita. S’bivwa bikengela bwa wèwè mwine awu kukubangulaku mapi mu mbanga amu, s’ncyà bushuwa, bwa paudi mumulekele ùcyènza apu. Bidi bileeja ne wèwè udi mwenjiibwe ne cinyi. Aci’s ncyà bushuwa menemene.

211 Cìdì cìtùkèngelà ng’Evanjeeliyo. Nzambi, juulaku muntu kampana mu cyalu udi walukila buludi ku Dìyì. Nzambi ùtu mwambe ne kacyena nansha cintu cya kaneemu to bwa muntu mukaji kulwaye mene mu ekeleeziya ne kusambila mwikàle ne nsuki mikosa. Ne mukaji udi ukosa nsuki yende awu, ùdì. . . mulume udi ne bukenji bwa menemene bwa kushipa nende dibaka. Awu mmukaji wa ufwishangana bundu. Ki mùdì Bible mwambe nanku. Yèyè udi ufwishà bayende bundu. Yèyè udi mwa kwikala kayi mucimanye to. Mukaji kana yònsò udi uvwala kaputulu udi ufwishangana bundu. Yèyè mmufwanyine kwikala kayi mucimanye to. Wèwè inàbànza, ncyèna nkeba bwa kukutapa ku mwoyi to. Ndi nkeba bwa kukusungila ku dijiba kampanda dya kapyà, ne ku iferno. Nyingalala!

212 “Ee,” mùdì wamba, “mêmè’s ndi ne Nyuma Mwîmpè.” Cìbì wenza maalu nanku’s, mwikàle ne Nzambi mwele ntenta munda mwebe, Nzambi mwine utu mwambe ne kwenji nanku awu awu?

213 “Ee,” mùdì wamba, “mêmè’s nkaadi mwakule mu myakulu.” Mêmè nkaadi mumonemone démons yakula mu myakulu. Nkaadi mumone, mu Afrike, banwina mashi mu kabalubalu kaa mutu wa muntu, kadi kwakula mu myakulu ne kusoka dyabulu. Nkaadiku mufike mu bituudilu bya baloji bakaji ne baloji balume, mùvwàbo baakula mu myakulu ne bayandamuna. Nkaadiku mumonemone crayons miteeka pa meesa ne yifunda mu myakulu myenyi, ne muntu awu ulwapu, uyandamuna. Cìvwa cilelela. Kungambidiku bwa myakulu nansha. Tudi naayi bûngi bupitepìte mpindyewu.

Nansha nanku, ntu ngiitabuujà ne Nzambi ùtu ne mwakulu mwenyi. Ntu ngiitabuujà ne Nzambi ùtu wakula mu myakulu myenyi, kadi kanwikadi beeyemene aci to. Pòlò wakamba ne: “Nansha mêmè ngaakula mu myakulu ya bantu ne ya Banjelo, kadi nciyi ne Nyuma Mwîmpè to, nciidi anu cintu cyanaana. Nansha mêmè mwa kutentemuna mikuna. . . .”

214 Bantu bààbûngì bàtu bateeta kwamba ne: “Kaa, *ewu*’s mmulume munene wa Nzambi. Bivwa bikengela bwa wêwê kumona bishima binene abi.” Mona’s, démons s’yîtu yondopa . . .

Démons yîtu yipatuka yikenza bintu bya mushindu awu. Ntu mumanye baloji bakaji bàtù bàpâtukà, ne bintu bya mushindu awu, mwikàle mudìjìngile kaalubondya kaa pa cyâdi mushindu *ewu*. Bèèlamù mfranga. Yèyè udi utuula nsuki ya mu dikoshi mwende ayi, ùyìjìnga uyitwa mu mashi ne uyikupamu. Ne bòbò bantu abu mbantu baa meeji matooke, biikàle biitabuuja. Kì mmuntu awu to. Mbòbò bantu abu bàdi biitabuuja ne bàdi baseemena kùdi Nzambi, kupicila ku muloji mukaji awu.

215 Yesu kaakambaku ne: “Bààbûngì nebalwe Kùndi mu dituku adi, bamba ne: ‘Mémè ntu mwenze tumpanye tunene twa dyondopa’” anyi? Aci kî ncimanyinu to. Ncimanyimu cya ne tudi ku nshikidilu. Yesu kaakambaku, mu Maataayi nshapita wa 24, lwà ku mvensa wa 24 aku, kabidi, 24.24 anyi? Neku Wákamba ne: “Baprofeta baa mashimi nebajuuke ku matuku a ndekeelu ne nebaleeje bimanyinu binene mu mushindu wa bafwanyine kuseeswisha Basungula mene bu ne bivwa mwa kwenzeka.” Kadi Basungula mbiimanyine pa Dîyì. Bòbò mbamanye cìdi cimanyinu cilelela.

216 Mmunyi mùdi muntu, udi wenza bintu ebi awu, udi uvila Diitabuuja dya Nzambi awu, mwa kwamba mudiye muprofeta wa kùdi Mukalenge? Nansha twamba mwine mmunyi mùdi muntu mwa kwenza aci’s?

Yèyè mmufwanyine kwikala muprofeta, wa bwena bàvwà kuntu kwaka mu bikondo bya Aakaba ne Yehoshafata abu, pàakajuukà Miikà apu. Kadi’s bavwa ne mukwabo kuntwaku uvwa yèyè mwimane pa Dîyì, Eliya. Dîyì dya Mukalenge divwa difunda ne, Aakaba uvwa ne cya kufika ku ndekeelu wende, ne cikeena-kumona cya Eliya’s civwa cikumbanangane ne cyôci aci.

217 Neku muntu kana yònsò, muntu kana yònsò udi udibiikila ne ngwa nyuma anyi ne mmuprofeta, ùdi witaba ne Dîyì dyònsò dya *Eci* ndilelela. Mmunyi mudiye mwa kwikala Trinitaire? Mmunyi mudiye mwa kubatiiza mu dînà dya “Taatu, Mwânà, ne Nyuma Mwîmpe,” kadi kwamba mudiye mulaaba kùdi Nyuma? Mmunyi mudiye mwa kulongesha bantu cilema aci, kadi kutungunuka anu ne kwikala mulaaba kùdi Nyuma? Kabyenaku mwa kwenzeka nansha. Ncintu cìdi kacìyi mwa kwenzekaku to.

218 Ndi mfika ku dyumvwa ne aci kî ncya mwasàkànaayi to. Kadi katwena twêtù baswe bwa kwikala bamanyike to. Nudi baswe kwikala ne meeji matooke.

Mpindyewu, Izabela ne ba-Aakaba. Eyowa’s, mukalenge.

219 Bwa cinyi, bwa cinyi badi bacyenza? Bwa cinyi bakaji abu badi benza, balama nsuki yabo mibebula ayi, ne badilaaba bilaabu, ne bapatuka bavwale tuputulu dîbà dîdi bantu balume

bavwila mwaba awu apu, ne bintu bya nanku awu, baabayaabo bacyenza? Mbwalu kabeena ne muprofeta mulelela mu cyambilu cyabo to, bwa kubambilaye Bulelela. Bàtu babambila ne: “Ee, kakwena dishiilangana to. Bidi anu bîmpè. Kanwena ne cya dyanza ne *aci* to.” Nwênù!

<sup>220</sup> S'n'Dîyì dya Mukalenge. Bible mmwambe ne: “Mukaji kana yônsò wawwala civwalu cìdì cikumbanyine muntu mulume awu ncinyangu kumpala kwa Nzambi.” Nzambi kàtu ushintuluka nansha. Mmunyi mudiYe mwa kushintuluka kadi kwikala Nzambi? Yêyè ngwa kayi mikalu.

<sup>221</sup> Bidi bibakengela muprofeta udi mwa kubambila ne aci ncimanyinu cya nshiikidilu. Bible mmwambe ne bavwa mwa kucyenza. Yeshaayi, nshapita mwi5, mmwambe ne bakaji bavwa mwa kucyenza ku matuku a ndekeelu. Menemene. Pa nanku, ki bwalu mbwòbù abu.

<sup>222</sup> Kadi bôbò badi bamba ne badi ne muprofeta mu cyambilu, mwikàle uciina Dîyì dya Nzambi. Kayi... Yêyè udi uciina disangisha.

Tusambilaayi bwa Nzambi atutumineku Bukênkè bushiishe abu, Bukênkè bwa diloolo abu, atutumine uvwaYe mulaye bwa kutuma awu, bwa kutumina Ekeleeziya musungula, wíkala mwa kubambila cidì Bulelela ne ncinyi, ne kwimana pa Dîyì dya Nzambi. Izabela ne ba-Aakaba, dîbà adi nebabatapulule. Aci kadi ki menemene's.

<sup>223</sup> Vulukaayi pààkabangà bakaji kwenza maalu mushindu awu. Mpindyewu anji alukilaayiku anu paanyima ndambu, pààkabangàbo kukosa nsuki yabo ne kwenza maalu mushindu awu apu. Pààkabangà bakaji kwenza maalu mushindu awu, mmu cikondo aci ne mu muvù awu awu mùdì Eliya mu matuku a ndekeelu ne cya kumweneka mu cyalu ne cimanyinu cya cikondo cya nshiikidilu, mwikàle ne cimanyinu cya cikondo cya nshiikidilu bu mwakadici mu matuku a Lota. Nwamonu anyi? Cimanyinu cya cikondo cya nshiikidilu; pàdì bakaji babanga kwenza maalu mushindu awu. Mushindu awu ngùdìbo benza maalu mpindyewu. Pa dîbà adi mpiikalà Elisha awu ne cya kumweka mu cyalu, ukebulula ne ubiikila, utandisha ne uupula, cya bushuwa, mwikàle ne cimanyinu cya Nzambi cyenda cimulonda, mutungunuke wenda uya. Kadi kaakubiikila musumbà munene nansha. Bible mmwambe ne: “Kuciinyi to, kasumbu kakese kaa mikooko, ndiswa dya Taatù wenu bwa kunupeesha Bukalenge.” Ncya bushuwa. Ncya bushuwa menemene.

<sup>224</sup> Bikengela bamubenge kùdì bônsò pa kuumusha kasumbu kakese kaa mikooko aku, bwalu yêyè udi anu bu Eliya ne nkama yende mwandamutekete ayi, ne Yone ne kasumbu kende kakese kaa mikooko aku. Eyowa's.



225 Nudi numona mwaba wutudi biimane leelu ewu anyi? Bidi bikengela bwa twètù kwalukila ku Mpenta wa ku cibangidilu. Bidi bikengela bwa twètù kwalukila ku bintu bya Nzambi. Bidi bikengela bwa twètù kwalukila. Mwaneetu wa balume, mwaneetu wa bakaji, kwikadi museeswishibwe mu dilabula dyebe adi to. Tudi—tudi bindile dyòdi dîbà adi.

226 Kwikadi mwa kwangata anu ne: “Ndi—ndi ntekemena nanku. Ndi ngiitabuuja ne, ku diitabuuja nkùndi muMwitabe” to. Kwenjiku aci to. Twilangana ne Nzambi, mpala ne mpala, ne uujiibwa ne Nyuma, nenku dîbà adi umone cìdi cyènzekà. Kadi nyuma udi munda mwebe awu yèyè ubengangana ne Dîyì edi, nanku shiyanganà ne nyuma awu. Nda ukangate. . . Lomba Nzambi akupeeshe Nyuma Wende, dîbà adi.

227 Pààjuukà Nyuma ewu mu dituku dya ndekeelu, neCùikalè didimwiya dilwishangana naabo, bàdi baa mafi abu. Nwamonu anyi? Bwalu, Yone wakamba ne: “Kanwedi meeji bwa kwamba munda mwetu twètù biine ne twètù. . .ne nwènù nudi ‘ne Abraham bu taatù wetu’ to.” Twètù tudi ne. . . Twètù tudi. . .

“Twètù, baatatwètù bavwa ba-Méthodistes, ba-Baptistes, ba-Presbytériens, anyi beena Mpenta.” Kanwediku meeji bwa kwamba ne, nwènù, “Nzambi,” ne nudi bânà baa Abraham to, bwalu ku mabwe aa Nzambi udi ne bukole bwa kujuudila Abraham bânà. Kanwedi meeji ne bwalu nyawu nudi beena Mpenta, ne nanku nebanufwile luse to. Nansha kakese. Nzambi ku mabwe aa udi ne bukole bwa kujuudila Abraham bânà. Aci ncyà bushuwa menemene. Eyowa’s, mukalenge.

228 Amba wèwè anu Dîyì dya Nzambi, mu bulelela bwa dituku dya ndekeelu, ki cìdi ciprofeta cyende.

229 Nwènù baswe. . .ndekelaayiku mbuulule anu cyanaana kaaba aka mu katanci kakese cyanaana, lekelaayi nnuleejeku mutùdi mwa kujandula. Ndi ne Mifundu búngì cyanaana mifunda kaaba aka. Ndi mfuma ku diYiteela. Ndi muswe kunubadila umwepele. Kuumukila, twánji, dyambedi, twánji kwangata. . . Twangataayi Dutelonoma, nshapita wa 18, nenku netujandule, katanci kakese cyanaana. Anu bwa, kumpala kwa twètù kujikija kaaba aka, bwa mmoneku mwa kunubadila Mufundu ewu. Mu Dutelonoma, nshapita wa 18, eyo, nenku twánji tumonaayi mpindyewu. Mvensa wa 20 wa nshapita wa 18, Dutelonoma, 20:

*Kadi muprofeta, wadicinkila bwa kwamba dîyì mu dînà dyanzi awu, dîndi mêmè nciyi mumutumine dîyì bwa kwambaye adi, anyi wákula mu dînà dya nzambi mikwabo awu (ku búngì), nansha yèyè muprofeta awu neafwe.*

Ncya bushuwa. Mufwe mu nyuma. Eyo. “Musuuka wùdi wènza mpekaatu awu, newufwe.” Tudi ne Nzambi umwepele, kayiyi “Nzambi” yàbùngì to.

*Netumanye munyi wamba munda mwa mwoyi webe ne:  
Netumanye munyi dîyì didì MUKALENGE kayi...kayi  
mwambe?*

“Netumanye munyi? Bòbò’s nebìikalèku bùngì cyanaana, netumanye munyi? Ewu wàmba *cikampanda*, mukwabo wàmba *cikansanga*; bu mùdìbi ne umwe udi wàmba *cikampanda*, ne mukwabo mwambe *cikansanga*, ne bikwabo.” Mpindyewu tangilaayi. Twètù tudi bamanye.

*Pàdi muprofeta wakula mu dîna dya MUKALENGE, cintu  
cyôci kacîyi cìlonda to, anyi kacîyi cyenzeka to, aci  
ncintu cìdì MUKALENGE kayi mwambe to, kadi muprofeta  
awu mucyâmbè mu didicinkila; wêwè kumuciinyi to.*

<sup>230</sup> Pùikalà Nzambi kayi mucyâmbè to, dîbà adi kuciciinyi to. Cyôci, bidi anu bîmpè, nda wêwè anu kumpala kadi ucipwe mwoyi. Nwamonu anyi?

<sup>231</sup> Mpindyewu tangilaayaku bitùdì twètù tuumvwa leelu ewu ebi. Twitabaayi wa Bapostolo, twitabaayi wa ba-Méthodistes, twitabaayi wa ba-Baptistes, twitabaayi wa beena Mpenta, twitabaayi, twitabaayi, twitabaayi. Twitabaayi ncinyi? Nudi nucipetela penyi? Ndi ngeela nî nganyi nî nganyi yònsò kadyombo bwa kundeejaye Twitabaayi wa Bapostolo mu Bible. Mèmè ndi ngiitabuuya ne kakwenaku cintu cya mushindu awu nansha cimwe to.

Bu ne bapostolo bavwaku ne twitabaayi kampanda kuvwabo beele nzadi, nyêyè ewu: “Nyingalalaayi muntu ne muntu wa kunudi, ne nubatiijiibwe mu Dîna dya Yesu Kilisto bwa dilekelediibwa dya mpekaatu yenu, nenku nenupete kupà kwa Nyuma Mwîmpè. Bwalu mulayi udi kunudi.”

Kanwenaayiku numona mwaba wutùdì anyi, nwênù balunda baanyi? Tudi tusanganyiibwa mu ngiikadilu mubi be wa wukwacisha bwôwà. Ncinyi ciine aci? Cîmanyinu cilelela cìdìbo bapange kumona.

<sup>232</sup> Mpindyewu, nudi balume ne bakaji, bààbùngì baa kunudi, ne nudi bânà baa Nzambi. Kanupangiku kucimona to. Vulukaayi ne twètù mbàdì ne cya kwikala ne bintu ebi. Bidi ne cya kwenzeka mu dituku edi, mu dîbà ditudi ne mwoyi mpindyewu edi. Ki dîbà adi ndyôdì edi, kumpala menemene kwa Dilwa dya Maasiya, kudi ne cya kwikala dimanyisha dipatukila kùdì Nzambi.

Lekelaayi nnuhadileku cyôci aci. Twalukilaayi ku Maalaki. Ki wa ndekeelu wa Dipungila Dikulukulu, kadi teejejaayi cidìYe wamba mu Maalaki emu. Pashiishe netwikalè. . . Teejejaayi eci bwa katanci kakese cyanaana.

Mpindyewu, nwênù bamone, Maalaki 3, wamba cyàkambà Yesu bwa dilwa dya Yone:

*Monaayi, Mêmè nêntumè musanjeela wanyi, ne yêyè nealongolole njila kumpala kwanyi; nenku Mukalenge, unudi nukeba awu, nealwe dyakamwe ku ntempelu wende, musanjeela wa cipungidi mene, unudi nusankila awu; monaayi, yêyè nealwe, mùdi MUKALENGE wa bilwilu wamba.*

<sup>233</sup> Awu uvwa n'Yone, umanyisha dilwa dya Yesu. Nenku Yêyè wakalwa ku ntempelu, anu menemene cyakambaYe, Musanjeela wa cipungidi, Mwanjelo uvwa ne. . . mu cipeela ne—ne bayiidi awu, anyi ne Izaleela. Nudi nwitabuujja ne Yêyè uvwa Musanjeela awu anyi? Ee, Yêyè wakamba ne: “Ndi mufume ku Nzambi, ne Ndi nya ku Nzambi.”

<sup>234</sup> Mpindyewu, Pòlò wakatwibwa dîsaamà bwa cinyi? Bwa kumulamina panshi.

Paanyima paa Yesu mumane kufwa, ne mujiikiibwe, ne mubiike ku lufu; paanyima paa ntanta mule, Pòlò kutuutakeenaye Nende, mpala ne mpala, mu njila wa ku Damaseke. (Wakamba ne: “Ndi mufume ku Nzambi, ne muye ku Nzambi.”) Pòlò kutangilaye muulu. Kuvwa Bukênkè bunene mwaba awu, Dikunji dya Kapyà dimwedimwe adi. Nudi bamanye cîndi ngamba aci anyi? Dikunji dya Kapyà dimwedimwe adi. Ki Pòlò kwakulaye Nende, ne Yêyè kwandamunaYe Pòlò. Bantu abu kabavwa baMuumvwe to. Kabavwa baMuumvwe to. Kadi Pòlò yêyè uvwa muMuumvwe. KwambaYe ne: “Shawula, Shawula, udi uNkengesha bwa cinyi?”

Yêyè ne: “Wêwè udi Nganyi, Mukalenge?”

<sup>235</sup> KwambaYe ne: “Ndi Yesu. Mpindyewu juukaaku ubwele mu mùsèsù wùdibo babiikila ne m'Mululame awu. Nebakwambileci kubangila apu. Ndi ne muprofeta wâlwanù bwa kukwambila cya dyanza, udi umona's. Ne mushindu wa . . .”

<sup>236</sup> Pòlò wakapwekamu, kubatiijiibwaye, ne kusokaye Mukalenge, kupetaye Nyuma Mwîmpè.

Nenku Pòlò mmwambe ne: “Mvwa mupete butekete bwa mubidi, bùvwà bumpeebwe, démon kampana, musanjeela wa dyabulu, uvwa *untuuta bisûsù wambakaja*,” aci's ncyenze bu, “bisûsù pa bisûsù.” Yêyè uvwa mwa kuumvwa bîmpè, ne pashiishe wâlukilamù, umukuma cyakabidi. Yêyè kwamba ne: “Mêmè kukonka Mukalenge misangu yisatu, bwa kudinguumushaYe, kadi Mukalenge kwambaYe ne: ‘Pòlò, ngàsà Wanyi mmukukumbane.’” Pashiishe kwambaye ne: “Bwa ncilu kudibândisha kuulu. . . bûngi bwa mabuulula.”

Yêyè uvwa mupete byàbûngi, ku dibuulula, kutamba Peetelo, Yakobo, Yone, anyi nî nganyi yônso wa kudibo. Yêyè

wakaMumona paanyima paa Yêyè mumane kuya kukaavwa pàmwápa bidimu bibidi, anyi bipite apu, mwimane mu Dikunji dya Kapyra, uyiikila nende. Mushindu mwine ùdici citambe bunene leelu ewu's we, paanyima paa bidimu binunu bibidi, kadi Yêyè mucikàle anu ne mwoyi! Amen.

<sup>237</sup> Kwambaye ne: “Mbimpeebwe, bwa ncilu kudibàndisha kuulu, ngamba ne: ‘Mpindyewu, mwaneetu, mêmè’s ndi kumutu kwenu bõnsò. Nwamonu anyi? Mêmè—mêmè ndi muMumone paanyima paa Yêyè mubiike ku bafwe, ne mêmè kuyiikila Nende. Ndi...’ Bwa ncilu kudibàndisha kuulu kwaka, kùvwà cintu kampanda cimpeesha, bwa kundama mudipwekeshe.” Eyowa’s.

<sup>238</sup> Yêyè ngwâkabàmbila bwa kubatijiibwabo cyakabidi, cyakabidi, mu Dîna dya Yesu. Mwambe ne: “Mwanjelo yêyè mufume mu Dyulu...”

<sup>239</sup> Kwambaye ne: “Mêmè ncyâkabànda kuya ku bilongelu byabo abi to, kwõnsò kùvwâbi bisanganyiibwa aku.” Yêyè ne: “Ncyakaya dyakamwe ku Yelusalema to, munda mwa bidimu dikumi ne binaayi.” Yêyè ne: “Mêmè kupweka mu Ejipitu, mu Asie mwamwa.” Nnku yêyè kukonka Mukalenge, mwikàle ùsanganyiibwa kuntwaku bidimu bitwe ku bisatu, mwikàle ùlonga Dipungila Dikulukulu, kumonaye ne byõnsò bivwa bipetangana. Paakaalukilaye, paanyima paa bidimu dikumi ne binaayi, kutwilanganaye ne Peetelo ne bakwabo abu, ne yêyè uvwa ne Evanjeeliyo anu umwèumwè awu, mubatiize mushindu wumwewumwe awu, ne mwenze cintu anu cimwecimwe aci. Amen. Wâkamanya ne civwa cya bushuwa. Eyowa’s, mukalenge.

<sup>240</sup> Teelejaayaaku Maalaki mpindyewu, kaaba aka, Maalaki 3. Mpindyewu, nwènù ne mushindu, ndekelaayi nmutookeshileku cyôcì eci. Ndi ngeela meeji... Tubuululaayi anu bipeepele menemene mpindyewu mu Maataayi nshapita wa 11, bwa tumonebi ní ndi... ndi mwa kwamba cyôcì eci bibi, ndi ngeela meeji ne ngâcipecì, mbifwanyine kukengela bwa mêmè kwanji kutangila bwa kucimona. Maataayi 11. Tumonaayibi. Tubangilaayi ku:

*Nenku byakenzeka ne, pàakamanà Yesu kwenza dijikija dya ditumina dyende dya bayiidi bende dikumi ne babidi diyè, yêyè wakuumuka mwaba awu bwa kulongeshaye ne kuyiishaye mu bimenga byabo.*

*Nenku... Mpindyewu pàvwà Yone... paakumvwaye ne yêyè ùvwa... mu buloko byenzedi bya Kilisto, ùvwa... buloko byenzedi bya Kilisto, wâkatuma babidi baa ku bayiidi bende,*

*Ne baakamwambila ne: Wêwè ki yêyè uvwa ne cya kulwa awu anyi, anyi twindile mukuwabo?*

Dîsù dya mukanku dya Yone dikaavwa dijibàle, mu buloko amu. Nwamonu anyi?

*Yesu wakandamuna e kwambila yêyè awu ne: Ndaayi, nukaleejaayi cyakabidi Yone bintu ebi binudi wêwê. . . nuumvwa ne numona.*

“Yone awu mmuprofeta padiye apu. Nenku yêyè—yêyè muumvwe byôbi ebi, bya ku bìdi munkaci mwa kwenzeka ebi, yêyè awu neamanye ne Mêmè ndi Nganyi.” Nwamonu anyi? Wàkamba ne:

*Mpofo yidi yitabala, . . . balema badi benda, beena nsudi badi bakezudiibwa, . . . mpudimaci yidi yumvwa, ne bafwe badi babiishiibwa ku lufu, . . .*

“Ne mangumba ônsò mmadisange” anyi? Kî ncyambe nanku to, mmwômò anyi? Bwâlâ. Kacyena cyamba nanku to. Ncyambe ne:

*. . . balema badi benda, beena nsudi badi bakezudiibwa, . . . mpudimaci yidi yumvwa, ne bafwe badi babiishiibwa ku lufu, ne bapele badi bayiishiibwa evanjeeliyo.*

Ki cimanyinu ncyôci aci. Tangilaayi:

*Ne paakayabo . . .*

*Ne wa dyakalenga, ngudi kayi. . . ulendwishiibwa bwa bwalu bwanyi to.*

Mpindyewu tangilaayi: “Wa dyakalenga ngudi kayi ulendwishiibwa bwa bwalu Bwanyi to,” mu ngaakwilu mukwabo, anyi ne, “ùMfwa bundu. Wa dyakalenga ngwíkala kayi mwa kuMfwa bundu to.” Nwamonu anyi?

*. . . paakuumukabo, Yesu wakabanga kwambila musumbà wa bantu awu bwa Yone ne: Cinuvwa baye kamona mu cipeela ncinyi?*

Tangilaayaaku muprofeta ewu mpindyewu:

*. . . Cinuvwa baye kamona mu cipeela ncinyi? Dilenge dinyungisha kùdi lupeepele anyi?*

Yone to. Kaa, to. “Nwênù lukongo lwa nyoka mu mashinda,” mùvwàye yêyè wamba mangumba awu, “nganyi wanudimwiji bwa kunyeema cijji cikole cilwalwà? Kanubangi kwamba ne: “Twêtù tudi beena *cikampanda* ne beena *cikansanga* to, bwalu Nzambi udi ne bukole ku mabwe aa bwa kujuula bânà.” Kaa, mwaneetu, kacivwa dilèngè dinyungisha kùdi lupeepele to, bwende yêyè.

*. . . Dilèngè dinyungisha kùdi lupeepele anyi?*

Anyi *cinuvwa baye kamona ncinyi? Muntu muvwale bivwalu binefuke* anyi? (Wa ùkèngela kushintulula bilàmbà misangu yibidi anyi yisatu pàdiye uyiisha apu anyi?) *monaayi, aba bàtù bavwala bivwalu binefuke, binefuke batu basanganyibwa mu nzubu ya bamfumu.*

Abu mbambi bàtù bapatuka baya katwa bânà baa mu maboko mishiku, nudi bamanye's, ne—ne baswika mabaka a bansongà, ne—ne baya mu tulaasa bakenza miyiiki ya mamanya a mu mitu, ne, nudi bamanye's, tukwabo tuubintu twa bu cìlùmààcìkàjì etu. Nwamonu anyi? Nwamonu anyi? Yèyè kàtu ùkùpa eku ne eku mwele wa mvita wa bakwata ne byanza bibidi pambelu apa ku mwalu wa mvita to. “Cinuvwa baye kamona ncinyi, mmulумыana kampanda wa mushindu awu awu anyi?” Yèyè uvwa . . . Ki mudiYe ubakonka.

*Kadi cinuvwa nwênù baye . . . kamona ncinyi? Muprofeta anyi? (Teelejaayi.) eyowa, ne ndi nzwambila ne, mutambe ne muprofeta.*

Eyowa's, mukalenge. Yèyè uvwa cinyi? “Udi wèwè wamba mudiye ‘mutambe ne muprofeta’ anyi?” Yèyè's uvwa muprofeta, mupite ne apu. Yèyè uvwa musanjeela wa cikondo aci.

*. . . cinuvwa baye kamona ncinyi? Muprofeta anyi? eyowa, ndi nzwambila ne, mutambe ne muprofeta.*

*Bwalu yèyè ewu ki, . . . wàkafùndabò ne: Monaayi, ndi ntuma musanjeela wanyi kumpala kwanyi, . . . bwa kulungololaye njila kumpala kwanyi.*

Tangilaayi mu Maalaki 3 emu. “Monaayi, Ndi ntuma musanjeela Wanyi kumpala Kwanyi.”

<sup>241</sup> Tangilaayi. Mpindyewu, Maalaki 4, ndekelaayi mbale eci. Yèyè awu nealwe cyakabidi.

*. . . monaayi, dituku dilwalwa, diikalà mwa kwosha bu cikutu cya kapyà; ne baditambishi bònsò, eyowa, . . .*

<sup>242</sup> Awu's ndeelu ewu. Ndi mpweka ne mùsèèsù mmona bantu abu. Udi mwa kuyiikila naabo, kadi bôbò bakuseka, bakwelulwila. Ntu ndyambidila ne: “Ncinyi ciine eci's?”

Dituku adi, mvwa ngenda nya, ngenda mpweka, ku luseke lwa mwaba wa cisòmbedi cya bantu bònsò eku. Mvwa munkaci mwa kuyiikilangana ne bantu kampanda, kadi bôbò kwamba anu ne: “Akàà,” bumba baasa ne lwendu mbôbò bàyaayà bàba.

Cintu kampanda kungambilaCi anu ne: “Abu ntuzoolo twa kumanabo naatu mikiiya ne bômbè bwa mushinda, abidi adi panshi aa bôbò nebiikalè butu butangalaja panshi. Bàlekèlè. Wèwè wàmányì kubambila cyùvwà naaci. Dilongòlòlè upatuke kiine kaaba aka.” Aleluuyah! Kabivwa bikengela bwa mème kwikala mwambe ciine aci to, ngeela meeji. “Udilongolole. Swika mukaba webe mu cifuka. Ùndi mbikiila ngwèwè.” Ki bwa cinyi ndi mwindile's.

*Bwalu, monaayi, dituku dilwalwa, diikalà mwa kwosha bu cikutu cya kapyà; eyowa, baditambishi bònsò, . . . ne aba bònsò bàdì benza maalù ne lwonji, nebiikalè bu bikolakola . . .*

Ki cìikalàku menemene ncyôci aci. Cìdi cyènzekà ncinyi pàdi dinene. . .bamwe baa kunudi nwênù baabidime; pàdi mudilu mukole wulenga budimi bwa blé, pakaadibu bushaale anu bikolakola pa byôbì apu? S'wùdi wùbùshiya anu butubutu, ne butu bwenda bulonda. Ki cyènzekà ncyôci aci, pàdi aci, pààdikumàci.

*..dituku dilwalwa diikalà mwa kuboosha kubashidisha, mùdi MUKALENGE wa bilwilu wamba, mu mushindu wa ne kadyakubashiilaku nansha muji anyi ditamba nansha.*

Kakwakushaalaku kantu nansha kamwe kaabo bôbò to.

*Kadi bwenu nwênù bàdi baciina dinà dyanyi Dibà dya bwakane nedijuuke diikalè ne dyondopa mu mapwapwa àdi; . . . nwênù nenupatuke, ne nenukole bu mùdi twânà twa ngombe mu cikumbi.* (Ki Bukalenge bwa bidimu cinunu mbwôbù abu.)

*Nenku nwênù nenyate beena lwonji ku makàsà; bwalu bôbò nebiikalè butu mwinshi mwa bidyacilu bya makàsà enu mu dituku adi dîngènzà bwalu ebu, mùdi MUKALENGE wa bilwilu wamba.*

Bàpàtuka, mu Bukalenge bwa bidimu cinunu. “Butu bwa beena lwonji.”

*Vulukaayi. . .mikenji ya musadidi wanyi Mòsà, yîngààkamutùminà dîyi. . .mu Holèbà bwa Izaleela mujima, bu mêyi ne mikandu.*

Mpindyewu, teejeayi ne ntema mpindyewu.

*Monaayi, nennütùminè kunùdi Eliya muprofeta kumpala kwa dilwa dya dituku adi dinene ne dîdi dikwacisha bwôwà dya MUKALENGE:*

<sup>243</sup> Mpindyewu, awu kavwa mufwanyine kwikala Yone nansha. To, bwalu buloba bùvwa bufwanyine kwikala bubutudiibwe mwine musangu awu. Kadi ki Yêyè ewu mwambe, mu Maataayi 3 ne, Ûdi utuma musanjeela kumpala Kwende. Ne Yesu wakamba ne: “Ki yêyè awu Eliya uvwa ne cya kulwa, bwa kulongolola njila kumpala Kwanyi.”

“Kadi kumpala kwa bômbè bunene bwa mushinda ebu kudikumabu, Mêmè nennütùminè Eliya muprofeta.”

*Ne yêyè neakudimune myoyi ya baataatù bwa kuyaaluja kùdi bânà, ne myoyi ya bânà kùdi baataatù abu, bwa ncilu kutuuta buloba ne mulawu.*

<sup>244</sup> Kwamba ciprofeta, mu dituku edi.

Kadi mpindyewu wêwè udi wamba ne: “Kaa, awu Eliya, awu uvwa ne cya kwikala Yone.” Musanjeela wa cipungidi uvwa n’Yone, cya bushuwa. Bwa aci ncyà bushuwa menemene. Yèsù wakamba nanku, ne mucijaadike kaaba aka ne: “Ki yêyè ùMvwà

mwambe awu.” Kadi, nudi numona’s, yêyè kavwa mufwanyine kwikala Eliya uvwa ne cya kulwa awu to. Nwamonu anyi? Kavwa ne cya kwikala yêyè to. Bwalu, nudi numona’s, bu ne ùvwa nyêyè, dîbà adi’s ciprofeta aci civwa cya mashimi; buloba kabwakabutudiibwa musangu awu to. Nwamonu anyi? “Kadi kumpala kwa dituku dinene ne didi dikwacisha bwôwà dya Mukalenge adi kulwadi, Mêmè nênnütùminè Eliya. Ne yêyè nealujulule,” tangilaayi dilwa dyende dya kumpala adi, “myoyi ya baataatù kùdi bânà.” Aci ki cyakenzaye, dyambedi, wàkatwàla mukenji wa cipungu cipyacipya, dilwa dya Kilisto mpindyewu, ùkòka baataatù baa ngiitabuujilu wa cyena kale abu ubuumusha ku ngiitabuujilu wa cyena kale awu, ubabweja mu diitabuujia dipyadipya divwà difuma ku dilediibwa adi.

Pashiishe padiye ulwa musangu mwibîdi: “Ne myoyi ya bânà uyaalujia kùdi baataatù baa ku mpenta, Mukenji wa ku cibangidilu awu.”

<sup>245</sup> Mpindyewu ndaayaayi mu Bwakabuulwibwa 3 emu, nenku nenucimone cyakabidi mwab’ewu mene. Pa nanku, ncyambiibwe mu ciprofeta. Tudi ku cikondo cya nshiikidilu, mwaneetu. Ncya bushuwa.

<sup>246</sup> Byenze bu baprofeta nkama yinaayi abu babengangana ne Miiikà, bàdì bamba ne tudi. . . Tudi mu dituku dya ndekeelu adi, tudi bamanye. Muprofeta wa mashimi, ùleeja bimanyinu bya mashimi, dishààla dya wa mu mangumba. Bôbò bamba ne: “Lwâ ushaale wa mwômò emu. Tuswikakane. Lwâ ushaale wa mu wetu ekeleeziya. Lwâku ne karta keebe kaa buumambàlà aku. Tudi badilongolole mu dinda emu bwa wêwè kutentemba karta keebe kaa buumambàlà aku kukuumusha ku *awu* ekeleeziya ne kukàtùma ku *ewu ewu*.” Kaa, lukutukutu’s. Karta keebe kaa buumambàlà kiine aku kadi ne dikwacisha kaayi kùdi? Pawikalà kuyiku ne bumpyanyi mu Dyulu to, ubipwe mwoyi. Baprofeta baa mashimi nebaleeje bimanyinu bya mashimi.

<sup>247</sup> Kadi, tangilaayi, baprofeta balelela, bôbò nebashaale ne Dìyì dya Nzambi. Bimanyinu bilelela nebitwadile Ekeleeziya mulelela Dìyì dilelela dya Nzambi, ne Ekeleeziya mulelela neakidile Dìyì ne neacyonkomokelePu. Kasumbu kakese kaa mikooko aku, kààfidiibwà mu matuku a ndekeelu aku, kiiikalà kaa bàshààdilà baa Bisamba bya bende aku, nkiiikalà mwa kwangaciibwa dyamwamwa.

<sup>248</sup> Pààkalwà Yesu, kùvwa anu—kùvwa anu bakese menemene kuntwaku bààkiitabuujà. Kasumbu kakese kaa mikooko kaa Yone ki bôbò bààkiitabuujà. Yesu wakabangacila apu, kubavwija bayiidi ne kutungunukaYe. Pàvwà Eliya. . .

<sup>249</sup> Pààkalwà kabutu, pààkalwà cikondo cya Noa, yêyè uvwa cimanyinu, nenku yêyè wakabweja bantu mu bwàtù. Pààkalwà Eliya, yêyè wakapatula bantu mu cibwejàkàjì mùvwàbo



basanganyiibwa. Pààkalwà Yone...Baprofeta bônso bavwa cimanyinu, cimanyinu, bimanyinu, cimanyinu.

Kadi Yèyè mmutulaye cimanyinu mu dituku dya ndekeelu. Mu matuku a ndekeelu mmùvwà mwa kwikala cimanyinu. Ncimanyinu cidibo bapange kumona. Bantu kabeeba bacimona to. Badi bacipicila anu pamutu, kadi bacilekela ciya. Mwaneetu wa balume, mwaneetu wa bakaji, kuyi kashaala wa mu ekeleeziya nansha. Ndekelaayi ngàmbeku eci, bwa kujikija mpindyewu.

<sup>250</sup> Wèwè anu mupete dilabula dya disaluka kampanda, divwayila kampanda dya mubidi, kushaadiku mweyemene abi to. Kùcyènjiku to. Bwenu nwènù cisamba. Nudi...Cisamba ncìndi ngambila eci. Ngùmuvù bàdidisha mbota ya bisanji bya dikwata naabi mikaba ya mèyi paanyima pààpa, anu piine apu. Ndi ngambila mpindyewu Ekeleeziya. Nwamonu anyi? Teelejaayi. Kanùcyènjiku to.

<sup>251</sup> Ntu ngamba bintu bya nanku awu byàbùngì misangu mikwabo, mushindu awu, bwa ne bantu bàdi mu ditunga emu abu, baashaale ne Nzambi. Kebaayi cimanyinu cyenu cilelela aci. Nenucimone. Neciikalè pabwipi neenu menemene apu, kadi miliyò ya bantu neyipicile anu ku luseke lwàci mene aku kadi kabayi bacimona to.

Pààkalwà Yesu, kabaakaMumanya to.

Kabaakajingulula Eliya to. Nudi bamanye cyakambabo pààkabàndà Eliya anyi? Kabaakiitabuujja lukutukutu alu to. Baakamba ne: “S’ndukutukutu’s.” Bânà anu mwômò mene mu cimenga cyende ciine, muvwaye musòmbèle amu...muvwaye musòmbèle amu, muyiishile, mwenzelemu bimanyinu ne maalu a kukema anu mu citupa cya buloba aci mene, pààkalwàku lubila lwa didimwija ne: “Katwena mwa kupeta Eliya to; Mukalenge mmumwambule mu mvunda,” baakaseka cintu bu nanku.

<sup>252</sup> Ki Eliya ulwàlwa wawa, Elisha, mwikàle ne bimanyinu bimwebimwe abi pambidi pende, cifwanyikijilu cya Kilisto ne Ekeleeziya Wende. Ki Eliya ulwàlwa ewu, bimwebimwe abi; Elisha, bimanyinu bimwebimwe bivwà naabi Eliya abi, wènda upweka buludi, wènda wènda byòbì abi. Nansha mene bânà baabo bakese balela baakapatuka benda bamulonda, benda bamba ne: “Mukulumpe wa mutu dibàla wè, bwa cinyi kwèna mubànde peebe muulu bu Eliya?” Nudi bamone cyàkenzekelà bânà bàvwà bapange kaneemu abu anyi?

Leelu ewu badi baseka ne beelulwila. Kutacishiku meeji to, mwaneetu, cilumbulwidi ncilembelele mu mauulu patudi twakulangana apa. Ncifundiibwe pampala paa mwena Amerike yònsò. Ncya bushuwa. Cilumbulwidi ncilembelele mu mauulu, cijji cikole cyònsò cya Nzambi wa Bukole bwònsò aci.

253 [Katupa kaa mukaba wa mêyi munda mutupu—Muf.] “Badyombodi baa aba bàdì bîmpè; biikàle ne cimwenekelu cya difwana dya Nzambi, kadi biikàle bavila bukole bwàdì: baa nanku awu abu ùbèpùkè.”

254 Kwangaciku divwayila dya mubidi to. Kwangaciku disaluka to. Kwangaciku nî ncinyi nî ncinyi paudi kuyi mutuutakeene ne Nzambi to, mpala ne mpala, ne mulekele Nyuma wa Nzambi mubwele munda mwebe. Yèyè neùjè mwoyi webe ne musuuka webe ne bukole, ne dinanga, ne dilakuka dya kapyà.

255 Nzambi, wankwàcishakù bwa ngàpeta kaanyi kaaba kuntu kwaka, mu mwaba kampanda mu matuku makeke àdì àlondà aa, nshaalemu too ne pàngààmònà ne nkwaka wanyi wâlonda udi penyi.

256 Tudi bindile ntanta mule. Mêmè ndi mwindile ntanta mule. Ndi mvuluka mûmvwà munkaci mwa kukosa mashinda mu bulà bwanyi bwa kumfundu kwaka. Pàngààkiibakà nzubu ewu kaaba aka, Mukalenge kumbiikilaYe. Mukajaanyi kwasaye mwadi bwalu kavwa muswe kushiyangana ne mamwèndè to. Kwambaye ne: “Pàmwàpa kî mbafwanyine kumukuba to.”

Ki mêmè kudyambidila ne: “Nansha mêmè paanyi, s’ndi ne wanyi mààmù mukulakaji.”

257 Mvwa musòmbè mwaba awu, dîngà dituku, munkaci mwa kukosa mashinda. Mêmè kusòmbela panshi. Anu bitooke nunku, Dìyi kampanda kulwadi, dyàmba ne: “Tapuluka, dîbà adi Mêmè nènku bènèshè.”

Mêmè ne: “Mukalenge Nzambi, mvwijilèku wa dyèse muneemu emu. Wèwè’s udi mumone cîndì nkungamangana naaci aci.”

258 Bintu byònsò abi byajiki mpindyewu. Mààmù Broy ukaadi mu Butumbi; ne Mààmù Branham pende.

“Nkwaka wanyi udi penyi, Mukalenge?”

259 Cilumbulwidi necidikume pa ditunga edi, dimwe dya ku matuku aa. Kudi matunga makwabo àdì kaayi mumvwe Evanjeeliyo to. Kudi myaba kampanda.

260 Cyònsò cyùdì wenza, kwikadiku wàpwa mwoyi mèyi aanyi to. To. Eci cyèlèku lwongo. Nzambi angateku kasala kaa cyamu ààfùndè ne maleeta matonkona mu mwoyi webe, bwa kwikadi wâlwa kuàpwa mwoyi to. Kanucipuku mwoyi to. EMU MMUDI MUKALENGE WAMBA. Alukilaayi kùdì Nzambi, ne myoyi yenu yònsò. Alukilaayi. Kweyemenyi disaluka, divwayila dya mubidì, anyi nî ncinyi cyònsò to. Keba Nzambi ne byònsò bidì munda mwebe amu, too ne pàdì cintu kampanda cikwenzekela, ciikàle cyèza ne wikalè muswe kulongolola, muswe kwikala wa difwana dya Nzambi, uciina Nzambi, mwikàle—mwikàle muswe kwikala ne nsòmbèlu mujaalame. Enza nanku. Kucipuku mwoyi

to, bwalu tudi ku cikondo cya nshiikidilu. Mpindyewu, vuluka ne, tudi ku cikondo cya nshiikidilu.

<sup>261</sup> Nenku vulukaayi eci, pânkaadi njikija apa, bwa kusambila, mu kasunsa kamwe aka. Kanupu mwoyi to. Nteelejaayi, nwênù tabernacle. Piikalàbi ne mukaba wa méyi ewu wucidi wenda wuya, nteelejaayi, nwênù baa pa buloba, anyi kwayawu aku. Nekujuuke cimanyinu, cimanyinu cilelela. Pâmwäpa ní cikaadi cimane kujuuka kadi bapange kucimona, cimanyinu cilelela citù Nzambi anu ufila misangu yònsò aci, cidìbo bapange kumona aci.

Tusambilaayi.

<sup>262</sup> Yesu wa mu Nazaleeta, pàvwà Dìyì dinene adi dyakule kuntu kwaka dituku adi apu, kukaadi ndambu wa mbingu, mwimanyine ku luseke, pâmvwà munkaci mwa kusambuka mucu awu apu, mu nyungulukilu wa mucu, ne Nyuma uvwa mupweke upicila ku nsongo ya mici awu kwambaYe ne: “Yesu wa Dipungila Dipyadipya awu n’Yehowah wa Dikulukulu.” Éyì Nzambi, pa Lubwebwe elu mpândi mwimane. Myaba mikwabo yònsò nya lunteka. Myaba mikwabo yònsò ndunteka.

<sup>263</sup> Kukaadi bidimu bitwe ku makumi asatu, Mukalenge, kùndi ngeela lubila lukole, lupicila mu cibandabanda emu. Mukenji awu, ncyèna museesukeKu nansha kancii to, kùmvwà mubangile aku, anu Mukenji wumwewumwe awu, cintu anu cimwecimwe aci; mbiikila bantu bwa kwalukilabo, kakuyi ku divwayila kampanda dya mubidi to, kadi ku dilabula dya dituutakeena ne Nzambi ne kulediibwa ku Nyuma Wende. Kaa, ciikalà cishààle kabidi ncinyi pa kuumusha cilumbulwidi? Aba bâdi munkaci mwa kubenga Mukenji awu abu, Mukalenge, kakucyena cintu nansha cimwe cidì cishaale to.

<sup>264</sup> Wêwè udi muuje Dìyì Dyebe anu patapata, bwa kwamba patooke bimanyinu bya dituku dya ndekeelu, ne kubijaadika mu mushindu wa kabiyiku mwa kupangila to, bwa ne Wêwè udi Nzambi, ne twètù tudi apa. Nansha mene patùdi tuumvwa batangadiki banene mu matunga leelu ewu, bònsò beela mbila mikole. Ne cimenga-cikulu cya ditunga dyetu, ne difunkuna dya matunga makwabo, ne—ne bwôwà bwikàle bwicikila. Ne patudi tuumvwa bantu banene aba, bakabwela buludi mu France, badyanjila kwamba ne bômbè bwa kumpala nebuponene mu Louisville, Kentucky, mu nkama ya kilomeeta ne bukatangalake mu ditunga dijima. Éyì Nzambi wa yààyà, bôbò mbapete mpunga bwa kuteeleja, kadi kabeena baswa to.

<sup>265</sup> Bibejibeji, tutupa twa maluba àdi àtàngilà ekeleeziya, télévision, cisanji cya tudyomba, mbicipatule. Kakwenaku paa kusingila to. Pashiishe, Mukalenge, Wêwè udi mwambe ne: “Bònsò bâdi Taatù muMpeeshe nebalwe, ne muntu nansha umwe kèna mwa kulwa pàdi Taatù kayi mumukoke dyambedi to.”

<sup>266</sup> Mpindyewu, Taatù, ndi nsambila disambila edi mbwanyi mêmè mwine. Ki mêmè ewu, ngenda nya ku dishaala muntu mukulakaji mpindyewu, ne ncyêna mumanye ne mmatuku bûngì kaayi adi matushaadile to, Mukalenge. Bidi mwa kwenzeka ne nansha leelu katuyi mwa kumupeta to. Kadi cyônsò cidì cishaale aci, Mukalenge, ne cidì cishaale mu matuku aanyi a mwoyi aci, Éyì Nzambi, bidiku mwa kwenzeka ne Wêwè wikalè mwa kucyangata ne kwenza naaci cintu kampanda anyi, bwa butumbi Bwebe?

<sup>267</sup> Ndi nganji kulomba dyambedi bwanyi mêmè mwine, Mukalenge, bwa Wêwè kumpeeshaku diswa Dyebe. Diswa Dyebe dyenzekè, Mukalenge, cyônsò cidìdi difwanyine kwikala aci. Ndi muswe bwa kwambiwbabi mu dituku dîngàâlwa bwa kutuutakeena Neebe adi ne: “Mbyenjiibwe bîmpè.” Pîikalàdi dyalabale, anyi dyôdi dikese, cyônsò cidìdi mu mwoyi Webe munene awu aci bwa matuku aanyi a mwoyi, Mukalenge, ki mêmè ewu.

<sup>268</sup> Tumaku Mwanjelo ne dikala dya mudilu bwa akezule mishiku yetu ne atujidile, Mukalenge, bwa cintu kampanda cya cinene cidì cyâmba kudikuma pa buloba eci. Enzaku bwa twêtù kwikala dîyì didì dyela lubila mu cipeela cya mpekaatu ne: “Dilongololaayi bwa kutuutakeena ne Nzambi.”

<sup>269</sup> Kaekleeziya kakese aka, bantu bàdi bàlwa, ku dituku ne ku dituku aba, ne bàdi bendesha mashinyi ntanta wa nkama ya kilomeeta aba, Éyì Wa Cyendelele ne wa dinanga, ne utu kayi upwaku mwoyi cyenzi kampanda to, Nzambi wa Abraham, wa Izaka, ne wa Yakobo, Wâkabiîsha Yesu ku bafwe, ne Yèyè mmusombe mpindyewu ku dyabalume dya Mutambe bunene wa mu Dyulu, Nzambi mwele ntanta mu mubidi, beneshaku bantu bândi mbenesha mu Dîna Dyebe aba. Swaku bwa kwikalabo misangu yônsò anu bavuluka ne bamanya ne kudi cimanyinu kampanda, cimanyinu cya nshiikidilu. Ndi ndomba bwa Wêwè kubapeesha, ne kubavwija bapeci baa bakwabo: ku mudimu wabo, kwônsò kùdibo mwa kusanganyibwa aku, mu mânsangà a mîsèèsù, ku byujijidi bya tusoloonyi, anyi kwônsò kùdibi bifwanyine kwikala aku, bwa kufilabo bujaadiki mu cisumbishidi cya bisekiseki, kùdi musùmbishi wa mabeele. Cyônsò cidìci cifwanyine kwikala aci, Mukalenge, cintu kampanda cyôci cidimwija mu mwoyi wabo, swaku bwa kwikalabo bantemu. Swaku bwa bìikalè ne nsòmbelu ya difwana dya Nzambi ne mijidila mu mushindu wa ne bìikalèku mikanda mifundilangana yidìbo babala kùdi bantu bônsò.

<sup>270</sup> Nzambi, beneshaku bakaji beetu. Éyì Nzambi, ndi ndomba bwa Wêwè kubalekelaku bwòwa màyi kwîsù kwabo aku, aba bàdi kabayi bacyenza abu, bàngatè. . .bùùmushè bilaabu bya kwîsù bya Izabela abi. Enzaku bwa bìikalè ne dikima

dya beena Kilisto, ne Nyuma wa Nzambi pambidi paabo, búngì bukumbane, bwa kumanya ne kabivwa bikengela bwa kwikalabo bavwala bilàmbà bikooyike bidìbo bavwala abi to. Bálekelè nsuki yabo yileepa, mùdi bainábànzà. Bwalu mbafunde mu Bible ne: “Ditamba dikese dya mushinga mukole ku mèsù kwa Mukalenge ndiikalà mwa kupanduka ku bintu byònsò bidì bipatuka mu dituku dya ndekeelu adi. Nediikalè dya butumbi ku mèsù kwa Nzambi,” mùdi muprofeta mudyanjile kucyamba. Nzambi, enzaku nanku.

<sup>271</sup> Kakucyena cikwabo cintu nansha cimwe cìndi mwa kwenza to. Ndi mwele lubila ne diyì dyanyi, ku cidimu ne ku cidimu, Mukalenge. Nunku Wèwè kuyi munyungeku mpindyewu to, kakucyenaku cintu cìndi mwa kwenza nansha cimwe to. Ndi ndomba nanku, bwa Wèwè unyunge. Ne ndi mumanye ne Wèwè newènzè, bwalu Wèwè ngwàkacilaya mu Diyì Dyebe. Ne pòpò apu ki pàndi mwimanyine. Mémè ndi mwa kufila anu bujaadiki cyanaana, Mukalenge. Ne muntu nansha umwe kèna mwa kulwa paudi Wèwè kuyi mumukoke nansha; ne bònsò bàdi Taatù mufile nebalwe. Ndi ne ditwishibwa adi, dya ne Diyì Dyebe nebatangile bwalu bwàDì. Tùbènèshèku, Mukalenge.

<sup>272</sup> Kàdi kwòkò bantu mwab’ewu bàdi bakùùkile mwoyi anu ku divwayila dya mubidi, pàmwäpa bàkaadi beele mbila, bòbò, pàmwäpa badi ne Nyuma Mwîmpè, anyi... Katwena bafwanyine kubala aci to, Mukalenge, bwalu tukaadiku anu bamonemone bantu mu manayi a ndundu, beela mbila. Tukaadiku anu bamonemone bantu mu bisankasanka bya pa buloba ebi, beela mbila. Tukaadiku anu bamonemone bòbò abu mu disanka dyàbúngì bakafika too ne ku dyela dya mbila, mu cijjilù cya maja, baja maja, ne bintu byònsò abi. Aci kí ng’Wèwè to, Nzambi.

<sup>273</sup> Kadi bwa kutuutakeena Neebe ne kuyiikila Neebe, ne Wèwè wandamuna, ki citùdi twètù tukeba ncyòci aci, Mukalenge. Kaa, ndi nKulomba, Nzambi, mu kasunsa aka mene, bwa Wèwè kutuma Nyuma Mwîmpè awu mu cibambalu emu, kaaba kakese, kadipwekeshe aka. Kakwenaku mwaba nansha umwe wùdi mukumbanyine bwa Yèyè kulwamu to. Kadi ndi ndomba, Nzambi, ne, mu mushindu Wèbe Wèwè mwine, bwa Wèwè uMutume mu cibambalu eci anu patùdi twakulangana apa. Twishishaku misuuka.

<sup>274</sup> Anu mûngämbi katanci aka, Mukalenge, pàmwäpa Wèwè udi muteeke dibwe dya cilendwishi mu njila wa muntu kampana, pa bidì bitàngilà mabiikila a ku cyoshelu aa, tusengeleela ne tuswishisha bantu bwa kulwabo. Kadi patukaadi twalukila cidimu cidì cilonda, tubasangana mwànà wa iferno misangu yibidi kutamba ne mùvwàbo ku cibangidilu amu. Nebalwe mushindu kaayi, piikalàbi ne kí ng’Wèwè Nyuma

Mwîmpè munene udi ubatwishisha ne ubafikisha ku diitaba dipiila dyabo?

<sup>275</sup> Nenu ndi nKulomba, Mukalenge Nzambi, ngènzàmpèkààtù mulume anyi mukaji awu, mwânà wa balume anyi wa bakaji, yèyè usanganyibwa mu citanda emu mu dinda emu, bwa Nyuma Mwîmpè alweku ne bukole bwa ditwishisha bwa menemene abu mu mushindu wa ne binsonji ne bimupwekele pa matama ne bizololokela mu musuuka wende, Mukalenge, bwa mu ndondo wa mwoyi wende yèyè wamona mwa kwitabuuya ne kwitaba Kilisto. Enzaku nanku, Mukalenge. Kabyakumukengelaku cyoshelu to. Musuuka wende awu ki wikalà cyoshelu cyende. Enzaku nanku, Mukalenge. Dîbà adi yèyè udi ulwa ne mwoyi wende wònsò Kùdì, wàmba ne: “Ndi mpindyewu muswe bwa kubatijibwa mu Dînà dya Yesu Kilisto bwa dilekelediibwa dya mpekaatu yanyi yîndi munyingaleele ayi.” Enzaku nanku, Mukalenge. Ûmuujèku ne Nyuma Mwîmpè.

<sup>276</sup> Tùpèèshèku batangadiki pa buloba leelu ewu, kî ng’aba bàdì baswishishangana ne bakokangana ku bukole, ne bavwijangana bânà baa cyena mangumba abu to. Nzambi, dijuudileku Wèwè mwine bânà. Fikishaku bantu, Mukalenge, ku disambila. Ndi ngeela meeji ku nzubu wa Koneeliyo. Kacya kacivwaku cyanji kwenzekela muntu wa baa Bisamba bya bende kumpala to, kadi bôbò bavwa munkaci mwa kujila kwa byakudya ne kusambila. Kadi mulume wa Nzambi awu, muprofeta awu, paakimanaye mwaba awu: “Nenu pacivwaye anu wakula mèyi aa, Nyuma Mwîmpè wapakwekela aba bàvwà munkaci mwa kuteeleja Dìyi abu.” Nzambi, filaku disangisha dya mushindu awu adi. “Pacivwa anu Peetelo wakula mèyi aa.” Èyi Nzambi, bôbò bavwa badilongolole. Bavwa munkaci mwa kujila byakudya. Bavwa munkaci mwa kwindila. Bavwa ne meeji matooke. Kabavwa anu “bindile” cyanaana to, “baakindila too ne.”

<sup>277</sup> Bapostolo abu baakindila too ne pàakapwekà Nzambi munkaci mwabo, ne bavwa mwa kuMumona ne kwakula Nende. Baakapatuka ne kapyà mu myoyi kààkooshà buloba ne kubuumisha. Bavwa ne bukutu, ne baakiimana munkaci mwa myaba yìvwà ya bafwanyine kudikosesha mitu. Baakamba ne: “Mbîmpè bwa twètù kunuteeleja nwênù, anyi malongolodi enu awu, anyi nwênù bantu baa cyena mangumba aba anyi? Anyi, tudi ne cya kuteeleja Nzambi? Nuditangidilaayi bwalu abu.” Ne dyakamwe, mbenze anu babalekela baya anyi, bumba bapatuka baya kayiisha cyakabidi Dînà dya Yesu Kilisto. Èyi Nzambi, watùpèèshakù—watùpèèshakù aci’s, Mukalenge.

<sup>278</sup> Tùjuudilèku mwine ùdì Wèwè wamba mu Mifundu awu. Umulaabeku, Mukalenge. Nyewu mbiikila bwa kulwaye. Mutumeku’s, Mukalenge. Èyi Nzambi, myoyi yetu yidì ne nzala ki kwelayi mbila eku. Mutumeku’s, Mukalenge, mwine wikalà mwa kwaluja cyakabidi bantu ku Diitabuuya dya baataatù

awu, wíkala mwa kubuumusha ku bantu baa cyena mangumba bàdìbo benzeja maalu aba, kubabweja mu dilabula dilelela ne Nzambi, bu mwakenzabo dituku dya Mpenta, ekeleeziya wa cya bushuwa cyakabidi, ùlàkuka kapyà, mwikàle ne Mukenji wumwewumwe awu, Diitabuuja dimwedimwe adi, Dilongesha dimwedimwe adi, Bible umwèumwè awu, Nzambi umwèumwè awu mwikàle ne cimanyinu cimwecimwe aci. Tùùjuudilèku muprofeta's, Mukalenge.

<sup>279</sup> Ondopaku babeedi munkaci mwetu leelu ewu, Mukalenge. Kudi aba bàdì mu lukengelu kaaba aka. Ndi mbalombela, Taatù. Ngénjì mukùngùlù mule be, munenge bikole mu dinda emu, kadi kudi bàdì basòmbe kaaba aka.

Diloolo kampanda, pàvwà mupostolo Pòlò muiyishe bufuku bujima, nsongaalume kampanda kuponaye kuulu kwa nzubu awu e kudishebeyaye. Yèyè uvwa muye mu tulu. Kavwa ne meeji a kucyenza to, kadi yèyè—yèyè wakaya mu tulu. Ki kuponaye, ne mwoyi wende uvwa muye. Kadi mupostolo wakasambila, ki mwoyi kwalukilawu cyakabidi munda mwende.

<sup>280</sup> Éyì Mukalenge Nzambi, kudi bààbùngì kaaba aka bàdì bapone mu màsaamà. Kadi patwìndìdì too kupicisha ne dìbà dya kutangalaja ekeleeziya, kudi aba bàdì bàsaamà. Éyì Nzambi, bukole abu, Nyuma Mwimpè utu udilwila mu Dikunji dya Kapyà awu—awu, udi Yèyè ùDyàmba patooke ne ùDìmanyisha ne Yèyè Nganyi, ne twètù tuMwitabuuja awu, Anyungulukileku muntu yònsò udi mwab'ewu leelu ewu. Ondopaku babeedi. Ujàngànàku ne Nyuma. Filaku disungidiibwa mu mushindu wònsò, Mukalenge, wutùdì naadi dijinga awu. Pàcishàku myoyi yetu patapata ne diitabuuja, Nzambi, ne diitabuuja dìdì kadiyi difwa adi, ne diitabuuja dìdì kadiyi didya cibanga adi ne twètù tudi ne EMU MMUDI MUKALENGE WAMBA. Enzaku nanku, Mukalenge.

<sup>281</sup> Mbantu Beebe, Mukenji Webe, Dìyì Dyebe, basadidi Beebe. Ne dyabulu kènàku ne bukookeshi nansha bukese pa twètù to. Yèyè kènàku nansha mene mwa kutubutula pìikalà ntenta ewu mubutudiibwe to. “Bwalu pìikalà ntenta wa pa buloba ewu mubutudiibwe, tukaadi bamane kwikala ne mukwabo munkaci mwa kwindila.” Yèyè kèna mwa kutwenzela cintu cibi nansha cimwe to, bwalu cyònsò cìdì cilwishi cyetu aci ncilwishi Cyebe Wèwè, bwalu twètù tudi Beebe Wèwè. Tudi basumbiibwe ku mushinga kampanda, wa Mashi a mushinga mukole a Yesu.

Ki bwa cinyi, nwènù démons yidì miswike bantu aba ne màsaamà, ndi nnutumina dīyì, mu Dìnà dya Yesu Kilisto, bwa kupatuka mu yònsò wa kùdìbo. Mèmè bu musadidi wa Nzambi, mwikàle ngamba ne Dìyì edi didi Bulelela, nubashiye. Kanwena ne bukenji nansha bumwe to. Byònsò binùkaadiku nwènù aba balakelake mukana nwamba ne nudi

naabi abi, byakuumushiibwa ku Kalvariyo. Nenku kanucyena mwa kushaala babalame kabidi to.

<sup>282</sup> Mpindyewu, Nzambi, mulume yònsò ne mukaji, mwànà wa balume anyi wa bakaji mwab'ewu, bàpèeshèku diitabuuja dya kwitabuuja cyòci aci. Dìyì dyamanyi kwambiibwa. “Wèwè mwambile mukuna ewu ne: ‘Tentemuka,’ ne kuyi wela mpatà munda mwa mwoyi webe to.” “Disambila dya diitabuuja didi disungila mubeedi.” “Udi upeta cyùdi ulomba aci.” Aci tudi bamanye. Tudi ne dyeyemena adi kùdi Nzambi. Twètù biikàlekù anu ne diitabuuja kampanda, Nzambi Yèyè mwikàle ne mwoyi munda mwetu, tudi twitabuuja cyòci aci. Ne mèmè ndi mumanye ne bidi nanku, Mukalenge. Pa nanku, enzaku nanku, leelu ewu, bwa màsaamà ne lupandu. Anyi, ndi ne cya kwikala mwambe ne, anyi bivwa bikengela bwa mèmè kwikala mwambe lupandu kumpala, ne pashiishe màsaamà. Enzaku nanku, Mukalenge, bwalu musuuka ngùdi ne mushinga wàbùngì kutamba mubidi.

<sup>283</sup> Kadi aba, misangu mikwabo, bàdi ne misuuka yabo misungidiibwe abu, kadi mubidi wa kale ewu mucikàle anu wa Sataana, ne yèyè's mumanye ne neàwàngàtè ku cikondo cya ku nshikidilu. Neawwvingutule àwàlùjè mu mushindu wa bìshiishì bya mu buloba bibwelamu ne biwudya wònsò. Kadi yèyè kaakulengaku musuuka awu to, bwalu wòwò awu mbubanyi bwa mushinga mukole bwa Nzambi. Ne kupicila ku mwine mwoyi awu, anu mùdìwu upatuka mu dibeji amu, wùdi wàlukila kùdi Nzambi Wàkawùfila awu; newupatuke mu muvù wàlondà, mwikàle ne mubidi mupyamupya wùdi Sataana kayi mwa kulengaku to. Nansha bukulakaji anyi nì ncinyi cikwabo cyònsò kacyenaku mwa kuwulenga to. Wòwò newikalè mubidi mutumbishiibwe. Wòwò awu ngutùdi bindile ewu, Mukalenge. Beneshaku bantu Beebe mpindyewu. Mbebe Wèwè. Ne ndi mbalambula mu cianza Cyebe. Ndi ndomba nunku mu Dìnà dya Yesu.

[Mwaneetu Neville udi ufila dikànkamika—Muf.] Butumbi's wè! Disaamuna. . . [Mwaneetu mukwabo wa balume udi ufila dikànkamika.]

<sup>284</sup> Aci kî ndiyì dyanyi mèmè to. Aci n'Diyì Dyende Yèyè. Kaa, cidi cìtùkèngelà, mu dîbà ditùdi edi—mu dîbà ditùdi ne mwoyi edi! Kanwenaayiku nuumvwa anyi, balunda baanyi, ne Nzambi kàtu ulwa kùdi bantu banene bamanyike bikole? Yèyè ùtu ùsòmbela munkaci mwa tuubantu tudipwekeshe, tukese, tudipwekeshe. Kanwena pàmwàpa nufika ku dimanya ne ncinyi cidi munkaci mwa kupitakana patudi twakulangana apa, ncinyi cidi cyèndakanà mu citanda emu, ne ncinyi cidi cyèndakanà munkaci mwa bantu aba mpindyewu to.

<sup>285</sup> Bwa cinyi Nyuma wànji kwamba, dyambedi ne: “Kumpala kwa Mèmè kubavwija nì ncinyi nì ncinyi cyònsò,” mwakwile kùdi Mwaneetu Higginbotham? “Tabaleelaayi Mukenji ewu, bwalu



Mémè ngudi muWutwale,” cintu kampanda cya mushindu awu, “bwa kunudimwija ku cintu cidi munkaci mwa kulwa eci.” Tangilaayi numone cidi cyenzeke.

<sup>286</sup> Bimwe bintu, Mifundu yîmvwà mufunde kaaba aka, ncyêna nansha muyilenge to, kadi mémè muye anu kule naaYi. Mvwa mulombodiibwe mwaba awu kùdi Nyuma Mwîmpè. Nwamonu anyi? Yimwe ya ku Mifundu ayi, ncyênàku nansha mukùlengè to. Ndi muye anu kule ku cintu cya cyanaana, kule menemene. Ku musangu ne ku musangu, ngumvwa cintu kampanda cilwa, nkudimuka njandula ne civwa penyi. Nyuma munkaci mwa dyakula mu luseke lwônsò mpindyewu.

<sup>287</sup> Kaa, nwênù bantu, ikalaayiku baa kweyemena, ikalaayiku ne meeji matooke. Kanukebi bwa kweyemena. . . Nwamonu’s, nudi—nudi nwênù nukeba cintu kampanda cya cinene ne cya cibàlakana.

Pàdibi ne, baprofeta bônsò, nansha mene Davidi wakamba ne: “Ku Dilwa dya Mukalenge, ne, mukuna wônsò newuvwijiibwe mupweke, ne—ne myaba mipweke neyiwijiibwe mibànde.” Wàkamba ne: “Mikuna neyitupike bu twànà tulume twa mikooko, ne mabeji ônsò neaute bikashi.” Ee, bantu baakadyambidila ne civwa cifwanyineku kwikala cinyi ciine aci, piine. . . pàakalwà Yesu apu?

Cyàkalwa kumweneka ne civwa ncinyi? Muiyishi kampanda wa kale mudipwekeshe, uvwa kayi ne kalaasa kalonga nansha kamwe to. Pàcivwàye ne bidimu citeema, wakaya mu cipeela, kî mbwa kulongeshiibwa kùdi muntu nansha, kadi bwa kulongeshiibwaye kùdi—kùdi Nzambi. Kupatukaye, ne kwimanaye mudijingile cipese cya ciseba cya mukooko mu cifuka, ne myôsà kwîsù kwônsò, ne myôsà pambidi pajima, ne nsuki mipweke mimufikile too ne ku nshingu. Musòmbèle mu cipeela amu, ùdyàngana anu ne maalokùsètà, mbwena kwamba ne mpasu’s, mpasu ya lokùsètà ya cisuku ayi’s ne bwîci, pàvwàye musòmbèle mwine mu cipeela amu apu. Ki kulwaye, mwimanyine mu bitoci kumpenga kwa mâyi aku, mwikàle wàmba bwa dilwa dya Maasiya. Ki Maasiya kupwekaYe buludi, Muntu anu wetu wa patupu ewu munkaci mwa bantu amu, ne kubatiijiibwaYe. Ne baprofeta bônsò bavwa bambe ne neciikalè cimwe cya ku bintu bya bitambe bunene bikaavwàku byenzeke, ne ki civwàci. Nwamonu anyi?

<sup>288</sup> Bôbò mbindile cintu kampanda cya cinene, cintu kampanda cya cibàlakana, bwa kwenzekaci. Nwamonu anyi? Nyuma Mwîmpè kàtu ùbàlakana to. Yêyè udi wela nsèsà. Dibàlakana ndya baa pa buloba. Dyela dya nsèsà ndya Nzambi.

Elaku nsèsà pa mémè, Mukalenge, ki disambila dyanyi. Mpèeshèku kudipwekesha. Ngangàtèku, umfwimbe ne ungenze. Nyuma wa Nzambi udi ne mwoyi, lwàku cyakabidi pambidi

paanyi. Mfwimbèku, ngenzeku. Ungenzeku Webe Wèwè mwine, Mukalenge. Ngangàtèku anu cyanaana.

<sup>289</sup> Ndi anu mumanye ne Nyuma wa Kilisto udi munkaci mwa kwendakana mu citanda emu mu dinda emu. Nzambi wíkala mwa kulumbulwisha baa pa buloba awu udi kaaba aka patùdi twakulangana apa, cya bushuwa anu mûndi mwimane mu cyambilu eci emu. Nkulwe mashindika dimwe, abidi, asatu a cyôci aci, a Dìyì, anu menemene mùdi Bible mwambe. Nuumvu mwäpüwuci pa dîbà adi apu anyi, paanyima paa cyôci aci? Umwe, ibidi, isatu, byônsò mu dilondangana dya nyuma, byônsò mu dilondangana dya Mifundu. Kaa, unzululaayi myoyi yenu bwa nûmwè. Kaa, cikondo cya dikema's, civwà mwa kwenzeka pa dîbà edi's we!

<sup>290</sup> Bavwa basanganyiibwa mu cibambalu cya kuulu, bônsò ne dîyì dimwe, bindile. “Bwalu aba bàdi bindilà Mukalenge ne bavwijulule makanda abo mapyamapya. Nebàbandè muulu ne mapwapwa bu a mukanku.”

<sup>291</sup> Kuyi kabànda kuntwaku anu bwa kwamba ne: “Mukalenge, ndi ndomba luse bwa mpekaatu yanyi. Mpindyewu ndi ngiitaba ku diitabuuya ne ndi mupete Nyuma Mwîmpè,” kadi kwasa lwendu kuya to.

“Aba bàdi bindila Mukalenge,” mbingu, matuku, cyônsò cîdîku aci, “ne bavwijulule makanda abo mapyamapya. Nebàbandè muulu ne mapwapwa a mukanku. Nebanyeeme lubilu kabayi bacyoka. Bôbô bende lwà makàsà, kabaakupangila to. Undongesheku, Mukalenge, undongesheku, Mukalenge, bwa kwindila.” Ikàlà mwindile Mukalenge.

<sup>292</sup> Muunya ne bufuku, ne dinanukila dyônsò, Anà uvwa mu ntempelu, munanukile ne kusambila, muunya ne bufuku. Paakabwelabo ne Yesu, yêyè wakabwela, mpofo, mu citanda amu, musakiibwe. Mukaji mpofo awu kutentekaye byanza pambidi Pende ne kubeneshaye Nzambi. Bwalu, mu bufofo bwende bwa mubidi abu, mu nyuma wende, yêyè wakasakiibwa kùdi Nyuma, too ne mwaba wùvwàYe usanganyiibwa awu.

<sup>293</sup> Mwaba awu, Simeona, muMwindile, mu ndekeelu mwa cibambalu cya disambila mwamwa, ùvwa mumanye ne yêyè uvwa mupete mulayi, wa kùdi Nyuma Mwîmpè ne, kavwa mwa kufwa to; muntu mulume mukulakaji, wa bidimu makumi mwandamukulu, biipacila ku makumi citeema. Kadi yêyè ùvwa . . . ùvwa wambila bantu patooke ne: “Mémè ncyakumona lufu to nciyi mumone Maasiya awu.” Ne pa kasunsa mene aku, Mwânà mukese wa mu diboko . . .

Yêyè uvwa cinyi? Kavwa muntu mumanyike bikole, wa balami bônsò biimana bàkòsa mpala, paakabwelabo ne Maasiya awu apu to, mujingila ne kalolo kônsò ne bilenga bya dikema, mulenga kwisù ne mummyamina manananshi, ne bya mupuuya

mukole mùvwàbo beela bânà bônso baa mu maboko bàvwàbo balwa naabo bwa kubalambulabo amu. Kadi maamù mutekete uvwabo baakula bibi bwa bwalu bwende awu, bamba ne: “Yêyè, mmulelele Mwânà pambelu paa dibaka dinsantu.” Mujìngila mu mikusu, ya ku mucu wa cikokedi, baMujìngile mu mikusu ya ku cikokedi cya ngombe, wènda ùkòsolwela mu citanda amu, ne bantu bônso baditole kule Nende.

Kadi ki kasumbu kakese kàlwalwà aku. kasumbu kakese aku's. Anà, wa kumpala, Simeona, mukwabo, wenda upicila mu mulongo amu, kayi mumanye ne ndìbà kaayi dìikalàye mwa kuMutwishila mèsù to. Ki kwelaye byanza byende muulu e kwambaye ne: “Mukalenge, lekèlaku musadidi Wèbè àyè byàndì mu ditalala mpindyewu, bilondèshile Dìyì Dyèbè, bwalu mèsù àànyì àdi munkaci mwa kumòna lupàndù Lwèbè.” Hum. Nwamonu anyi? Kakuyi cintu kampanda cya cinene, cya cibàlakana nansha cimwe to. Dyela dya nsèsà's; ne nansha mùdìbo bacyamba ne ncibi amu, s'civwa ncimanyinu.

<sup>294</sup> Nenku, leelu ewu, badi baakula bibi bwa cimanyinu aci. Kacyena ne dyediibwa dya mu diboko to. Cidi—Cidi... Badi baakula bibi bwa bwalu bwàcì, ne bàcìtwa mènà a mishindu yònsò. Kadi's ncimanyinu cìdìbo bapange kumona, cimanyinu cìdìbo mene baakula bibi bwa bwalu bwàcì. Bible udi wakula bwa cyòci aci ne: “Cimanyinu, cìdìbo baakula bibi bwa bwalu bwàcì.”

<sup>295</sup> Tuvulukaaayi bwalu ebu patùdì mu lwendu batangile ku mbanza yetu apa. Kanulekediku Mukenji ewu wufwa mu myoyi yenu to. Cyònsò cinudi nwenza, kanwenjiku nanku to. Ikalaayi nwelangana meeji pa Wòwò, muunya ne bufuku. Ne ikalaayi nusambila, muunya ne bufuku, bwa Nzambi ajuuleku ntemu Wende awu mpindyewu. Tudi badilongolole, bwalu mèmè ndi ngiitabuuja ne, abidi àdi panshi aa, cikondo kacyakwikalaku kabidi to. Tukaadi tufikaku.

<sup>296</sup> “Mmunyi, ndìbà kaayi dyènzekàci, Mwaneetu Branham?” Neyèna mumanye to. Pàmwàpa leelu ewu. Cidi mwa kwikala maalaba. Cyòci kaciyi leelu to, nêngiikalè mucìndile maalaba. Ne cidi mwa kwikala cidimu eci, cidimu cyàlwà, mu bidimu dikumi. Pàmwàpa mu bidimu makumi asatu, ncyèna mumanye ne neciikalè dìbà kaayi to. Kadi ndi ngamba ne, kubangila anu ku mpindyewu, ikàlà mudilongolole ku kasunsa kònsò.

<sup>297</sup> Nenku kwangaciku cintu kampanda mu mushindu anu wa ciibidilu awu to. Kwenjiku aci to. Kwikadiku ne diikisha to, muunya ne bufuku, paudi kuyi muyiikile ne Nzambi. Ikàlà mudilame ku dikolesha dya maalù. Kwikadi mwambulukile kuulu mu disaluka to. Kwenjiku aci to. Aci ncitù citwala bintu bya dyumisha dya maalù bùngì cyanaana bya bikafikisha bantu too ne ku dipeta dya bwòwà bwa cyòci aci, nwamonu's, mbwà dikolesha dya maalù muumisha ncyoncyoncyo adi. Kwitabiku

aci to; nansha kakese. Shaala wêwè anu mwaba awu too ne pawayiiikila ne Nzambi. Twamb'eku twamb'eku, musuuka's ngwebe wêwè, ne wêwè's ngwíkala mwa kupicishila Cyendelele muntu mwamwa. Nenku ikàlà mutwishibwe ne kwèna anu ulabulangana ku cyanza cyanaana ne wambulula twitabaayi kampanda, anyi—anyi witaba cintu kampanda ku diitabuuja to. Kwenjiku aci to. Yikila wêwè ne Nzambi. Lekela Nzambi ayiikile neebe, kadi utangile bwa umone cìdì cìkwenzekelà. Tangila umone majinga ebe ne cìdì cyènzekà, dībà adi neumanye ne udi muiikile ne Nzambi anyi to.

<sup>298</sup> Nwènù bàdì baMwitabuuje mu dinda emu abu. Nwènù, ne mèmè—mèmè ngàm̄bi bwa mabiikila a ku cyoshelu. Nudi bamanye mùvwàbo baenza mu Bible anyi? “Bûngì bwònsò bwa bààkiitabuujà Mukalenge abu, bûngì bwònsò bwa bààkiitabuujà Mukalenge abu baakabatijibwa mu Dìnà dya Yesu Kilisto bwa dilekelediibwa dya mpekaatu yabo.” Pawikalà wêwè kacyakacya kuyiku mwanji. . . Katuvwaku ne mabiikila a ku cyoshelu to. Bòbò kabavwaku babiikila bantu bwa kulwabo to. Paùdi wenza aci, udi upeta bintu byònsò. Ki mulumyana nyèyè ewu mulwe ku cyoshelu, mwikàle ne mmwenekelu wa mwena dyambu, ùtwa binù, ne bwalu muntu kampanda nyawu muteete bwa kumufikishaku. Wêwè—wêwè—wêwè's ne bikukolele misangu yibidi bwa kumupetaku kabidi. Nwamonu anyi? Nenku cyùdì wenza ncinyi? Udi upetamu bintu byònsò. Ne Yesu wakamba ne: “Bònsò bàdì Taatù muMpeeshe ne balwe kùNdi.” Shaalaayi ne Dìyì adi. Nzambi neenzè bìdì bishaala. Neya bushuwa. Neya bushuwa. Nzambi neenzè bìdì bishaala.

<sup>299</sup> Nzambi anubeneshe. Ndi ntekemena ne nènnumònèku cyakabidi diloolo edi, mùndi ntekemena, yònsò wa kunudi udi ne mushindu awu. Ndi mumanye ne ne bikenengele bwa bààbûngì baa kunudi kutungunuka ne kushaalabo pambelu, kabayi mu mààbò to. Nèndwe, diloolo edi, bwa kuteelejaku mwaneetu, bu cyòcì mwa kwikala diswa dya Nzambi. Ncyèna muswe bwa kwangata mayiisha ende ònsò abidi to.

<sup>300</sup> Ne—ne Mwaneetu Neville mmulume wa kalolo wa Nzambi. Ne mèmè ndi mumanye, ndi mumanye ne nganyi. . . Pântù mmuumvwa ùyiisha, ntu mumanye ne cìtu cifumina buludi munda mwa mwoyi wende. Ntu mumanye aci. Nenku Mwaneetu Neville, pàvwàye mwambe diloolo adi, dìyì dya kaalumbandi adi, mmwambe ne mèmè mvwa mwambe dìyì dya kushaala batabaleele ne: “Dìngà dituku nèm̄mubàtiizè mu Dìnà dya Yesu.” S'ngàkamubàtiiza. Bwa cinyi? Mvwa mumone meeji matooke ne ngiikadilu wa dyeyemenyibwa mu yèyè. Mvwa mumanye ne bu yèyè. . . cifwanyine kwikala cimupeebwe, ne mumone ne yèyè. . . ne bu yèyè—yèyè bulelela mwa kuCimona, mèsù ende avwa atabala, yèyè mufwanyine kuCyakidila. Mèmè kwindila, ne mwikàle ngambila ekeleeziya ne: “Kanùtácishi meeji to, muiishi wa ba—Méthodistes awu's nealwe anu bilenga.”

S'nyêyè ewu leelu ewu, mpaasata wa tabernacle, mushindame mu mudimu anu ne mwende mwònsò, mu Mukenji. Yêyè mmwitabuuje Nzambi. Ne mêmè ndi mumanye ne, pândi ngumvwa cintu kampanda cifùmina kùdì Mwaneetu Neville, ndi mumanye ne ncishuwashuwale, cifùmina kùdì Nzambi, bwalu yêyè mmuntu wa mushindu awu.

<sup>301</sup> Ngaatentekedi mishwala yenu yîndi musambidile eyi byanza. Mutwishiibwe ne, yònsò wa kunudi wapeci dibenesha dya kùdì Nzambi. Ndi mutwishiibwe ne Nzambi udi mu mwoyi webe.

<sup>302</sup> Katùtu—katùtu tulwa apa bwa—bwa kupeta dibenesha dya kùdì Nzambi, bwa menemene, patùdì tulwa mwab'ewu to. Dituku dyònsò ditùdì tukoka kapeepa bwa kweyela adi, tudi tupeta dibenesha dya kùdì Nzambi. Citùdì tulwa kwenza kaaba aka, ndilongolodiibwa ku bilema, bwa kukosa, kutengula myoyi yetu, ne kufika kumpala kwa Nzambi, ne kwitabuuja Nzambi ne myoyi yetu yònsò.

<sup>303</sup> Nwavulukaayi Dîyì dya Mukalenge. Nenku kanupu mwoyi, ne kanupangidi to, bwa kukenketa cimanyinu cilelela cituma kùdì Nzambi.

Ne pashiishe ndi muswe kupingajila Mwaneetu Neville bulombodi bwa disangisha, kumushiila bwa kwambaye cyònsò cidiye muswe kwamba aci.

[Mwaneetu Neville udi wamba ne: “Ncya bushuwa ne mêmè, ekelekele, ndi nzwambila's, ndi mumanye ne Nzambi mmushindike citùvwà twêtù batekemene ku ntwadijilu kwa disangisha. Pândi ntangila bûngì bwa mpala ebu, mu dinda emu, ndi mumanye ne bivwa bîmpè bwa wêwè kwikala mwab'ewu, ne bivwa bîmpè bwa mêmè kwikala mwab'ewu, ne mvwa ne cya kwikala mwab'ewu, ne wêwè uvwa ne cya kwikala mwab'ewu. Mudimu webe mmuujibwe ànu mu wôwò menemene pawikalà ubala ne mmùdiwu nanku. Cyùdì naaci mu dinda emu aci, udi mwa kwikala naaci bwalu udi mucipetele kùdì Nzambi.]

[“Nenku dyakamwe netwikalè ne mudimu wa dibatiiza, wàlondà cyôci eci. Ne Mwaneetu Willard Collins ngwìkala mwa kwenza mwine mudimu wa dibatiiza awu, ne tudi ne bantu babidi anyi bapite apu bàdì badilongolole. Kàdi tuvw'a kujingaku bwa kumona lukama lujima lwa bàdì badilongolole bwa dibatiiza dya mu Dînà dya Yesu Kilisto, mu dinda emu.”]

Amen!

[“Ikàlà mupangadike bwa kuleeja patooke diitabuuja dyebe mu mushindu mumweneshiibwe. Kacya diitabuuja kaditukù cyenzedi to. Diitabuuja, ditùbo bamba adi, kaditukù dîmpè to. Kadi diitabuuja, dileeejiibwe patooke, ndiyi dituma dya mu Bible.”]

Amen! Aci ncya bushuwa.

[“Ku ditumikila, diitabuuja didi mwa kuleejiibwa patooke. Nzambi asweku apeeshe muntu kana yònsò, mu dinda emu, udi kaaba aka awu, udi udyumvwa mudilongolole bwa kwenza nanku awu, swaku ulwe. Pìikalàbi ne eci cidì, pìikalàbi ne eci cidì ndambu pambelu paa bwebe bulongame bwa cyûkaavwà wèwè mupangadike, anyi pàmwâpa uvwa ne cipungidi kampanda cya dikumbaja dyakamwe, anyi cintu kampanda, wèwèku ne mushindu wa kucitentemuna, bwa kukumbajaku cyenzedi cya ditumikila eci, ndi ngiitabuuja mèmè bu mwaneenu mu Kilisto mudipwekeshe, ne bu mukwacishanganyi wa mudimu pamwe ne muprofeta wa Nzambi, ndi ngiitabuuja ne ncifwanyine—ncifwanyine kwikala disungula dyebe dya ditambe bwîmpè, bwa kwangata dyôdi dipangadika adi mpindyewu.”]

Nzambi ènzèku nanku’s we!

[“Ne ànyishèku bwa wèwè ulwe, ne wangate keebe kaaba munkaci mwa bakwabo bàdi ne cya kubatijiibwa aba, bwa wamònakù mwa kwikala mu búngì ebu, bùdi bwènza kasumbu kakese kaa mikooko aka ebu. Kaa, mbilenga bya dikema’s, kî mmwòmò anyi? bwa kwikalaku umwe wa ku bàdi Bèndè Yèyè, ne kwikalaku bilondeshile Dîyì Dyende. Swayiku bwa twètù bònsò cyapamwe tujuukile kuulu, patukaadi tudilongolola bwa kutangalajangana apa.]

[“Mu dyalumingu dîlwalwà edi, Mwaneetu Branham nealukile bwa kwikala neetu cyakabidi. Twavulukaayi dimanyisha adi. Yèyè wambi ne nealwe kaaba aka diloolo edi, kadi kî mmwambe ne neayiishe to. Kadi, dyanyi dijinga didi ne, misangu yònsò, ùvwa mwà kuyiisha. Ne kabyena bikengela bwa kwikalaye ne diciina nansha dikese pa bìdi bitàngilà mwaba wúndì mwimanyine pa bwalu abu to. Dyanyi dijinga didi cya bushuwa menemene ne, bu mùdibi ne Mukenji ne—ne dibiikila, mudimu udiye yèyè naawu, ki dijinga dinene dya dituku dya ndekeelu edi. Ndi mèmè nshiya kaaba, dîbà kana dyònsò.]

[“Nèngàmbè cyôci eci pàdi bantu ne yèyè biikàlepù apa ne: Mèmè, ndi nshiya kaaba ne disanka dyònsò, dîbà kana dyònsò, mu disangisha kana dyònsò, bwa Mukenji wa mushinga mukole wúndì ngiitabuuja ewu, bwalu Nzambi wákwidì ku twètù babidi, mu dinda emu, ciikàle cyumvwija cimanyinu cya cyôci eci. Nenku mbinsankishe bikole bwa kwikalaku ne dyèse dya kwikala mukumbane bwa kwikala anu mwine udikù mwa kumushiila kaaba awu.]

[“Nenku ndi muswe, diloolo edi, bwa kwikala ne disanka, pìikalàbi ne mwaneetu, ne musadidi ne muprofeta wa Nzambi, yèyè mudilongolole bwa kwenza nanku, nèngìkalè ne disanka dya diyiila ne panshi bwa kumushiila kaaba. Anu ku dîyì dyende nkaayaadi, cyònsò cidiye udyumvwa bwa kwenza aci. Kadi, yèyè wákulù, kadi twètù netuteeke nkomenu wa mwanda wònsò nkòong anu mu byanza bya Nzambi wa Bukole bwònsò.”—Muf.]

<sup>304</sup> Kwèna mufwanyine kulomba cintu kampanda cya kalolo cipite aci to, kùdì mwaneetu wa bushuwa, kî mmwômò anyi? Cîndi mêmè. . . Nwamonu's, nwênù balunda baanyi, ndi—ndi mumanye ne nudi bannange. Nudi banange Mwaneetu Neville. Nudi banange cisamba cijima cya Nzambi. Tudi banangangane muntu ne mukwende. Bu ne kuvwaku cikondo cìvwà cìkèngelà bwa twètù kwikala batambe kunangangana muntu ne mukwende, s'ndeelu ewu. Bivwa bikengela bwa twètù kwikala balamakanangane, mwaneetu, mu mushindu wa biikàle anu. . . Tudi bafwanyine kwikala batambe mene ne bânà baa muntu balume ne bakaji baa mashi amwe baa cya bushuwa. Ki dinanga òvwà dikèngelà bwa kwikaladi mu myoyi yetu bwa muntu ne mukwende ndyòdì adi, kaneemu ne dyanyina, bya bitambe kutumbuka. Ne mêmè ntu munange aci. Ntu munange cintu cilelela aci.

<sup>305</sup> Nenku mwab'ewu, Mwaneetu Neville, ne Mwaneetu Higginbotham, Mwaneetu. . . ngeela meeji ne awu uvwa m'Mwaneetu Funk, kabivwa nansha byumvwika bu ne nyèyè to, udi mufile mukenji awu lwà paanyima pààpa awu. Wùdì mulwe. . . mmifumine kùdì Nzambi, yôyi mikenji ayi, mulunda wanyi, nkùdìyi mifumine cya bushuwa. Ewu yònsò udiku ne dijingulula dya nyuma mmumanye aci.

<sup>306</sup> Kadi cìdìci ncyôci eci. Mu dilwa, ntu—ntu muswe bikole Mwaneetu Neville mu mushindu wa ngeela meeji aa, nwamonu's. Ncitu—ncitu muswe kwamba kantu nansha kamwe to amba anu bushuwa mêmè mupete cintu kampanda cya kùdì Nzambi cya kunwambila. Nwamonu anyi? Nenku mvwa mupete cyôci eci—cyôci eci cimvwile mu mwoyi, kukaadi matuku bu abidi anyi asatu nanku, ne ncyèna mufike ku dicitangila bikole to anu too ne makelela diloolo awu, pàngààbadi ndambu wa Mifundu. Ki bwa cinyi ndi mulwe bwa kucitwala. Cyanguumuku pa byanza byanyi mpindyewu. Nudi numona anyi? Cyònsò cinwaswa kwenza naaci aci, aci, aci ncifwanyine kunutangila, nwênù, nudi numona's. Kadi ncimane kunguumuka pa byanyi byanza.

<sup>307</sup> Kadi, mêmè ne Mwaneetu Neville, tudi anu mushindu awu. Bu mêmè mwa kulwa apa, anu bwa—anu bwa kwakulaku bwa katanci, ne cintu kampanda cya mushindu awu, kadi Mwaneetu Neville mwikàle ne mukenji wa kùdì Nzambi, ndi mufwanyine anu kusòmba. Eyowa's, cya bushuwa. Ndi mufwanyine kushiila mukenji wa kùdì Nzambi awu mwaba, misangu yònsò. Nwamonu anyi? Ki mushindu wutùtù twenzelangana muntu ne mukwende ngwòwò awu. Ki bwa cinyi ndi ngamba ne nêngiikalè. . . Nzambi Yèyè—Yèyè kayi mumpeeshe cintu to, dîbà adi, pàmwàpa, anu bwa kwakula cyanaana, kadi Nzambi Yèyè mupeeshe Mwaneetu Neville cintu kampanda, ne mêmè mwikàle apa mene ku cyambilu, mu dyalumingu mu dinda, mu dyalumingu diloolo, nî ndîbà kaayi, Mwaneetu Neville

mmufwanyine anu, yêyè mmufwanyine kwikala mwaneetu menemene mu mushindu wa ne, mmufwanyine kulwa kùndi, kwamba ne: “Mwaneetu Branham, ndi ngiitabuuja ne wêwè udi musadidi wa Nzambi, kadi Mukalenge nyewu ufuma ku dimpeesha mukenji kampanda.” S’udi mufwanyine kwenza nanku, kî mmwômô anyi? [Mwaneetu Neville udi wamba ne: “Amen.”—Muf.] Eyowa’s, mukalenge.

<sup>308</sup> Ndi paanyi mufwanyine kwenza cintu cimwecimwe aci kudiye, pìikalàbi ne yêyè mmuswe kwakula. Ndi mufwanyine kwamba ne: “Mwaneetu Neville, udi mwa kumfwilaku luse anyi? Nzambi mmupeshe mukenji kampanda. Bidi bikengela bwa mêmè kuwambila bantu, mpindyewu mene.” Nenku yêyè, Mwaneetu Neville ewu, mmufwanyine kuumuka mu njila buludi; yônsò wa kutùdi, muntu ne mukwende. Nwamonu anyi? Ki mushindu wutùdi twenza ngwôwò awu. Kadi dîbà adi twètù, mêmè nciyi ne cintu kampanda cya cisunguluke to, dîbà adi mêmè . . .

<sup>309</sup> Mêmè ntu munange anu kumuteeleja yêyè uyiisha. Mwawa mumuteeleje. Mbanganyi bàvwà bamuteeleje, mu diloolo dya dyalumingu dishaale edi? Diiyiisha dilenga dya njàjàmà, mûndi ntwambila. Bivwa binwangane eyo, ne cìvwà cyambiibwe mu dinda aci.

Nenku, nwênù, nya’ ntwambila, nudi bapete Dìyì dya Nzambi bùngì bukumbane mu mushindu wa ne bivwa bushuwa bikengela bwa nwênù kwikalaku ne nsòmbelu mujaalame ne kwikala balulame.

Nzambi akubeneshe mpindyewu, Mwaneetu Neville.





*CIMANYINU CILELÈLÀ CÌDÌBO BAPANGÈ KUMÒNA* LUA61-1112

(A True Sign That's Overlooked)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 12 a ngondo wa dikumi ne umwe, cidimu cya 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)